

Ams'i oçala Běšin əyit

«Ams'i oçala» girken Q'ONČuĞoy israilluğoxun Sinay buruğoy tume ğaçesi irəzilugaxun oşa baki hadisoğoxune exlətpsa. İsrailuyox me ğaçesi irəzilugaxun oşa hələ 39 usen ams'i oçalat'un baki, me vədineyal içoğoy bel gele əşurxone hari.

Q'ONČuĞon israilluğo misirluğoy kiyelxun çark'est'i, şot'oğoynak' k'anunxo laxi İzi c'ək'p'i azuk' biyal bakayin, şorox p'urumal Şot'ay laxi yaq'axun c'et'unsay. Şot'ay piyes düzgün nu bakala əşurxo biq'sunen Q'ONČuĞoxun əxil baki günaxt'un əşpest'ay. Mot'o görəl Q'ONČuĞoy əcuğon biq'i Misirəxun c'eri me günax əşpesti israilluğoy nəvoox hari p'ap'amin şot'oğə ams'i oçalane efi. Metərluğen, israilluğon ams'i oçala p'ə nəsil't'un badalbi. Hər nəsil badalbakat'anal şorox siyəyinəne haq'əsi.

Q'ONČuĞon israilluğo zorba sa q'oşune bsa. Şorox Sinay buruğoxun c'əğat'an ene Misirəxun kap t'it'eri amdarxo k'inək' təə, ama iz bəş c'əğalt'oğə əfçibes bakala sa q'oşun k'inək'e c'eysa. Q'ONČuĞon şot'oğə İz kiine Kənan oçala bakala azuk'xoy loxol taşt'ay. Ama hari t'e oçala bağala zahmana p'ap'at'an, azuk'en p'urum Q'ONČuĞoxun çə taradi Şot'ay əcuğə biq'esest'a. Me əcuğal tək azuk'i təə, lap İzi c'ək'p'i Moiseyi, Aaroni saal Maryami belal barest'a.

Ama Buxačux İz tadi əyitin loxol çurene.
 Şot'in İz c'ək'p'i azuk'axun ғаңеѕи irəzilüğa eye-
 xun tene c'evksa, günax əşp'est'i nəsil badal-
 bakit'uxun oşal təzə nəsilə Kənan oçalane eşt'a.

Girke axırast'a Q'ONČuĞon lənətbseynak'
 k'aleşi Bileama israilluğo ük' tadala əyitmux
 pest'unen Şot'ay İz c'ək'p'i azuk'a bakala
 çuresun həmişəluğ baksunane ak'est'a. Şot'in
 İzi həmişə israilluğoxun baksuna, gələcəyeyal
 Çark'est'al yaq'absunane əyit tast'a.

Girke boş bakalorox:

- 1:1-9:23 Q'ONČuĞoy israilluğo İzi əyit tadi
 oçala taşt'eynak' həzirbsun
- 1:1-4:49 Samci kərəm siyəyinə haq'esun
- 5:1-8:26 Cürbəcür k'anunxo q'a q'aydoox
- 9:1-23 C'ovaksuni axsibayi q'aydoox
- 10:1-21:35 Sinay buruğoxun c'eri Moava
 p'ap'amin baki hadisoox
- 10:1-11:35 İsrailluğoy yaq'a baft'it'uxun
 oşa Q'ONČuĞoxun t'ot'opsun q'a
 Q'ONČuĞoy şot'oğo caza tast'un
- 12:1-16 Aaroni q'a Maryami Moiseyaxun
 t'ot'opsun, Q'ONČuĞoy şot'oğo caza
 tast'un
- 13:1-14:45 Əyit tadeşi oçala bəğsun q'a
 t'iya yaq'abaki amdarxoy hari azuk'a
 q'ıdest'un; Q'ONČuĞon azuk'a ams'i oçala
 hələ q'ırx usen efalane baksa
- 15:1-41 Q'erəzəl sa hema k'anun
- 16:1-18:32 Goraxi, Dat'ani saal Avirami
 Q'ONČuĞoy əleyinə c'eysun q'a

- Q'ONÇUĞON şot'oğö leviğoy İzi
c'ək'p'iyorox baksuna ak'est'un
- 19:1-22 Č'oč'a arak' q'a pakbseynak' bakala
xe
- 20:1-29 Q'ONÇUĞON Moiseyi q'a Aaroni
Kənan oçala nu baysuna q'ərare tast'a;
Maryami q'a Aaroni bisun
- 21:1-35 Moava išalayınşaksun, israilluğoy
azuk'xoxun davabi şot'oğö taşt'un
- 22:1-32:42 Moava baki hadisoox
- 22:1-24:25 İsrailuğö q'arğışbseynak'
k'aleşi Bileami xeyir bərekət tast'un
- 25:1-17 Azuk'i Q'ONÇUĞOXUN čo taradi
binik' buxaçuğö bul k'os'bsun q'a iz caza
- 26:1-30:16 İsrailuğoy p'əmci kərəm
siyəyinə haq'esun q'a q'ərezəl sa hema
q'aydoox
- 31:1-32:42 Midyanluğoxun həyif haq'sun
q'a İordan oq'e bəğ c'eğalaç tərəf bakala
oçalxo cöybsun
- 33:1-49 İsrailuğoy ams'i oçala çurpi ganxoy
siyəyi
- 33:50-36:13 Q'ONÇUĞOY israilluğö içöğö miras
k'inək' koft'i oçala c'öybsuna, t'e oçaliyal
içöğoy kiyelxun nu tərbsuna tapşurbusun

İsrailuğoy samci kərəm siyəyinə haq'esun

¹ İsrailuğoy Misirəxun c'eyşuni p'əmci useni
p'əmci xəşə samci ğiney. Sinay ams'i oçala,
Q'ONÇUĞON İvel çadıra Moiseya pine:

2 «Bütüm israilluğoy işq'arxo siyəyinə haq'anən. Bəq'ələğala bütüm işq'arxoy s'iyurxo içoğoy əsilə q'a ailinə görə soğə-soğə şəmpanən.

3 Hun q'a Aaronen israilluğoy boş q'a saal q'a yəşəxun ala bakala, davina tayeres bakala bito işq'arxo bəq'əlpə dəst'oğə cöybalnən.

4 Barta vəx hər tayfinaxun iz ailin kalo bakala sa işq'aren köməybeq'an.

5 Mone, vəx köməybalorox morox bakale:

Ruveni tayfinaxun - Şedeuri ğar Elisur;

6 Simeoni tayfinaxun - Şurişaddayi ğar Şelumiel;

7 İuday tayfinaxun - Amminadavi ğar Naxşon;

8 İssak'ari tayfinaxun - Şuari ğar Net'anel;

9 Zevuluni tayfinaxun - Xeloni ğar Eliav;

10 İosifi nəsiləxun bakala:

Efraimi tayfinaxun Ammihudi ğar Elişama saal Menəşşeni tayfinaxun P'edaşuri ğar Gamliel;

11 Binyamini tayfinaxun - Gidoni ğar Avidan;

12 Dane tayfinaxun - Ammişaddayi ğar Ax-iever;

13 Aşeri tayfinaxun - Ok'rani ğar P'agiel;

14 Gade tayfinaxun - Deueli ğar Elyasaf;

15 Naft'alın tayfinaxun - Enani ğar Axira».

16 Morox israilluğoxun təyinbaki, içoğoy tayfın q'a əsili boş kalo hesabbakala amdarxot'uniy.

17 Moiseyen q'a Aaronenə me s'iyurxo duğəsi amdarxoxun sagala

18 p'əmcə xəşə samci ğine bütüm israilluğə topt'unbi. Şot'oğon q'a yəşt'ə saal q'a yəşəxun

ala bakala bütüm işq'arxo içoğoy əsilə q'a ailinə görə soğ-soğ siyəyinət'un haq'i.

¹⁹ Hametər, şot'oğon Sinay ams'i oçala Q'ONÇUĞON Moiseya əmirbi k'inək' azuk'a siyəyinət'un haq'i.

²⁰ İsraili samci ğar Ruveni nəsiləxun q'a saal q'a yəşəxun ala bakala, davina tayer bakalt'oğoy bitot'ay s'iyurxo içoğoy əsilə saal ailinə görə soğ-soğ siyəyinəne haq'əsi.

²¹ Ruveni tayfinaxun siyəyinə haq'əsit'oğoy say 46 500 taney.

²² Simeoni nəsiləxun q'a saal q'a yəşəxun ala bakala, davina tayer bakala bito işq'arxoy s'iyurxo içoğoy əsilə saal ailinə görə soğ-soğ siyəyinəne haq'əsi.

²³ Simeoni tayfinaxun siyəyinə haq'əsit'oğoy say 59 300 taney.

²⁴ Gade nəsiləxun q'a saal q'a yəşəxun ala bakala, davina tayer bakala bito işq'arxoy s'iyurxo içoğoy əsilə saal ailinə görə siyəyinəne haq'əsi.

²⁵ Gade tayfinaxun siyəyinə haq'əsit'oğoy say 45 650 taney.

²⁶ İuday nəsiləxun q'a saal q'a yəşəxun ala bakala, davina tayer bakala bito işq'arxoy s'iyurxo içoğoy əsilə saal ailinə görə soğ-soğ siyəyinəne haq'əsi.

²⁷ İuday tayfinaxun siyəyinə haq'əsit'oğoy say 74 600 taney.

²⁸ İssak'ari nəsiləxun q'a saal q'a yəşəxun ala bakala, davina tayer bakala bito işq'arxoy

s'iyurxo içoğoy əsilə saal ailinə görə soğo-soğo siyəyinəne haq'əsi.

²⁹ İssak'ari tayfinaxun siyəyinə haq'əsit'oğoy say 54 400 taney.

³⁰ Zevuluni nəsiləxun q'a saal q'a yəşəxun ala bakala, davina tayeres bakala bito işq'arxoy s'iyurxo içoğoy əsilə saal ailinə görə soğo-soğo siyəyinəne haq'əsi.

³¹ Zevuluni tayfinaxun siyəyinə haq'əsit'oğoy say 57 400 taney.

³² İosifi ğarmoğoy nəsiləl bəq'əlesi. Efraimi nəsiləxun q'a saal q'a yəşəxun ala bakala, davina tayeres bakala bito işq'arxoy s'iyurxo içoğoy nəsilə saal ailinə görə soğo-soğo siyəyinəne haq'əsi.

³³ Efraimi tayfinaxun siyəyinə haq'əsit'oğoy say 40 500 taney.

³⁴ Menaşşeni nəsiləxun q'a saal q'a yəşəxun ala bakala, davina tayeres bakala bito işq'arxoy s'iyurxo içoğoy əsilə saal ailinə görə soğo-soğo siyəyinə haq'əsi.

³⁵ Menaşşeni tayfinaxun siyəyinə haq'əsit'oğoy say 32 200 taney.

³⁶ Binyamini nəsiləxun q'a saal q'a yəşəxun ala bakala, davina tayeres bakala bito işq'arxoy s'iyurxo içoğoy əsilə saal ailinə görə soğo-soğo siyəyinəne haq'əsi.

³⁷ Binyamini nəsiləxun siyəyinə haq'əsit'oğoy say 35 400 taney.

³⁸ Dane nəsiləxun q'a saal q'a yəşəxun ala bakala, davina tayeres bakala bito işq'arxoy s'iyurxo içoğoy əsilə saal ailinə görə soğo-soğo siyəyinəne haq'əsi.

39 Dane tayfinaxun siyəyinə haq'əsít'oğoy say 62 700 taney.

40 Aşeri nəsiləxun q'a saal q'a yəşəxun ala bakala, davina tayeres bakala bito işq'arxoy s'iyurxo içoğoy əsilə saal ailinə görə soğə-soğə siyəyinəne haq'əsi.

41 Aşeri tayfinaxun siyəyinə haq'əsít'oğoy say 41 500 taney.

42 Naft'alin nəsiləxun q'a saal q'a yəşəxun ala bakala, davina tayeres bakala bito işq'arxoy s'iyurxo içoğoy əsilə saal ailinə görə soğə-soğə siyəyinəne haq'əsi.

43 Naft'alin tayfinaxun siyəyinə haq'əsít'oğoy say 53 400 taney.

44 Metərluğen, Moiseyen, Aaronen saal israil-luğoy boşt'an c'ək'əsi, içoğoy ailoğoy kalo bakala p'as's'e işq'aren me amdarxone siyəyinə haq'i.

45 İsrailluğoxun içoğoy ailoğə görə davina tayeres bakala, q'a saal q'a yəşəxun ala siyəyinə haq'əsi

46 bito işq'arxoy say 603 550 taney.

47 Ama Levin tayfinaxun bakalorox siyəyinə tet'un haq'əsi,

48 şot'aynak' ki, Q'ONČuğon Moiseya peney:

49 «Levin tayfinaxun bakalt'oğə israilluğoxun sagala me siyəyinə hamaq'a.

50 Şot'oğə irəzilügi çadıra saal şot'ay boş q'ulluğbseynak' lazım bakala bütüm ət't'əcxo bəğsuna tapşurba. Barta vən ef ganu badalbat'an irəzilügi çadıra saal şot'ay bütüm şeyurxo şot'oğonq'at'un taşeri. Çadıra şot'oğon

bəğalat'un, içoğoy çurk'ala ganuval çadıri hərrəmineq'at'un düzbi.

⁵¹ Çadıra sa ganuxun t'iyəmi ganu taşat'an barta leviğonq'an şot'o t'at'api, çadıra girbsunal şot'oğə tapşurba. Kot'oğoxun başq'a çadıra işalayınşakala amdar biyalane.

⁵² Barta israilluğon dəst'oğə cöybakiq'at'un içoğoy çurk'ala ganu düzbi, içoğoy mani tayfinaxun baksuna ak'est'ala nişana laxsunal eyexun maq'at'un c'evk'i. Hər işq'ar iz dəst'inəq'an baki.

⁵³ Leviğon isə içoğoy çurk'ala ganu irəzilügi çadıri hərrəmineq'at'un düzbi, şot'o görə ki, çadıra şot'oğon bəğalat'un. Tene İzi əyitəxun c'eyşuna görə Q'ONÇuğoy əcuğ israilluğoy loxol barale».

⁵⁴ İsrailluğonal mot'oğə bitova Q'ONÇuğon Moiseya pi k'inək' bit'un.

2

Dəst'oğoy çurk'ala ga düzbsuni yön

¹ Q'ONÇuğon Moiseya q'a Aarona pine:

² «Barta İvel çadır biyexq'an baki, israilluğon isə içoğoy çurk'ala ganu şot'ay hərrəmineq'at'un düzbi: hər soğə iz dəst'in boş. İçoğoy mani dəst'inəxun saal ailinəxun baksuna ak'est'ala nişana laxsunal eyexun maq'at'un c'evk'i.

³ İuday dəst'ə bəğ c'əğalaç tərəfq'an baki, dəst'in izi nişanal bakeq'an. İuday tayfin kalo isə Amminadavi ğar Naxşonq'an baki.

⁴ İuday tayfinaxun siyəyinə haq'əsi işq'arxoy say 74 600 tane.

⁵ İssak'ari tayfinenal me dəst'in boş, İuday tayfin t'öğölq'an iz çurk'ala ganu düzbi. İzi kalo isə Şuari ğar Net'anelq'an baki.

⁶ İssak'ari tayfinaxun siyəyinə haq'əsi işq'arxoy say 54 400 tane.

⁷ Zevuluni tayfal mot'oğoy boş, İssak'ari tayfin t'öğölq'an baki. Me tayfin kalo isə Xeloni ğar Eliavq'an baki.

⁸ Zevuluni tayfinaxun siyəyinə haq'əsi işq'arxoy say 57 400 tane.

⁹ Metərluĝen, İuday dəst'inə 186 400 tane bu. Yaq' c'eĝat'an me dəst'ə bəş taĝale.

¹⁰ Ruveni dəst'ə güney tərəfq'an baki, dəst'in izi nişanal bakeq'an. Tayfin kalo isə Şedeuri ğar Elişurq'an baki.

¹¹ Ruveni tayfinaxun siyəyinə haq'əsi işq'arxoy say 46 500 tane.

¹² Simeoni tayfinenal iz çurk'ala ganu me dəst'in boş, Ruveni dəst'in t'öğölq'an düzbi. İzi kalo isə Şurişaddayi ğar Şelumielq'an baki.

¹³ Simeoni tayfinaxun siyəyinə haq'əsi işq'arxoy say 59 300 tane.

¹⁴ Gade tayfal mot'oğoy boş, Simeoni tayfin t'öğölq'an baki. Me tayfin kalo isə Deueli ğar Elyasafq'an baki.

¹⁵ Gade tayfinaxun siyəyinə haq'əsi işq'arxoy say 45 650 tane.

¹⁶ Metərluĝen, Ruveni dəst'inə bito sagala 151 450 tane bu. Yaq' c'eĝat'an me dəst'ə İuday

dəst'in bač'anexun tağale.

¹⁷ Yaq' c'eğat'an İvel çadıra Levin tayfinenq'an taşeri. Şorox tayfogoy arane, biyexq'at'un taşi. Barta bito içogoy çurk'ala ganu mani q'aydinent'un çurpeysa, hat'e q'aydinenq'at'un yaq' taşi: hər soğoz iz dəst'in boş. Hər dəst'in içü c'ək'p'est'ala nişanal bakeq'an.

¹⁸ Efraimi dəst'ə bəğ batk'alaç tərəfq'an baki, dəst'in izi nişanal bakeq'an. Efraimi dəst'in kalo isə Ammihudi ğar Elişamaq'an baki.

¹⁹ Me tayfinaxun siyəyinə haq'əsi işq'arxoy say 40 500 tane.

²⁰ Menaşşeni tayfinen me dəst'in boş, Efraimi tayfin t'öğölq'an iz çurk'ala ganu düzbi. Tayfin kalo isə P'edahşuri ğar Gamlielq'an baki.

²¹ Menaşşeni tayfinaxun siyəyinə haq'əsi işq'arxoy say 32 200 tane.

²² Binyamini tayfal mot'oğoy boş Menaşşeni tayfin t'öğölq'an baki. Me tayfin kalo isə Gideoni ğar Avidanq'an baki.

²³ Binyamini tayfinaxun siyəyinə haq'əsi işq'arxoy say 35 400 tane.

²⁴ Metərluğen, Efraimi dəst'inə bito sagala 108 100 tane bu. Yaq' c'eğat'an xibimci şorox tağale.

²⁵ Dane dəst'ə q'uzey tərəfq'an baki, dəst'in izi nişanal bakeq'an. İzi kalo isə Ammişaddayi ğar Axiezerq'an baki.

²⁶ Dane tayfinaxun siyəyinə haq'əsi işq'arxoy say 62 700 tane.

²⁷ Aşeri tayfinen me dəst'in boş, Dane tayfin t'öğölq'an iz çurk'ala ganu düzbi. Tayfin kalo isə Ok'rani ğar P'agielq'an baki.

²⁸ Aşeri tayfinaxun siyəyinə haq'eşi işq'arxoy say 41 500 tane.

²⁹ Naft'alın tayfal mot'oğoy boş, Aşeri tayfin t'öğölq'an baki. Me tayfin kalo isə Enani ğar Axıraq'an baki.

³⁰ Naft'alın tayfinaxun siyəyinə haq'eşi işq'arxoy say 53 400 tane.

³¹ Metərluğen, Dane dəst'inə bito sagala 157 600 tane bu. Yaq' c'eğat'an barta me dəst'ə axırcıq'an taşi. İz loxol içoğə c'ək'p'est'ala nişanal bakeq'an».

³² Hametər, israilluğoxun içoğoy ailoğə görə siyəyinə haq'eşiyorox moroxe. Tayfoğə cöybaki dəst'oğoy boş bakalorox bito sagala 603 550 taney.

³³ Leviyox isə Q'ONČuğon Moiseya pi k'inək' israilluğoxun sagala me siyəyinə tet'un haq'eşey.

³⁴ İsrailuğon içoğoy çurk'ala ganu düzbsuni yönəl, yaq' c'eğat'an taysuni yönəl Q'ONČuğon Moiseya pi q'aydinen bit'un. Hər soğə iz əsiləxun, iz ailinəxun bakalt'oğoxun sagalaney, hər dəst'inal izi nişane buy.

3

Q'ončuğoy leviğə tapşurbi əş

¹ Q'ONČuğon Sinay buruğə Moiseyaxun exlətp'ala vədine Aaroni q'a Moiseyi nəsili boş bakalorox moroxey.

² Aaroni süft'in ğar bakala Nadav, oşa Avihu, Eleazar saal İt'amar. *

* 3:2 3:2 Ams'i oç. 26:60

3 Mo Aaroni ğarmoğoy s'iyurxone, Moiseyen şot'oğō c'əyin ləəmdi Buxaçuğoynak' bəyinşluğbseynek'e laxey.

4 Ama Nadav q'a Avihu Sinay ams'i oçala Q'ONČuĞoynak' q'urban eçat'an aruğō Şot'ay laxi q'aydinen tet'un bey, şot'aynak'al hat'e dayğa p'uret'unıy. Şorox biyat'an içoğoxun oşa nəsilə davambaloroxal buteney. Metərluğen, saycə Eleazaren q'a İt'amarene bəyinşluğbi. Şot'oğōn bəyinşluğa burqat'an içoğoy bava Aaron dirist'ey. †

5 Q'ONČuĞōn Moiseya pine:

6 «Leviğō bəyinş Aaroni kiin oq'a əşpseynek' laxa ki, şot'in q'ulluğbat'an iz t'ōğōl baki şot'o kōməybeq'at'un.

7 Barta şot'oğōn İvel çadıra Aaroni q'a bütüm israilluğoy gala q'ulluğbi t'iya bakala əşurxost'a kōməybeq'at'un.

8 Metər, şot'oğōn bütüm israilluğoy gala q'ulluğbi İvel çadıri şeymoğō bəğalat'un, t'iya bakala bütüm əşurxost'a kōməybalat'un.

9 Leviyox Aaroni q'a şot'ay ğarmoğoy kiin oq'a əşp'alat'un, şorox israilluğoy tayfoğoy boşt'an mot'aynak't'un c'ək'eşi şot'oğō tam həsrbaki.

10 Aarona q'a iz ğarmoğō isə bəyinşluğbseynek' laxa. Mot'oğoxun q'erəz İvel ganu İşalayınşakala amdar biyalane».

11 Oşa Q'ONČuĞōn saal Moiseya pine:

12 «Zu leviğō israilluğoy boş nanaxun baki bito süft'in ğar əyloğoy galaz ext'i. Şot'oğō bito israilluğoy tayfoğoy boşt'an c'ək'p'i Beziz bi,

† 3:4 3:4 Lev. 10:1-2; Ams'i oç. 26:61

13 şot'aynak' ki, bito süft'in nanaxun bakiy-
orox Bezine. Zu Misirə bütüm süft'in nanaxun
bakit'oğö k'as'k'at'an israilluğoy süft'in nanaxun
bakit'oğö c'ək'espi, şot'oğö Beziz bi: ham am-
darxoy boşt'an, ham heyvanxoy boşt'an. Şorox
Bezine - Q'ONÇux Zuzu».

14 Q'ONÇuĞon Sinay ams'i oçala Moiseya
metərəl pine:

15 «Levin tayfinaxun bakalt'oğö içoğoy əsilə q'a
ailinə görə siyəyinə haq'a. Siyəyinə sa xaşaxun
ala bakala bütüm ğar əyloğö q'a işq'arxo haq'a».

16 Moiseyenal Q'ONÇuĞon içü əmirbi k'inək'
Levin tayfinaxun bakalt'oğö siyəyinəne haq'i.

17 Levin ğarmux moroxey: Gerşon, K'ohat' saal
Merari.

18 Gerşonaxun bakiyoro: Livni q'a Şimey.

19 K'ohat'axun bakiyoro: Amram, Yişar,
Xevron saal Uzziel.

20 Merarinaxun bakiyoro: Maxli q'a Muşi.

Metərлуğen, leviyo uk'ala tayfa mot'oğoxune
əmələ hare.

21 Gerşonaxun Livni q'a Şimeye bakey.
Mot'oğoxun əmələ hari Gerşoni nəsilə boş

22 7 500 tan siyəyinəne haq'əsi. Mo sa xaşaxun
ala bakala ğar əyloğoy q'a işq'arxo sayey.

23 Gerşoni nəsiləxun bakalt'oğon içoğoy
çurk'ala ganu İvel çadıri baç'ane, bəğ batk'alaç
tərəf düzbalat'uniy.

24 Me nəsiləxun bakalt'oğoy kalo Laeli ğar
Elyasafey.

25 İvel çadıra Gerşoni nəsiləxun bakalt'oğoy əş money: çadıri looxun but'eğala xib q'atal bəğsun, çadıri bağala gala bakala pərdinə bəğsun saal

26 çadır q'a q'urban eçala ga bakala məəlin pərdəğə q'a iz bağala gane pərdinə bəğsun. Məəlin pərdəğoy kəndürxo q'a mandi ət't'əcxoval şot'oğont'un bəğsay.

27 K'ohat'axun Amram, İşhar, Xevron saal Uzziəle bakey. Mot'oğoxun əmələ hari K'ohat'i nəsiləxun

28 8 600 tane siyəyinə haq'əsi. Mo sa xaşaxun ala bakala ğar əyloğoy q'a işq'arxoy sayey. Şot'oğoy əş İvel gala bakala ən İvel şeymoğə bəğsuney.

29 K'ohat'i nəsiləxun bakalt'oğon içəğoy çurk'ala ganu İvel çadıri güney tərəf düzbalat'uniy.

30 Me nəsiləxun bakalt'oğoy kalo Uzzieli ğar Elisafaney.

31 Şot'oğoy əş İvel sanduğa, ist'ola, pisosa, q'urban eçala ganxo q'a İvel çadıra əşəğala bütüm ət't'əcxə bəğsuney. İvel ganu ən İvel ganuxun cöybala pərdinəl K'ohat'i nəsiləxun bakalt'oğone bəğsay. Me şeyurxo bəğseynak' bakala bütüm eşurxo şot'oğont'un biq'say.

32 Bütüm Levin tayfinaxun bakalt'oğoy kalo isə bəyinş Aaroni ğar Eleazarey. Me İvel ganu bəğala amdarxo bitə şot'ay kiin oq'ane əşbsay.

33 Merarinaxun Maxlin q'a Muşine bakey.

Mot'oğoxun əmələ hari Merarin nəsiləxun

³⁴ 6 200 tane siyəyinə haq'əsi. Mo sa xaşaxun ala bakala ğar əyloğoy q'a işq'arxoy sayey.

³⁵ Me nəsiləxun bakalt'oğoy kalo Avixayili ğar Şuriele baki. Şot'oğon içoğoy çurk'ala ganu İvel çadıri q'uzey tərəf düzbalat'uniy.

³⁶ Merarin nəsiləxun bakalt'oğon İvel çadıri çərçüvoğ, peşt'uvaxo, sütünxo q'a şot'oğox laxala ganxo saal mot'oğoy bütüm ət'təcxo bəğalat'uniy. Me şeyurxo bəğseyinak' bakala bütüm əşurxo şot'oğont'un biq'say.

³⁷ Çadıri məəlin sütünxo q'a şot'oğox laxala ganxo, şot'oğoy mixçoğox q'a kəndürxoval şot'oğont'un bəğsay.

³⁸ İvel çadıri bəş, bəğ c'əğala tərəf isə Moiseyen, Aaronen saal iz ğarmogont'un çurk'ala ga düzbsay. Şot'oğont'un İvel çadıra bütüm israiluğoy gala q'ulluğbi t'iyana bəğsay. Mot'oğoxun q'erəz İvel ganu İşalayınşakala amdar biyalaney.

³⁹ Metərluğen, Moiseyen q'a Aaronen Q'ONÇuğoy əmiren siyəyinə haq'i bütüm Levin tayfinaxun bakalt'oğoy say 22 000 taney. Mo sa xaşin saal kot'oxun ala bakala bütüm ğar əyloğoy q'a işq'arxoy sayey.

⁴⁰ Q'ONÇuğon Moiseya peney: «İsrailluğoxun sa xaşin saal kot'oxun ala bakala bütüm ğar əyloğox q'a işq'arxo siyəyinə haq'i içoğoy s'iyurxo şampa.

41 İsrailuğoy süft'in nanaxun baki ğar əyloğoy gala leviğoy, heyvanxoy süft'in ərkəy baloğoy gala isə leviğoy heyvanxoy baloğoy Zaynak' cöyba. Q'ONÇux Zuzu».

42 Moiseyenal Q'ONÇuĞon içü pi k'inək' bine: israiluğoy boş bütüm süft'in nanaxun baki ğar əyloğoy q'a işq'arxo siyəyinəne haq'i.

43 S'iya şampi siyəyinə haq'eşi sa xəşin saal kot'oxun ala bakala bütüm süft'in nanaxun baki ğar əyloğoy q'a işq'arxoy say 22 273 taney.

44 Q'ONÇuĞon Moiseya peney:

45 «İsrailuğoy süft'in ğarmoğoy gala leviğoy, içoğoy heyvanxoy süft'in ərkəy baloğoy gala isə leviğoy heyvanxoy süft'in ərkəy baloğoy cöyba. Leviyox Bezi bakale - Q'ONÇux Zuzu.

46-47 İsrailuğoy süft'in nanaxun baki ğarmux leviğoxun 273 tan gelene. Şot'oğoy hərt'ay gala isə içoğoxun İvel gane şək'elen qo şək'el[‡] ext'a, İvel gane 1 şək'el q'a gere.

48 Me tənğə leviğoxun 273 tan avuz bakala israiluğoy toye. Tənginə Aarona q'a iz ğarmoğoy tada».

49 Metərluğen, Moiseyen leviğoy sayaxun avuz bakala israiluğoxun içoğoy gala tadeğala tənğinə girebi,

50 moval İvel gane şək'elen 1 365 şək'el gümüşə bi.

51 Moiseyenal Q'ONÇuĞon içü əmirbi pi k'inək' me tənğinə Aarona q'a şot'ay ğarmoğone tadi.

‡ 3:46-47 3:46-47 şək'el - sa şək'el təxminən 11 gram gümüşey

4

Q'onçuğoy K'ohat'i nəsilə tapşurbi əş

¹ Q'ONČUĞON Moiseya q'a Aarona pine:

² «Leviğoy boş K'ohat'i nəsiləxun bakala işq'arxo içogoy ailoğoy q'a əsilə görə siyəyinə haq'anən.

³ Siyəyinə otuz yəşəxun əlli yəşəl şirik', İvel çadıra q'ulluğbi kōməybes bakala işq'arxoq'an haq'əsi.

⁴ İvel çadiri ganu badalbat'an K'ohat'i nəsiləxun bakalt'oğoy əş mone: çadiri ən İvel şeymoğoy bəğsun.

⁵ Ama yaq' c'eğat'an barta Aaronen q'a iz ğarmoğonq'at'un İvel ganu ən İvel ganuxun cōybala pərdinə c'evk'i şot'in irəziluği sanduği looxun but'k'i.

⁶ Oşa şot'ay looxun nəzik' t'olaxun düzbaki pərdinen, axırda isə saya göyün irəngen bakala pərdinenq'at'un but'k'i. Sanduğa taşt'eynak' bakala durutxoval şot'oğonq'at'un iz gala badi.

⁷ Q'ONČUĞOHƏSRBaki şumurxo laxseynak' bakala ist'olin loxol göyün irəngen parçinenal şot'oğonq'at'un but'k'i. Oşa iz loxol t'alik'xo, q'avurxo saal şik'ala payurxoynak' bakala cürdəkxo q'a camurxoq'at'un laxi. İst'olin loxol bakala Q'ONČUĞOHƏSRBaki şumurxoval laxeq'at'un, şoval həmişə iz gala mandeq'an.

⁸ Mot'oğoy bitot'ay looxun tünd č'oç'a irəngen sa parça lap't'i, çoyexunal nəzik' t'olaxun düzbaki pərdinenq'at'un but'k'i. İst'ola taşt'eynak' bakala durutxoval şot'oğonq'at'un iz gala badi.

9 Şot'oğon pisosi q'a iz çirağxoy, maşoğoy, xətəngəzxoy saal çirağa bapseyrak' bakala c'əyini q'avurxoyal bitot'ay loxol göyün irəngen parça lap't'alat'un.

10 Oşa isə pisosi q'a iz ət't'əcxoy loxolxun nəzik' t'olen but'k'i taşt'eyrak'q'at'un həzirbi.

11 Q'ızılaxun bakala q'urban eçala gane loxolal göyün parça lap't'i oşa nəzik' t'olen but'k'eq'at'un. Q'urban eçala ganu taşt'eyrak' bakala durutxoal iz gala badeq'at'un.

12 İvel gala q'ulluğbseyrak' əşəğala bütüm şeyurxo ext'i süft'ə göyün parçinen, iz looxun isə nəzik' t'olen but'k'i taşt'eyrak' həzirbeq'at'un.

13 Misnə q'urban eçala ganeyal jeq'a ext'i iz loxol mumuşak'i irəngen parçaq'at'un lap't'i.

14 Oşa iz loxol izi bütüm ət't'əcxo - jeq'e q'avurxo, ist'amxo, ləənxo, çəngəlxo, xətəngəzxo laxi nəzik' t'olen but'k'eq'at'un. Q'urban eçala ganu taşt'eyrak' bakala durutxoal şot'oğonq'at'un iz gala badi.

15 İsrailuğon içoğoy ganu badalbat'an Aaronen q'a iz ğarmoğon bütüm me İvel şeyurxoy looxun but'k'it'uxun oşa, barta K'ohat'i nəsiləxun bakalt'oğonq'at'un hari şot'oğoy taşeri. Ama şot'oğoy kul me şeyurxo nu laft'alane, tene biyalt'un. Metərлуğen, İvel çadıri ət't'əcxoxun K'ohat'i nəsiləxun bakalt'oğoy taşəlorox morox bakale.

16 Bəyins Aaroni ğar Eleazari əş pisoseyrak' bakala c'əyinə, bok'ospseyrak' bakala şaat' adeğala oyurxo, hər ği eçala taxılı paya saal

lăəmst'eynak' bakala c'əyinə bəğsun bakale. Şot'in İvel çadıra saal iz boş bakala hər şeyə - İvel şeymoğə q'a İvel ət't'əcxə bəğəlane».

¹⁷ Q'ONÇUĞON Moiseya q'a Aarona pine:

¹⁸ «Ama bəğənan ki, K'ohat'i nəsil Levin tayfı-naxun maq'an əfçibaki.

¹⁹ Kot'aynak'al şot'oğoy İvel gala me şeyurxo taşt'eynak' İşalayınşakat'an nu biseynak', barta Aaronen q'a iz ğarmoğonq'at'un hari me şeyurxo taşəri.

²⁰ K'ohat'i nəsiləxun bakalt'oğon İvel gala başı mot'oğoy saycət'u piin t'öğənal bakayın nu ak'alat'un, tene biyalt'un».

Q'onçuğoy Gerşoni nəsilə tapşurbi əş

²¹ Q'ONÇUĞON Moiseya metərə pi:

²² «Gerşoni nəsiləxun bakala işq'arxoval içoğoy ailoğə q'a əsilə görə siyəyinə haq'a.

²³ Siyəyinə otuz yəşəxun əlli yəşəl şirik', İvel çadıra q'ulluğbi köməybes bakala işq'arxoq'an haq'əsi.

²⁴ İsrailuğon içoğoy ganu badalbat'an Gerşoni nəsiləxun bakalt'oğon çadıri me şeyurxo taşalt'un:

²⁵ İvel, yəni Q'ONÇUĞOXUN exlətpseynak' bakala çadıra q'a iz looxun zap'əsi p'ə q'at çoya, şot'oğoy loxolxun eğala nəzik' t'olaxun düzbaki çoya, çadıri bağala gane pərdinə saal

²⁶ çadır q'a q'urban eçala ga bakala məəlin pərdoğə q'a iz bağala gane pərdinə. Məəlin pərdoğoy kəndürxo q'a mandi ət't'əcxoval şot'oğon bəğəlat'un. Barta me

şeyurxo taşt'unast'a lazım bakala bito eşlə şot'oğonq'at'un biq'i.

²⁷ Şot'oğoy me şeyurxo taşt'unast'a bala bito eşlə Aaronen q'a iz ğarmogon bēğalt'un. Şot'oğoy me eşlə vën tapşurbalnan, şot'oğon isə balt'un.

²⁸ Metərluğen, İvel çadıra taşat'an Gerşoni nəsiləxun bakalt'oğoy eş mo bakale, şot'oğonal bitot'in bēyinş Aaroni ğar İt'amari kiin oq'a eşp'alt'un».

Q'onçuğoy Merarin nəsilə tapşurbi eş

²⁹ «Merarin nəsiləxun bakala işq'arxoval içoğoy ailoğoy q'a əsilə görə siyəyinə haq'a.

³⁰ Siyəyinə otuz yəşəxun əlli yəşəl şirik', İvel çadıra q'ulluğbi köməybes bakala işq'arxoq'an haq'əsi.

³¹ İvel çadıri ganu badalbat'an Merarin nəsiləxun bakalt'oğon me şeyurxo taşalt'un: çadıri çərçivoğoy, peşt'uvaxo, sütünxo q'a şot'oğoy laxala ganxo,

³² çadıri məəlin sütünxo q'a şot'oğoy laxala ganxo, mixçoğoy, kəndürxo saal bütüm lazım bakala ət't'əcxo q'a əslaatxo. Hər amdara cöy-cöy iz biq'ala eşlə ak'est'a.

³³ Metərluğen, İvel çadıra taşat'an Merarin nəsiləxun bakalt'oğoy eş mo bakale, şot'oğonal bitot'in bēyinş Aaroni ğar İt'amari kiin oq'a eşp'alt'un».

Leviğoy siyəyinə haq'esun

³⁴ Hametər, Moiseyen, Aaronen saal israiluğoy boşt'an c'ək'əsi ağsaq'q'alxon K'ohat'i nəsiləxun

bakala işq'arxo içoğoy ailoğō q'a əsilə görə siyəyinət'un haq'i.

³⁵ Otuz yəşəxun əlli yəşəl şirik', İvel çadıra q'ulluğbi köməybes bakala,

³⁶ içoğoy əsilə görə siyəyinə haq'əsi işq'arxoy say 2 750 taney.

³⁷ Mo K'ohat'i nəsiləxun İvel çadıra q'ulluğbi köməybes bakala bito işq'arxoy sayey. Moiseyen Q'ONÇUĞON İçu pi k'inək'e Aaronaxun sagala şot'oğō siyəyinə haq'i.

³⁸ Gerşoni nəsiləxun bakala işq'arxoval içoğoy ailoğō q'a əsilə görə siyəyinət'un haq'əsi.

³⁹ Otuz yəşəxun əlli yəşəl şirik', İvel çadıra q'ulluğbi köməybes bakala,

⁴⁰ içoğoy əsilə görə siyəyinə haq'əsi işq'arxoy say 2 630 taney.

⁴¹ Mo Gerşoni nəsiləxun İvel çadıra q'ulluğbi köməybes bakala bito işq'arxoy sayey. Moiseyen Q'ONÇUĞON İçu pi k'inək'e Aaronaxun sagala şot'oğō siyəyinə haq'i.

⁴² Merarin nəsiləxun bakala işq'arxoval içoğoy ailoğō q'a əsilə görə siyəyinət'un haq'əsi.

⁴³ Otuz yəşəxun əlli yəşəl şirik', İvel çadıra q'ulluğbi köməybes bakala,

⁴⁴ içoğoy əsilə görə siyəyinə haq'əsi işq'arxoy say 3 200 taney.

⁴⁵ Mo Merarin nəsiləxun İvel çadıra q'ulluğbi köməybes bakala bito işq'arxoy sayey. Q'ONÇUĞON Moiseya pi k'inək'əl Moiseyen q'a Aaronen şot'oğō siyəyinət'un haq'i.

⁴⁶ Metərлуğen, Moiseyen, Aaronen saal is-railluğoy boşt'an c'ək'əsi ağsaq'q'alxon bütüm

leviço içoğoy ailoğō q'a əsilə görə siyəyinət'un haq'i.

⁴⁷ Siyəyinə haq'eşi otuz yəşəxun əlli yəşəl şirik', ivel çadıra q'ulluğbi köməybes q'a yük təşes bakala

⁴⁸ işq'arxoy say bito sagala 8 580 taney.

⁴⁹ Mot'oğoy bitot'uval Q'ONÇuĞon Moiseya pi k'inək' içoğoy əslə ak'est'undi, hərt'in iz taşala şeyə avaney.

Şorox Q'ONÇuĞon Moiseya pi k'inək't'un siyəyinə haq'eşey.

5

Q'ONÇux bakala ganu pak efi nu murdarlay-inşbsuni barada

¹ Q'ONÇuĞon Moiseya pine:

² «İsrailluğō əmirba ki, içoğoy arane c'ovakala t'ole azar bakalorox, içoğost'a p'i taysun nəəl yaroğon xe c'epsun bakalorox, içoğoy kul meydə laft'i murdarlayinşakiyorox nu bakalane. Şorox pak bakamin vəxun əxil mandalat'un.

³ Metər bakala çuresa işq'ari, çuresa çuğoy ef çurk'ala ganuxun tura bot'anan. Şot'oğon ef çurk'ala ganu nu murdarlayinşalat'un. Şot'o görə ki, Zuval ef aranezu».

⁴ İsrailluğon hametərəl bit'un. Şot'oğon Q'ONÇuĞon Moiseya pi k'inək' metər əmdarxo pak bakamin içoğoy çurk'ala ganuxun əxilt'un bsay.

*Laft'i zərələ ödəyinşbsuni barada
(Lev. 6:1-7)*

⁵ Q'ONÇUĞON Moiseya pine:

⁶ «İsrailluğō upa: "Əgər sunt'in - çuresa işq'ar, çuresa çuux - t'iyəmint'u ziyan tast'unen Q'ONÇUĞOY laxi k'anunaxun c'eri günax əşp'est'ayin, me amdar taxsırkəre.

⁷ Barta şot'in iz günaxa ozane ext'i qo paye sunt'uval iz loxol laxi laft'i ziyana ödəyinşeq'an.

⁸ Ama əgər ziyan zapi amdar p'urenesa, zərələ ödəyinşbseynak' q'erəz İša q'oomal butet'uxsa, t'e vədə zapi zərələ bəyinša tast'unen Q'ONÇUĞO ödəyinşinan baksa. Mot'o günaxa os'k'ala q'urbanluğ eğelaxun sagala bəyinşeynak' eçanan.

⁹ İsrailluğon bəyinşeynak' eçala bütüm İvel payurxo şot'aye baksa.

¹⁰ Bəyinşeynak' eçeriyorox bito bəyinşine baksa, şot'o tادیyorox şot'ost'al manest'a"».

Çuğoy xəyanətə çoyel c'evkseynak' bakala k'anun

¹¹ Q'ONÇUĞON Moiseya pine:

¹² «İsrailluğō upa: "Əgər sa çuğon günax əşp'est'i iz işq'ara xəyanətbenesa,

¹³ ama nə iz işq'aren, nə t'iyəmint'in şot'ay q'erəzt'uxun baksuna iz piin ak'İtenesa, me çuux p'urumal günaxa baft'ine baksa.

¹⁴ Ama əgər sa çuğon şuk'k'alaxun İşaluğbi tenesa, ama iz işq'aren q'ısq'ancluğbi p'urumal şot'oxun şüpələyinşebaksasa, t'e vədə barta günaxa əşp'est'it'ayal, nu əşp'est'it'ayal

¹⁵ işq'aren çuğō bəyinşi t'öğölq'an eçeri. Şot'in çuğoy s'iyal bəyinşeynak' efin * vis'

* 5:15 5:15 sa efa 22 lit'ir

payaxun sa paye hama xari eşt'unen taxılı pay eçalane. Me xarin loxol nə c'əyin, nəəl ladan † maq'an lapi, şot'aynak' ki, mo q'ısq'ancluği q'a xəyanəti çoyel c'eyşuna ak'est'ala paye.

16 Bəyinşen isə me çuğə Q'ONÇuğoy bəşq'an eçeri.

17 Barta şot'in sa saxsi q'ave boş İvel xe bapi oşa t'İya İvel çadıraxun ext'i k'ulq'an gərbi.

18 Bəyinşen çuğə Q'ONÇuğoy bəş çurdest'i şot'ay popa şarpeq'an, oşa q'ısq'ancluği q'a xəyanəti çoyel c'eyşuna ak'est'ala taxılı paya iz kiyelq'an tadi. Me vədine bəyinşi kiyel q'arğış şipest'ala k'ul gərbi xe bakalane.

19 Barta bəyinşen çuğə me şertenq'an q'arğışbi: əgər hun xəyanətbitenusa, təmiz mandi vi işq'araxun başq'a şuk'k'alaxun İşaluğbitenusa, barta me q'arğış şipest'ala xenen va zərəl maq'an tadi.

20 Ama əgər hun işq'ara baksunen q'erəz işq'araxun İşaluğbi günax əşp'est'enusa

21 - me əyitəxun oşa bəyinşen çuğə q'arğışbeq'an - barta vi əyel saksunen q'a əylə nu manst'unen Q'ONÇuğoy lənəti vi bel barst'una azuk'enal ak'eq'an.

22 Barta me q'arğış şipest'ala xe vi boş taşı vi tapana əyel sakala q'a əylə nu mandes bakalaq'an bi. Çuğon isə me əyitmoğoxun oşa "ammen, haketərəl beq'an!" peq'an.

23 Bəyinşen me q'arğışa şampi oşa me şama t'e k'ul gərbi xene boş os'k'i taşalane.

† 5:15 5:15 ladan - bok'ospseynak' bakala şaat' adeğala q'aribaki q'ir

24 Bëyinşen me xena çuğo üğëst'ale, me q'arğış şipest'ala xeyal çuğoy boş taşi şot'aynak' azar eçale.

25 Metərluğen, bëyinşen q'ısq'ancluğa görə eçeri taxılı paya çuğoy kiyelxun ext'i şot'o alabi Q'ONčuğoynak' baksuna ak'est'ale. Oşa q'urban eçala gane t'öğöl hari

26 t'e payaxun sa mǝxǝ xarina ext'i şot'ay loxol bok'osp'ale. Me bok'osp'akala sa mǝxǝ xarinen bütüm me paye Q'ONčuğoynak' baksuna ak'est'ale. Me vǝdine bëyinşen həzirbi xenal çuğo üğëst'ale.

27 Çuğon xena üğǝle. Üğit'uxun oşal əğər me çuğon həgigiyal günax əşp'est'i q'erəzt'uxun işalüğbenesa, t'e vǝdǝ me q'arğış şipest'ala xe şot'ay boş taşi şot'aynak' azar eçale. Şo nə əylǝ mandes, nə eçes tene bakal. Metərluğenal Q'ONčuğon şot'oxun İz çoya tarast'una dirist' azuk'en ak'ale.

28 Ama əğər çuğon günax əşp'est'itenesa, əğər şo tǝmizesa, t'e vǝdǝ me xenen şot'o hik'k'al tene bal. Bütümt'in şot'ay taxsırsuz baksuna ak'ale, şot'inal əyel eçes bakale.

29-30 Mo sa işq'ar iz çuğoxun şot'in günax əşp'est'iyal bakayın, nu əşp'est'iyal bakayın, q'ısq'ancluğbi şüpələyinşakat'an əməlbseynak' bakala k'anune. Barta bëyinşen metər çuğo Q'ONčuğoy bǝş çurdest'i hər şeyə me laxi k'anuna görə beq'an.

31 Çuğoy işq'ar me əşləst'a taxsırsuze, sal sa cazal zap'k'ala tene, çuğon iz əşp'est'i günaxi cazina için zap'k'ale».

6

İçu Q'ONÇuĞoynak' nəzir bit'aynak' bakala q'aydoox

¹ Q'ONÇuĞon Moiseya pine:

² «İsrailluğə metər upa: "Əgər sa işq'aren nəəl sa çuğon içü Buxaçuğə həsrbi, Şot'aynak' sa nəzir* baksunane əyit tast'asa,

³ t'e vədə barta me amdaren nə fi, nə q'erəz finağoybala üğün, nə fine oq'oy, nəəl q'erəz oq'oy iz jomo maq'an duği, lap t'ule xenal maq'an üği. Şot'in nə t'ula içü, nəəl şot'oxun düzbaki kişmişal nu ukalane. †

⁴ İçoğə Q'ONÇuĞonəzir bala vədine şot'oğon c'ap'en tadala me meyvin hik'k'alaxun nu ukalat'un. Mo lap t'ule s'ana q'a qöləl ayide.

⁵ İçoğə Q'ONÇuĞoynak'nəzirbala vədə çark'amin şot'oğon içoğoy popa nu k'as'k'alat'un. Me vədine şorox Q'ONÇuĞoy baksunen İvelt'un hesabbaksa, barta içoğoy popa boxoybeq'at'un.

⁶ Me vədine şorox meydəl maq'at'un İša biti.

⁷ Lap içoğoy bava nəəl nana, xunçi nəəl viçiyal biyayin, şot'oğə görə içoğoy İvel baksuna ak'est'ala popa nu murdarlayinşalat'un. Axırı me popen içoğoy Buxaçuğə həsr baksunane ak'est'a.

⁸ İçoğə Q'ONÇuĞonəzirbala me vədə çark'amin, şorox Q'ONÇuĞoye.

* **6:2 6:2** - Nəzir əyitin məənə "cöybaksun, həsrbaksun" upsune. Nəzir bakala amdaren izi nəzərbaksuna əyit tadi vaxt'al şirik' içü Buxaçuğə həsrbine baks. † **6:3 6:3** Luk'. 1:15

⁹ Əgər me amdari t'öğöl soğo bürdən biyayin, metərлуғenal şot'ay nəzir baksuna ak'est'ala popa murdarlayınşayin, t'e vədə barta şot'in vüğ ğinaxun oşa iz popa tumexun q'açıbest'eq'an. Me vüğ ği meyidə İsa bist'axun oşa p'urum pak baksuni vaxt'e.

¹⁰ Muğumci ğine isə İvel çadıri bağala gala hari bəyinşa p'ə giyə r nəəl p'ə göyərçinq'an tadi.

¹¹ Bəyinşen şot'oğoy sunt'u ğünaxxo os'kseynak' bakala q'urban k'inək', t'e sunt'u isə bok'ospsuni q'urban k'inək' şampeq'an ki, şot'oğoy p'iyen me amdari meyidi t'öğöl İsa bist'uni murdarlayınşaksuna os'k'i taşereq'an. Hat'e ği şot'ay pop p'urum İvel hesabbakale,

¹² şot'inal taxsıra os'k'ala q'urban k'inək' sa usenin ərkəy q'uzi şampi içü p'urum Q'ONÇUĞohəsrbes bakale. Ama mot'oxun bəş içü nəzir bi ğimxo hesabtenebakal, şot'aynak' ki şot'in içü murdarlayınşebi.

¹³ Amdari nəzir baksuni vaxt' çark'at'an, me q'aydoğ oq'an əməlbi. Barta şot'o İvel çadıri bağala galaq'at'un eçeri.

¹⁴ Barta şot'in t'iya Q'ONÇUĞoynak' bok'ospsuni q'urban k'inək' salamat sa usenin ərkəy q'uzi, ğünaxxo os'kseynak' bakala q'urban k'inək' salamat sa usenin dişi q'uzi saal serluği q'urban k'inək' sa salamat q'oçq'an eçeri.

¹⁵ Zənbili boş xuri berxeşi arumi xarinaxun zeytuni c'əyinen şareşi əyinsuz k'ok'alxo q'a iz loxol c'əyin ləəmdi k'ok'alxoval eçereq'an. Taxılı payurxo q'a şipseynak' bakala payurxo eşt'un al eyexun maq'an c'evk'i.

16 Bëyinşen isə mot'oğə Q'ONÇuğoy bəş eçale, günaxxo os'kseynak' bakala q'urbana q'a bok'ospsuni q'urbanal şamk'ale.

17 Oşa şot'in serluği q'urbana şampi taxılı payaxun q'a şipseynak' bakala payurxoxun sagala Q'ONÇuğoynak' eçeri bok'osp'ale. Şot'in əyinsuz k'ok'alxo bakala zənbiləl Q'ONÇuğoynak' pay k'inək' eçale.

18 Mot'oxun oşa içü Q'ONÇuğoynak'nəzir bi amdaren İvel çadıri bağala gane bəş iz popa tumexun q'açibi şot'o serluği q'urbani oq'a bok'ala aruğəq'an boseri.

19 İçü nəzir bi amdaren iz popa q'açibit'uxun oşa, barta bëyinşen ərkəy eğəlin ap'esp'i bəşin buda saal zənbiləxun c'əyinen şareşi əyinsuz sa k'ok'ala q'a c'əyin ləəmdi sa k'ok'ala ext'i mot'oğə bitova t'e amdari kiyelq'an tadi.

20 Bëyinşen mot'oğoy sa pay baksuna ak'est'eynak' Q'ONÇuğoy bəş alabalane. Me İvel payal Q'ONÇuğoy bəş alabaki q'urbani döşe yeq'axun sagala bëyinşi bakalane. Mot'oxun oşa içü nəzir bi amdaren fi uğəs banekon.

21 Metərлуğen, içü nəzir bi amdaren Q'ONÇuğoynak' me payurxo eçalane. Ama izi imkan bakalt'in mot'oxun avuzinal k'ənesa eçes banekon. Barta içü Q'ONÇuğonəzir balt'in izi əyit tadtit'oğoy bitova əməl beq'an". ‡

Bëyinşxoy xeyir-bərəkət tast'eynak' uk'ala əyitmux

22 Q'ONÇuğon Moiseya pine:

‡ 6:21 6:13-21 Ap'ost'. 21:23-24

23 «Aarona q'a iz ğarmoĝo metər upa: "İsrailluĝo me əyitmoĝon xeyir-bərəkət tadalanən:

24 Q'ONÇUĞON va xeyir-bərəkətq'an tadi, va q'orişeq'an!

25 Hun İz ük'e bask'avax, Şot'inal vaynak' ük' bok'osp'ane!

26 Barta Şot'in İz çoya vaxun maq'an taradi, vaynak' həmişə serluĝq'an eçeri!

27 Aaronen q'a iz ğarmoĝon Bez s'iya israil-luĝoynak' metər pi duĝalt'un, Zuval şot'oĝoxun Bezi xeyir-bərəkətə kam tezbəl"».

7

Kalat'oĝoy pay eşt'un

1 Moiseyen İvel çadıra laxit'uxun oşa şot'o içü saal iz boş bakala bütüm şeymoĝo İvelbseynak' şot'oĝo c'əyine ləəmdi. Q'urban eçala ganu q'a şot'ay bütüm ət't'əcxoval c'əyin ləəmdi İvelebi.

2 İsrailluĝoxun c'ək'eşi kalat'oĝonal - içoĝoy tayfoĝo q'a əsilə görə c'ək'eşi şot'oĝo siyəyinə haq'it'oĝon - Q'onçuĝoynak' payt'un eçeri.

3 Şot'oĝon üq dənə iz loxolxun but' araba saal p'as's'e öküz't'un Q'ONÇUĞOYNAK' pay eçeri: öküzxo hər tayfın s'iyen, araboĝo isə hər p'ə tayfın s'iyen. Mot'oĝo bitova İvel çadıri bəşt'un eçeri laxi.

4 Q'ONÇUĞON Moiseya metərə pi:

5 «Me paya kot'oĝoxun q'abulbi leviĝoy arane içoĝoy bala əslə görə cöyba ki, İvel çadıra q'ulluĝbat'an kot'oĝo əşp'est'eq'at'un».

⁶ Moiseyenal arabogo q'a öküzxo ext'i leviğo tanedi.

⁷ Gerşoni nəsiləxun bakalt'oğon içoğoy əslə biq'seynak' şot'oğə p'ə araba q'a bip' öküz,

⁸ Merarin nəsiləxun bakalt'oğə isə bip' araba q'a muğ öküzə tadi. Me amdarxonal bitot'in bəyinş Aaroni ğar İt'amari kiin oq'at'un əşbsay.

⁹ Ama K'ohat'i nəsiləxun bakalt'oğə Moiseyen me payaxun hik'k'al tene tadi, şot'o görə ki, şot'oğoy əş ən İvel şeymoğə taşt'uney. Me şeymoğə isə içoğoy əmnəbel taşalat'uniy.

¹⁰ Moiseyen q'urban eçala ganu İvelbseynak' şot'o c'əyin ləəmdit'uxun oşa israiluğoy boşt'an c'ək'eşi kalat'oğon t'e gane Q'ONÇuğoy baksuna ak'est'eynak' q'urbanxot'un eçeri.

¹¹ Şot'aynak' ki, Q'ONÇuğon Moiseya peney: «Barta q'urban eçala gane İvel baksuna ak'est'eynak' hər ği kalat'oğoxun sunt'in t'iya iz payaq'an eçeri».

¹² Süft'ə İuday tayfinaxun kalo c'ək'eşi Amminadavi ğar Naxşonene payurxo eçeri.

¹³ Şot'in eçeri payurxo moroxey: İvel gane şək'elen sabaç otuz şək'el* bİhiluğen bakala sa gümüşi sini q'a yetmiş şək'el bİhiluğen bakala sa gümüşi ləən (mot'oğoy p'öğəl taxılı payeynak' bakala zeytuni c'əyin lapi arumi xarinen buyey);

¹⁴ vis' şək'el bİhiluğen iz boş bok'ospseynak' bakala adeğala oyurxon buy sa q'ızılı kasa;

¹⁵ bok'ospsuni q'urbaneynak' sa arak', sa dənə q'oç eğel saal sa dənə sa usenin ərkəy q'uzi;

* 7:13 7:13 sa şək'el təxminən 11 gram

¹⁶ günaxxo os'kseynek' bakala q'urbaneynak' sa әrkәy keçi;

¹⁷ serluği q'urban eşt'eynak' p'ә dәнә öküз, qо dәнә q'oç eğel, qо dәнә әrkәy keçi saal qо dәнә sa usenin әrkәy q'uzi. Mo Amminadavi ğar Naxşoni eçeri payurxoney.

¹⁸ P'әмci ğine İssak'ari tayfinaxun kalo c'әk'eşi Śuari ğar Net'anelene payurxo eçeri.

¹⁹ Şot'in eçeri payurxo moroxey: İvel gane şek'elen sabaç otuz şek'el bīhiluğen bakala sa gümüşi sini q'a yetmiş şek'el bīhiluğen bakala sa gümüşi læn (mot'oğoy p'öğäl taxılı payeynak' bakala zeytuni c'әyin lapi arumi xarinen buyey);

²⁰ vis' şek'el bīhiluğen iz boş bok'ospseynak' bakala adeğala oyurxon buy sa q'ızılı kasa;

²¹ bok'ospsuni q'urbaneynak' sa arak', sa dәнә q'oç eğel saal sa dәнә sa usenin әrkәy q'uzi;

²² günaxxo os'kseynek' bakala q'urbaneynak' sa әrkәy keçi;

²³ serluği q'urban eşt'eynak' p'ә dәнә öküз, qо dәнә q'oç eğel, qо dәнә әrkәy keçi saal qо dәнә sa usenin әrkәy q'uzi. Mo Śuari ğar Net'aneli eçeri payurxoney.

²⁴ Xibimci ğine Zevuluni tayfinaxun kalo c'әk'eşi Xeloni ğar Eliavene payurxo eçeri.

²⁵ Şot'in eçeri payurxo moroxey: İvel gane şek'elen sabaç otuz şek'el bīhiluğen bakala sa gümüşi sini q'a yetmiş şek'el bīhiluğen bakala sa gümüşi læn (mot'oğoy p'öğäl taxılı payeynak' bakala zeytuni c'әyin lapi arumi xarinen buyey),

²⁶ vis' şek'el bīhiluğen iz boş bok'ospseynak' bakala adeğala oyurxon buy sa q'ızılı kasa;

²⁷ bok'ospsuni q'urbaneynak' sa arak', sa dənə q'oç eğel saal sa dənə sa usenin ərkəy q'uzi;

²⁸ günaxxo os'kseynak' bakala q'urbaneynak' sa ərkəy keçi;

²⁹ serluği q'urban eşt'eynak' p'ə dənə öküz, qo dənə q'oç eğel, qo dənə ərkəy keçi saal qo dənə sa usenin ərkəy q'uzi. Mo Xeloni ğar Eliaven eçeri payurxoney.

³⁰ Bip'imci ğine Ruveni tayfinaxun kalo c'ək'eşi Şedeuri ğar Elisurene payurxo eçeri.

³¹ Şot'in eçeri payurxo moroxey: İvel gane şək'elen sabaç otuz şək'el bîhiluğen bakala sa gümüşi sini q'a yetmiş şək'el bîhiluğen bakala sa gümüşi læn (mot'oğoy p'öğəl taxılı payeynak' bakala zeytuni c'əyin lapi arumi xarinen buyey);

³² vis' şək'el bîhiluğen iz boş bok'ospseynak' bakala adeğala oyurxon buy sa q'ızılı kasa;

³³ bok'ospsuni q'urbaneynak' sa arak', sa dənə q'oç eğel saal sa dənə sa usenin ərkəy q'uzi;

³⁴ günaxxo os'kseynak' bakala q'urbaneynak' sa ərkəy keçi;

³⁵ serluği q'urban eşt'eynak' p'ə dənə öküz, qo dənə q'oç eğel, qo dənə ərkəy keçi saal qo dənə sa usenin ərkəy q'uzi. Mo Şedeuri ğar Elisuren eçeri payurxoney.

³⁶ Qomci ğine Simeoni tayfinaxun kalo c'ək'eşi Şurişaddayi ğar Şelumielene payurxo eçeri.

³⁷ Şot'in eçeri payurxo moroxey: İvel gane şək'elen sabaç otuz şək'el bîhiluğen bakala sa gümüşi sini q'a yetmiş şək'el bîhiluğen bakala sa gümüşi læn (mot'oğoy p'öğəl taxılı payeynak' bakala zeytuni c'əyin lapi arumi xarinen buyey);

³⁸ vis' şek'el bîhiluğen iz boş bok'ospseynak' bakala adeğala oyurxon buy sa q'ızılı kasa;

³⁹ bok'ospsuni q'urbaneynak' sa arak', sa dənə q'oç eğel saal sa dənə sa usenin ərkəy q'uzi;

⁴⁰ günaxxo os'kseynak' bakala q'urbaneynak' sa ərkəy keçi;

⁴¹ serluği q'urban eşt'eynak' p'ə dənə öküz, qo dənə q'oç eğel, qo dənə ərkəy keçi saal qo dənə sa usenin ərkəy q'uzi. Mo Şurişaddayi ğar Şelumielen eçeri payurxoney.

⁴² Ŭqŭmci ğine Gade tayfinaxun kalo c'ək'eşi Deueli ğar Elyasafene payurxo eçeri.

⁴³ Şot'in eçeri payurxo moroxey: İvel gane şek'elen sabaç otuz şek'el bîhiluğen bakala sa gŭmŭşi sini q'a yetmiş şek'el bîhiluğen bakala sa gŭmŭşi læn (mot'oğoy p'öğəl taxılı payeynak' bakala zeytuni c'əyin lapi arumi xarinen buyey);

⁴⁴ vis' şek'el bîhiluğen iz boş bok'ospseynak' bakala adeğala oyurxon buy sa q'ızılı kasa;

⁴⁵ bok'ospsuni q'urbaneynak' sa arak', sa dənə q'oç eğel saal sa dənə sa usenin ərkəy q'uzi;

⁴⁶ günaxxo os'kseynak' bakala q'urbaneynak' sa ərkəy keçi;

⁴⁷ serluği q'urban eşt'eynak' p'ə dənə öküz, qo dənə q'oç eğel, qo dənə ərkəy keçi saal qo dənə sa usenin ərkəy q'uzi. Mo Deueli ğar Elyasafen eçeri payurxoney.

⁴⁸ Vŭğŭmci ğine Efraimi tayfinaxun kalo c'ək'eşi Ammihudi ğar Elişamanene payurxo eçeri.

⁴⁹ Şot'in eçeri payurxo moroxey: İvel gane şek'elen sabaç otuz şek'el bîhiluğen bakala sa

gümüşi sini q'a yetmiş şək'el bîhiluğen bakala sa gümüşi læn (mot'oğoy p'öğəl taxılı payeynak' bakala zeytuni c'əyin lapi arumi xarinen buyey);

⁵⁰ vis' şək'el bîhiluğen iz boş bok'ospseynak' bakala adeğala oyurxon buy sa q'ızılı kasa;

⁵¹ bok'ospsuni q'urbaneynak' sa arak', sa dənə q'oç eğel saal sa dənə sa usenin ərkəy q'uzi;

⁵² günaxxo os'kseynak' bakala q'urbaneynak' sa ərkəy keçi;

⁵³ serluği q'urban eşt'eynak' p'ə dənə öküz, qo dənə q'oç eğel, qo dənə ərkəy keçi saal qo dənə sa usenin ərkəy q'uzi. Mo Ammihudi ğar Elişaman eçeri payurxoney.

⁵⁴ Muğumci ğine Menaşşeni tayfinaxun kalo c'ək'eşi P'edahşuri ğar Gamlielene payurxo eçeri.

⁵⁵ Şot'in eçeri payurxo moroxey: İvel gane şək'elen sabaç otuz şək'el bîhiluğen bakala sa gümüşi sini q'a yetmiş şək'el bîhiluğen bakala sa gümüşi læn (mot'oğoy p'öğəl taxılı payeynak' bakala zeytuni c'əyin lapi arumi xarinen buyey);

⁵⁶ vis' şək'el bîhiluğen iz boş bok'ospseynak' bakala adeğala oyurxon buy sa q'ızılı kasa;

⁵⁷ bok'ospsuni q'urbaneynak' sa arak', sa dənə q'oç eğel saal sa dənə sa usenin ərkəy q'uzi;

⁵⁸ günaxxo os'kseynak' bakala q'urbaneynak' sa ərkəy keçi;

⁵⁹ serluği q'urban eşt'eynak' p'ə dənə öküz, qo dənə q'oç eğel, qo dənə ərkəy keçi saal qo dənə sa usenin ərkəy q'uzi. Mo P'edahşuri ğar Gamlielen eçeri payurxoney.

60 Vuyumci ğine Binyamini tayfinaxun kalo c'ək'eşi Gidoni ğar Avidanene payurxo eçeri.

61 Şot'in eçeri payurxo moroxey: İvel gane şek'elen sabaç otuz şek'el bİhiluĝen bakala sa gümüşi sini q'a yetmiş şek'el bİhiluĝen bakala sa gümüşi læn (mot'oĝoy p'öĝäl taxılı payeynak' bakala zeytuni c'əyin lapi arumi xarinen buyey);

62 vis' şek'el bİhiluĝen iz boş bok'ospseynak' bakala adeĝala oyurxon buy sa q'ızılı kasa;

63 bok'ospsuni q'urbaneynak' sa arak', sa dənə q'oç eĝel saal sa dənə sa usenin ərkəy q'uzi;

64 günaxxo os'kseynak' bakala q'urbaneynak' sa ərkəy keçi;

65 serluĝi q'urban eşt'eynak' p'ə dənə öküz, qo dənə q'oç eĝel, qo dənə ərkəy keçi saal qo dənə sa usenin ərkəy q'uzi. Mo Gidoni ğar Avidanen eçeri payurxoney.

66 Vis'imci ğine Dane tayfinaxun kalo c'ək'eşi Ammişaddayı ğar Axiezerene payurxo eçeri.

67 Şot'in eçeri payurxo moroxey: İvel gane şek'elen sabaç otuz şek'el bİhiluĝen bakala sa gümüşi sini q'a yetmiş şek'el bİhiluĝen bakala sa gümüşi læn (mot'oĝoy p'öĝäl taxılı payeynak' bakala zeytuni c'əyin lapi arumi xarinen buyey);

68 vis' şek'el bİhiluĝen iz boş bok'ospseynak' bakala adeĝala oyurxon buy sa q'ızılı kasa;

69 bok'ospsuni q'urbaneynak' sa arak', sa dənə q'oç eĝel saal sa dənə sa usenin ərkəy q'uzi;

70 günaxxo os'kseynak' bakala q'urbaneynak' sa ərkəy keçi;

71 serluĝi q'urban eşt'eynak' p'ə dənə öküz, qo dənə q'oç eĝel, qo dənə ərkəy keçi saal qo

dənə sa usenin ərkəy q'uzi. Mo Ammişaddayi
ğar Axiezeren eçeri payurxoney.

⁷² Sas's'emci ğine Aşeri tayfinaxun kalo c'ək'eşi
Ok'rani ğar P'agielene payurxo eçeri.

⁷³ Şot'in eçeri payurxo moroxey: İvel gane
şek'elen sabaç otuz şek'el bîhiluğen bakala sa
gümüşi sini q'a yetmiş şek'el bîhiluğen bakala
sa gümüşi læn (mot'oğoy p'öğəl taxılı payeynak'
bakala zeytuni c'əyin lapi arumi xarinen buyey);

⁷⁴ vis' şek'el bîhiluğen iz boş bok'ospseynak'
bakala adeğala oyurxon buy sa q'ızılı kasa;

⁷⁵ bok'ospsuni q'urbaneynak' sa arak', sa dənə
q'oç eğel saal sa dənə sa usenin ərkəy q'uzi;

⁷⁶ günaxxo os'kseynak' bakala q'urbaneynak'
sa ərkəy keçi;

⁷⁷ serluğı q'urban eşt'eynak' p'ə dənə öküz, qo
dənə q'oç eğel, qo dənə ərkəy keçi saal qo dənə
sa usenin ərkəy q'uzi. Mo Ok'rani ğar P'agielen
eçeri payurxoney.

⁷⁸ P'as's'emci ğine Naft'alın tayfinaxun kalo
c'ək'eşi Enani ğar Axirane payurxo eçeri.

⁷⁹ Şot'in eçeri payurxo moroxey: İvel gane
şek'elen sabaç otuz şek'el bîhiluğen bakala sa
gümüşi sini q'a yetmiş şek'el bîhiluğen bakala
sa gümüşi læn (mot'oğoy p'öğəl taxılı payeynak'
bakala zeytuni c'əyin lapi arumi xarinen buyey);

⁸⁰ vis' şek'el bîhiluğen iz boş bok'ospseynak'
bakala adeğala oyurxon buy sa q'ızılı kasa;

⁸¹ bok'ospsuni q'urbaneynak' sa arak', sa dənə
q'oç eğel saal sa dənə sa usenin ərkəy q'uzi;

⁸² günaxxo os'kseynak' bakala q'urbaneynak'
sa ərkəy keçi;

⁸³ serluği q'urban eşt'eynak' p'ə dənə öküz, qo dənə q'oç eğel, qo dənə ərkəy keçi saal qo dənə sa usenin ərkəy q'uzi. Mo Enani ğar Axiran eçeri payurxoney.

⁸⁴ Metərluğen, q'urban eçala ganu ləəmdit'uxun oşa şot'ay İvel baksuna ak'est'eynak' israilluğoy boşt'an c'ək'eşi kalat'oğon eçeri payurxo moroxey: p'as's'e gümüşi sini, pas's'e gümüşi ləən saal p'as's'e q'ızılı kasa.

⁸⁵ Hər gümüşi sinin bİhiluğ İvel gala bakala şək'ela görə sabaç otuz şək'el, hər gümüşi ləəni bİhiluğal yetmiş şək'eley. Bito ləənxoy q'a siniğoy bİhiluğ sagala isə p'ə hazar bip'baç şək'eley.

⁸⁶ Hər soğo İvel gane şək'elen vis' şək'el bakala qızılı kasoğoy bİhiluğ isə bito sagala sabaç q'a şək'eley (kasoox bok'ospseynak' bakala şaat' adeğala oyurxon buyey).

⁸⁷ Taxılı payaxun sagala eçala bok'ospsuni q'urbaneynak' p'as's'e dənə arak', p'as's'e dənə q'oç eğel, p'as's'e dənə sa usenin ərkəy q'uzi saal günaxxo os'kseynak' bakala q'urbaneynak' p'as's'e dənə ərkəy keçiyal eçeret'unıy.

⁸⁸ Serluği q'urbaneynak' isə bito sagala saq'o bip' dənə öküz, altmış q'oç eğel, altmış ərkəy keçi saal altmış dənə sa usenin ərkəy q'uzit'un eçerey. Q'urban eçala ganu ləəmdit'uxun oşa şot'ay İvel baksuna ak'est'eynak' eçeri payurxo moroxey.

⁸⁹ Moisey İvel çadıra Q'ONÇuĞoxun exlətpseynak' bağat'an, içuxun əyitk'ala səs irəziluği sanduği loxol bakala bağışlayınşbsuni

q'apağaxune† eysay. Me səs q'apaği loxol bakala p'ə angeli aranexun, Q'ONČuğoy bakala ganuxune eysay. Q'ONČuğon Moiseyaxun metərə exlətpsay.

8

Çırağxo laxsuni yön

¹ Q'ONČuğon Moiseya pine:

² «Arona metər upa: "Pisosi vüğ çırağa t'etər laxa ki, iz bəşq'at'un işiğ saki"».

³ Aaronenal Q'ONČuğon Moiseya əmirbi k'inək' bine: çırağxo pisosi loxol t'etərə laxi ki, şot'oğon bəşt'un işiğbsay.

⁴ Pisos isə dirist' q'ızılaxune t'ap'eşi düzbakey, iz turaxun burqi iz loxol bakala varde t'up'ulxol şirik'. Şot'o Q'ONČuğon Moiseya ak'est'i k'inək't'un düzbey. *

Leviğo içoğoy əşlə burqseynak' pakbsun

⁵ Q'ONČuğon Moiseya pine:

⁶ «İsrailluğoy aranexun leviğ cöybi şot'oğon pakba.

⁷ Şot'oğoy pak bakseynak' metər bsune lazım: pakbala xena içoğoy loxol çiləyinşa, barta içoğoy bel q'a loxol bakala popal xampi, içoğoy paltaral os'k'eq'at'un. Mot'oxun oşa şorox pak hesab-bakalt'un.

⁸ Mot'oxun oşa barta c'əyin lapi arumi xari-naxun bakala taxılı paya q'a şot'oxun sagala q'urban eçala arak'aq'at'un ext'i, hun isə günaxxo os'kseynak' şameğala arak'a ext'a.

† 7:89 7:89 C'eys. 25:17-22 * 8:4 8:1-4 C'eys. 25:31-40; 37:17-24

9 Leviğø ÿvel çadıri bēš eçeri, bütüm israil-luğoval girba.

10 Leviğø miya eçerit'uxun oşa israil-luğon içoğoy kulmoğø şot'oğoy loxol laxalat'un, †

11 Aaronenal şot'oğø israil-luğoxun bakala c'ək'eşi sa pay k'inək' Q'ONčuĞohəsrbalane ki, Şot'o q'ulluğbes bakat'un.

12 Leviğon içoğoy kulmoğø arak'xoy loxol laxit'uxun oşa me arak'xoy soğø bok'ospsuni q'urban, t'e soğø isə günaxxo os'kseynak' bakala q'urban k'inək' içoğoy s'iyen Q'ONčuĞoynak' şameğalane. Me q'urbanxo eşt'unenal Q'ONčuĞø q'ulluğbseynak' c'ək'eşi leviyox pakbaki bakalt'un.

13 Barta leviyox Aaroni q'a iz ğarmoğoy bēš çurpi c'ək'eşi sa pay k'inək' Q'ONčuĞoq'at'unhəsrbaki.

14 Metər, hun şot'oğø bütüm israil-luğoxun c'ək'p'i Bezi balnu.

15 Hun leviğø c'ək'eşi sa pay k'inək' Q'ONčuĞoynak' eçeri şot'oğø pakbit'uxun oşa şot'oğon ÿvel çadıra q'ulluğbes bat'unkon.

16 Şorox israil-luğoy boşt'an Zaynak' c'ək'eşiyoroxe. Zu şot'oğø israil-luğoy boş tapanexun c'eri k'ə süft'in ğar əyel nəəl süft'in ərkəy bala bunesa, şot'oğoy galaz ext'e.

17 İsrail-luğoy bito süft'in ğar əyluxal, içoğoy heyvanxoy süft'in ərkəy baloxal Bezine. Zu şot'oğø Misirə bito süft'in nanaxun baki

† 8:10 8:10 - Me hərəkəten leviğoy bütüm israil-luğoy süft'in nanaxun baki ğarmoğoy gala Q'ONčuĞø tadesunane ak'est'a.

ğarmoğ o əfçibala ğine Zaynak' c'ək'p'i Beziz bi. ‡

18 İsəəl, bito israilluğoy süft'in ğar əyloğoy gala leviğoz Zaynak' exst'a.

19 Şot'oğ o israilluğoy boşt'an c'ək'p'i Aaron a q'a iz ğarmoğoz tadi ki, İvel çadıra bito israilluğoy gala q'ulluğbi şot'oğoy günaxxo os'k'es bakat'un. Şot'oğoy İvel gala q'ulluğbsunal t'iya İşalayınşakala israillun bel bələ nu eysuni toy bakale».

20 Metər luğen, Moiseyen, Aaronen saal israilluğon Q'ONÇuğon Moiseya leviğoy barada pi əmirbit'oğ o bitova bit'un.

21 Leviyox içoğ o təmizbi paltaral os'ksunen pakt'unbaki, Aaronenal şot'oğ o c'ək'eşi sa pay k'inək' Q'ONÇuğonehəsrbi. Leviğoy pak baksey nak' Q'ONÇuğoy nak' q'ulluğbsuni toya ödəyinşala q'urbanxoval şameşi.

22 Mot'oxun oşa leviyox Aaroni q'a iz ğarmoğoy kiin oq'a İvel çadıri əşurxost'a köməybsat'un burqi. Q'ONÇuğon Moiseya leviğoy barada əmirbi piyoro xal bito baneki.

23 Q'ONÇuğon Moiseya metəre pi:

24 «Mone, leviğon me q'aydina əməlbalat'un: hər saq'o qo yəşə p'ap'ala levilu İvel çadıri əşurxost'a köməybi q'ulluğbsa burqalane,

25 əlli yəşə p'ap'at'anal iz q'ulluğa efi ene t'iya nu köməybalane.

26 Şot'in t'iya içoğoy q'ulluği vədə nu çark'i t'iyəmi viçimoğ o köməybes banekon, ama için

‡ 8:17 8:17 C'eys. 13:2

ene nu q'ulluğbalane. Mo ìvel çadıra bakala əşurxost'a leviğoy q'ulluğbsuni q'aydane».

9

C'ovaksuni axsibayi q'aydoox (C'eys. 12:1-27)

¹ İsrailuğoy Misirəxun c'eysun p'əmci usena bağat'an, t'e usenin samci xəşə Q'ONÇUĞON Moiseya Sinay ams'i oçala pine:

² «Barta israiluğon C'ovaksuni axsibaya* Bez pi vədineq'at'un c'ovakest'i.

³ Şot'o Bez pi ğine - me xəşə bip'es's'emci ğine, bəğ batk'at'an c'ovakest'a burqanan. Axsibaya c'ovakest'at'an Bez laxi bito q'aydoğ q'a k'anunxo əməlbənan».

⁴ Metərлуğen, Moiseyen israiluğon C'ovaksuni axsibayi barada bitova pine,

⁵ şot'oğonal samci xəşə bip'es's'emci ğine bəğ batk'at'an Sinay ams'i oçala me axsibaya c'ovakest'undi. İsrailuğon bitova Q'ONÇUĞON Moiseya pi k'inək't'un bi.

⁶ Ama bəzi amdarxo me ği içoğoy kul p'uri amdara lafst'una görə pak tet'un hesabbaksay, şot'o görəl me axsibaya c'ovakest'es tet'un baki. Şorox hat'e ği Moiseyi q'a Aaroni t'öğöl hari

⁷ pit'un: «Beşi kul meydə lafst'una görə yan pak teyan hesabbaksa. İsə yan Q'ONÇUĞON laxi

* **9:2 9:2** - Me axsibayast'a Q'ONÇUĞON Misirluğoy bito süft'in nanaxun baki ğarmoğon k'as'k'at'an israiluğoy k'oya nu başi şot'oğoy çomoy t'öğöləxun c'ovaki taysunat'un eyex bast'a. Şot'o görəl me axsibayi s'i C'ovaksuni axsibaye. C'eys. 12:1-27

ğine bito israilluğoxun sagala Şot'aynak' q'urban eçes teyan bakal?»

⁸ Moiseyen şot'oğö pine: «Bartanan bēğen, Q'ONčuğon me barada k'ə nex».

⁹ Q'ONčuğonal Moiseya pine:

¹⁰ «Əgər axsibayi ğine efi nəəl vəxun oşa bakalt'oğoy boşt'an şinesa iz kula meydə duğsunen içü murdar bine baksasa, nəəl ki, me ğine yaq'a bakalane baksasa, şot'in hələ me axsibaya c'ovakest'es banekon.

¹¹ Barta t'e amdaren me axsibaya p'əmcı xəşe bip'es'semci ğine bēğ batk'at'anq'an c'ovakest'i. Q'urbanluğ q'uzın yeq'a əyinsuz şumen q'a ağu oyurxon kəyi

¹² savaxt'ineynak' şot'oxun hik'k'al maq'an efi. T'e q'urbanluğ heyvani ũq'ənxoxunal sayco nu xoxbakalane. † T'e amdaren C'ovaksuni axsibayi bito q'aydoğö əməlbəlane.

¹³ Ama əgər sunt'in pak baksun nəəl yaq'a təə, iz azuk'i arane baksun me axsibaya nu c'ovakest'ayın, t'e amdari tura azuk'i aranexun bot'anan. Şot'in Q'ONčuğon laxi ğine Şot'aynak' q'urban nu eşt'una görə iz cazına zap'k'ale.

¹⁴ Əgər ef arane yəşəyınşala sa q'əribenal me axsibaya c'ovakest'un çuresasa, barta şot'in me C'ovaksuni axsibayi bito q'aydoğö q'a k'anunxo əməlbəq'an. Vəynak'al, ef arane yəşəyınşala q'əribxoynak'al q'aydoox sane».

*İvel çadıri loxol bakala asoy
(C'eys. 40:34-38)*

† 9:12 9:12 C'eys. 12:46; İvel məğ. 34:20; İoan. 19:36

15 İvel, yəni irəziluği çadıra laxit'uxun oşa, şot'ay loxol biyəsinəxun savaxt'inal şirik' bok'ala aruğ oşq'ardala sa asoye şiri.

16 Mot'oxun oşal hametərey: ğenaxun çadıra bəc'ürk'ala asoy biyəsin arux k'inək'e baksay.

17 Hər dəfəl asoy çadıri loxolxun əqeğat'an israilluyox yaq'at'un bafst'ay. Eğala çurk'ala ganu isə asoy çurk'ala galat'un düzbsay. ‡

18 Şot'oğoy yaq'a bafst'unal, eğala çurk'ala ganu düzbsunal Q'ONçuğon metəre ak'est'ay. Heq'ədər ki asoy çadıri loxole baksay, şorox içoğoy ganuxun tet'un galey.

19 Asoy çadıri loxol boxoyal mandayin, israilluyox Q'ONçuğoy əyitəxun nu c'eri içoğoy çurk'ala ganu tet'un badalbsay.

20 Asoyi çadıri loxol sa hema ği çurk'ala vədəl baneksay. İsrailuyox isə Q'ONçuğoy əyiten çurpi, Q'ONçuğoy əyitenal yaq'at'un bafst'ay.

21 Bəzi vədəmoğ o asoy çadıri loxol saycə biyəsəxun savaxal şirik'e çurey, savaxt'an asoy əqeğat'anal israilluyox yaq'at'un bafst'ay. Çuresa üşe, çuresa ğenaxun - asoy əqeğat'an israilluyox yaq'at'un bafst'ay.

22 P'ə ği, sa xaş nəəl lap sa usenq'an baki - heq'ədər ki asoy çadıri loxoleysa, israilluyox içoğoy çurk'ala ganuxun galtet'unney. T'e asoy əqeğala k'inək' isə şorox yaq'at'un bafst'ay.

23 Şot'oğ o içoğoy çurk'ala ganu maya düzbsunal, hevaxt' yaq'a bafst'unal Q'ONçuğon metəre ak'est'ay. Hametərəl, israilluğon Q'ONçuğoy Moiseya pit'oğ o bitova əməlt'unbsay.

‡ 9:17 9:17 C'eys. 40:36

10

Gümüşi şeyp'urxo

¹ Q'ONÇUĞON Moiseya pine:

² «Çəküçen əşəsi gümüşəxun p'ə dənə şeyp'ur düzba. Azuk'axun əyitk'at'an saal azuk'a xavarbi yaq'a baft'at'an şot'oğə farpi amdarxo girbalnu.

³ P'ə şeyp'uri səs sunaxun eğat'an, barta dirist' azuk'q'an vi t'öğöl ivel çadıri bəş gireşi.

⁴ Şeyp'urxoy soğə fareğat'an isə vi t'öğöl saycə israilluğoy tayfoğə görə c'ək'əsi kaloroxq'an gireşi.

⁵ Şeyp'uri səs lap alloyaxun samci kərəm eğat'an, barta bəğ c'əğalaç tərəf bakala dəst'ooxq'an yaq'a baft'i.

⁶ Alloyaxun eğala şeyp'uri səsə p'əmci kərəm ibakat'an, barta güney tərəf bakala dəst'ooxq'an yaq'a baft'i. Hametər, dəst'oox alloyaxun eğala şeyp'uri səsə ibakat'an yaq'a baft'alt'un.

⁷ Camaataxun əyitpseynak' şot'oğə girbsun lazım bakat'anal şeyp'ura farpanan, ama yaq'a baft'at'an fareğala k'inək' ost'aar təə.

⁸ Şeyp'urxo Aaroni nəsiləxun bakala bəyinsxon fark'alat'un. Barta mo vəynak' nəsiləxun nəsilə c'ovakala həmişəluğ sa q'aydaq'an baki.

⁹ Vən ef oçala ef loxol eğala düşmənnoxun davina c'əğat'anal şeyp'ura farpanan. T'e vədə Q'ONÇUĞON vəx ibaki efi düşmənnoxun çark'est'ale.

¹⁰ Efi müq ğimxo - axsibayxost'al, təzə xəşə c'eyşuna c'ovakeş'ala mərəkəyxost'al

bok'ospsuni q'a serluği q'urbanxo eçat'an şeyp'ura farpanan. Barta mo Buxaçuğon vëx eyex efseynak'q'an baki. Ef Buxačux bakala Q'ONČux Zuzu».

İsrailluğoy Sinay ams'i oçalaxun c'eyusun

¹¹ İsrailluğoy Misirəxun c'eyusun p'əmcı usena bağat'an, t'e useni p'əmcı xəşe q'amcı ğine asoy irəzilüği çadıri loxolxun ěqeşi.

¹² İsrailluyoxal Sinay ams'i oçalaxun c'eri yaq'at'un baft'i. Asoy hari P'aran uk'ala ams'i oçala çurk'aminal şorox yaq't'un taşi.

¹³ İsrailluğoy Q'ONČuğon Moiseya pi q'aydinen me yaq'a bafst'un samciney.

¹⁴ Süft'ə İuday dəst'əne içoğo c'ək'p'est'ala nişana laxi yaq'a baft'i. Me dəst'in kalo Amminadavi ğar Naxşoney.

¹⁵ İssak'ari tayfin kalo Şuari ğar Net'aneleney.

¹⁶ Zevuluni tayfin kalo isə Xeloni ğar Eliavey.

¹⁷ İvel çadıral tat'at'unpi. Gerşoni q'a Merarin nəsiləxun bakalt'oğonal t'e çadıra ext'it'un yaq'a baft'i.

¹⁸ Ruveni dəst'əl içoğo c'ək'p'est'ala nişana laxi yaq'at'un baft'i. Me dəst'in kalo Şedeuri ğar Elişurey.

¹⁹ Simeoni tayfin kalo Şurişaddayi ğar Şelumieley.

²⁰ Gade tayfin kalo isə Deueli ğar Elyasafey.

²¹ K'ohat'i nəsiləxun bakalt'oğonal İvel şeymoğo ext'it'un yaq'a baft'i; şorox hari çurk'ala gala p'ap'amin İvel çadır laxeğalaney.

²² Efraimi dəst'əl içoğə c'ək'p'est'ala nišana laxi yaq'at'un baft'i. Me dəst'in kalo Ammihudi ğar Elişamaney.

²³ Menaşşeni tayfin kalo P'edahsuri ğar Gam-lieley.

²⁴ Binyamini tayfin kalo isə Gideoni ğar Avidaney.

²⁵ Ən axırda Dane dəst'əne içoğə c'ək'p'est'ala nišana laxi yaq'a baft'i. Me dəst'in kalo Am-mişaddayi ğar Axiezerey.

²⁶ Aşeri tayfin kalo Ok'rani ğar P'agieley,

²⁷ Naft'alin tayfin kalo isə Enani ğar Axiraney.

²⁸ Metərluğen, israilluğoy dəst'oox me q'aydinent'un yaq'a bafst'ay.

²⁹ Moiseyen Xovava, iz q'ayinba midyanlu Reueli ğara pine: «Yan Q'ONçuğon "vəx tadoz" pi galayan yaq'a bafst'a. Eki yaxun tağen! Beş t'öğöl hik'k'alaxun koruğ ten ak'al, axırı Q'ONçuğon İsraila saat'luğbsunane əyit tade».

³⁰ Ama Xovaven şot'o pine: «Təə, tez tağal. Zu bez yurdnu, bez q'oom-ağrabın t'öğöl tağoz».

³¹ Moiseyen pine: «Xaişezbsa, yaxun eki. Ams'i oçala çurk'ala ganu maya düzbsunaxun vi bul c'enesa, yaynak' yaq' ak'est'al baka.

³² Yaxun tağayın, Q'onçuğon yaynak' bala saat'luğa vaxunal kamteyanbon».

³³ İsrailuyox Q'ONçuğoy buruğoxun c'eri xib ği yaq't'un taşi. Q'ONçuğoy irəzilüği sanduğa taşala leviyox bəşt'un taysay, Q'ONçuğonal şot'oğə üşə azuk'i çurk'ala ganune ak'est'ay.

³⁴ Genaxun yaq'a baft'at'an isə Q'ONçuğoy asoyal eşeşi içoğoxune baksay.

³⁵ Şot'oğon sanduğa ext'i tağat'an Moiseyen nexey:

«Ay Q'ONÇux, ėqeki!

Barta Vi düşmənxo şareseq'at'un,

Va nifrətbalko Vi bəşt'an t'it'ereq'at'un!» *

³⁶ Sanduğa taşalorox çurk'at'an isə metəre nexey:

«Ay hazarxon bakala israilluğoy Q'ONÇux, qay-baka!»

11

Q'ončuğon yaq'abi arux

¹ Azuk'en içoğoy ak'ala çətinluğaxun şikəətsane burqı, Q'ONčuğonal mot'o ibakat'an İz əcuğ bəc'ük'eşi. Şot'in azuk' çurk'ala gala aruxe yaq'abi, şoval sa belxun başi t'i yana bok'osp'i şinepi.

² Camaaten Moiseya şivanbi xoyinşebi, şot'inal Q'ONčuğə k'alpi afırıpıt'uxun oşa arux aneçi.

³ T'e gane s'iya T'averat'un * laxi, şot'o görə ki, t'e gala Q'ONčuğoy yaq'abi aruxe bok'i.

İsrailluğoy ukuni dava zapsun

⁴ Azuk'i arane Misirəxun içoğoxun sagala c'eri, q'erəz millətəxun bakaloroxal buney. Şot'oğon ukun c'ək'psa burqat'an israilluğonal şot'oğoxun barabar şikəətp'i önepsat'un burqı: «Beş ük'en yeq'e çuresa! †

* **10:35 10:35** İvel məğ. 68:1 * **11:3 11:3** T'avera - əbrani muzin "boksun" upsune. † **11:4 11:4** 1 K'or. 10:6

⁵ Misirə bakat'an yax nisyə çəli, k'aç'uli, yemiş, göyün, şik'lam, kenal tat'unst'ay.

⁶ Ama miya manninaxun başq'a hik'k'al at'eyanksa. Ene beş boş't'an c'eq'ene!»

⁷ Manna iz çoyexun həvici şiləne oşq'arst'ay, iz irəng isə neşusey.

⁸ Amdarxon şot'o taşi girt'unbsay, oşa eçeri kiin jomok'ojen bert'unxsay nəəl toxmağen ç'ak't'unney. Berxeşi mannina levet'a boxiyal, şot'oxun k'ok'al badiyal ukes baneksay. Şot'in zeytunu c'əyinen şareşi k'ok'ali tamane tast'ay. ‡

⁹ Üşe israiluğoy çurk'ala gala xo arşat'an me mannal şot'oxun barabar arest'ay. §

¹⁰ Moiseyen amdarxoy içoğoy çadıra bağla gane bəş şikəətsun önepsuna inebaki. Q'ONçuğoy əcuğ bəc'ük'eşi, Moiseyal gelene beyköf baki.

¹¹ Şot'in Q'ONçuğoy pine: «Hun het'aynak'en me Vi k'ula koruğ tast'a, Vi piyes mani günaxa görəz pis ak'eşe? Het'u görən me azuk'a bez əmnəbel laxi zaynak' yük be?

¹² Zaxune törəyinşake me azuk'? Şot'oğoy me dünyəne zuz eçere? Vi əyit tadi oçala şot'oğoy het'aynak' zu taşalazu? Axırı het'aynak' şot'oğoy mis'ik' əyel k'inək' t'iya bez q'ujel taşeri p'ap'esp'alazu?

¹³ İsə zu dirist' me azuk'eynak' yeq' mayin bəğəbaz? Bez t'öğöl hari "yan yeq' uksunyan çuresa" uk'ala azuk'a k'ə coğab tadaz?

‡ 11:8 11:7-8 C'eys. 16:14,31 § 11:9 11:9 C'eys. 16:13-15

14 Ene batezaksa, me azuk'a yük bi bez
əmnəbel xorpsuna ene bez zor aytenesa!

15 Əgər Hun hələl me əslə za tapşurbalnusa,
t'e vədə xoyinşezbsa, Vi piyes samalcəl bakayin
şaat'luğ bəğəbezusa, za bəsp'a ki, ene me koruğa
ma ak'az!»

16 Q'ONČUĞON Moiseya pine: «Azuk'i boş'tan
hörmətlü saal kalo hesabakala yetmiş
ağsaq'q'ala girbi Bez t'öğöl eça. Şot'oğö İvel
çadırı bəş eçeri vi t'öğöl çurdest'a.

17 Zu şiri t'et'iya vaxun exlətp'oz. Vast'a
bakala Urufaxun şot'oğoval tadoz ki, me
azuk'a vi əmnəbel taşt'unast'a va köməybat'un.
Metərluğenal, me yükə tək zap'k'ala ten bakal.

18 Azuk'a isə upa: "Əyc'ineynak', efi yeq'
ukala gineynak' vəx pakbanan. <Yeq'yan
çuresa! Misirə yaynak' mot'oxun saat'ey! >
pi önenanney. Mone, Q'ONČUĞON vəx inebaki!
Şot'in vəx yeq' tadale, vənal boşşamin ukalnan!

19 Vən sa ği, p'ə ği, qo ği, vis' ği, q'a ği təə,

20 düz sa xaş, ef jomoxun baramin
yeq' ukalnan! Şot'aynak' ki, ef arane
bakala Q'ONČUĞO t'ööxnənbi, ef bula
alabi <het'aynak'yan Misirəxun c'eri> pi
şikəətnənbi"».

21 Moiseyen isə pine: «Miya bez t'öğöl saycə
üqbaç hazar turin tağala işq'are bu, Hunal
nexnu ki, kot'oğö sa xaş yeq' ukest'oz!

22 Sürüğö bakala bütüm heyvanxo şamk'ayin,
kot'oğö tene p'oyegon! Dənizə bakala bütüm
çəliğoval biq'ayin, kot'oğö bəstenebakon!»

23 T'e vədə Q'ONčuğon Moiseya pine: «Q'ONčuğoy kiyexun k'ə tene ayesa ki? İsə bəğa Bez uk'alt'oğə hetərez bex p'ap'espsa!»

24 Moiseyen Q'ONčuğoy əyitə azuk'a p'ap'esebi, azuk'i ağsaq'q'alxoxun yetmiş tana topbi çadırı bəş çurdesedi.

25 Q'ONčuğonal asoyi boş şiri Moiseyaxun exlətebi. Şot'ost'a bakala Urufaxun t'e yetmiş ağsaq'q'alal tanedi. Şot'oğonal Urufen tadi əyitmoğon əyitpsat'un burqi. Q'ONčuğon şot'oğoy İz c'ək'p'iyorox baksuna metər ak'est'it'uxun oşa ene tene əyitp'est'i.

26 Siyəyinə haq'əsi t'e yetmiş ağsaq'q'ali boş Eldad saal Medad s'iyen p'ə tane buy. Şorox çadırı bəş tet'un taşey, şot'o görəl Uruf şığat'an azuk'i çurk'ala galat'uniy. Ama Uruf şot'oğoy loxolal şire, şot'oğonal içoğoy bakala gala Urufen tadi əyitmoğon əyitpsat'un burqi.

27 Sa cəyil t'it'eri Moiseya xavar tadi pine: «Urufen Eldada q'a Medada azuk'i çurk'ala gala əyitp'esest'a».

28 Cəyilluğaxun Moiseyi köməyçi bakala Nune ğar Yeşuan pine: «Bez ağa Moisey, şot'oğə şip'ba!»

29 Moiseyen şot'o coğabe tadi: «Hun za görən metər nex? Ama Zu dirist' azuk'i xavareçal baksunaz çureğoy! Təki Q'ONčuğon İz Urufaxun bütümt'u tadiniy!»

30 Moiseyal israilluğoy ağsaq'q'alxoxun sagala azuk'i çurk'ala galane qaybaki.

31 Oşa Q'ONčuğon dənizəxun eğala sa muşe yaq'abi. Me muşenal içuxun kala sa dəst'ə

bildirçinxo eçeri azuk'i çurk'ala gane sa ğilug yaq'e hama bakala hërrəmine, p'ə əm* hama boşuluğen şinepi.

³² Dirist' t'e ği, t'e üşe saal əyc'indəri amdarxon c'eri bildirçint'un girbi. Ən mal girbalt'in vis' xomere † girbi. T'e bildirçinxo eçeri azuk'i çurk'ala gane hërrəmine tak't'unpi.

³³ Ama yeq'a hələ k'əc'p'i q'uc'tet'unpey, Q'ONçuğoy əcuğ azuk'i loxol t'etərə bəc'ük'eşi ki, şot'oğoynak' dəhşətlu azare yaq'abi.

³⁴ T'e gane s'iyal Qivrot'-Hattaavat'un ‡ laxi, şot'aynak' ki, t'iya içoğoy ük'en q'erəz ukun çureğalt'oğot'un oçalaxp'i.

³⁵ Amdarxo Qivrot'-Hattaavaxun c'eri Xaserot'a taşi t'iya çurt'unpi.

12

Maryami q'a Aaroni Moiseyaxun t'ot'opsun

¹ Moiseyen K'uş bölginəxun çuxxe haq'ey, Maryamen q'a Aaronenal mot'o görə t'ot'opsat'un burqi.

² Şot'oğon pit'un: «Saycə Moiseyene Q'ONçuğoy əyitmoğ azuk'a p'ap'esp'e ki? Axırı yanal Q'ONçuğoy əyitmoğ azuk'a peyan». Q'ONçuğonal mot'o inebaki.

³ Moiseyen isə me dünyəne şuk'k'ali loxol alaxun oq'a bəteneğoy.

* **11:31 11:31** sa əm - 45 sant'i † **11:32 11:32** sa xomer - xomer 200 lit'ir ‡ **11:34 11:34** Qivrot'-Hattaava - əbrani muzin me əyit "ukuni dava zap'k'alt'oğ oçalaxp'i ga" k'inək'e c'eysa

⁴ T'e vədə Q'ONčuğon Moiseya, Aarona saal Maryama pine: «Vən xiboval İvel çadıra ek-inan!» Şoroxal tat'unşi.

⁵ Q'ONçux İvel çadıri bağala gala sa sütün k'inək' asoyi boş şiri Aarona q'a Maryama k'alepi. Şorox İşalayınşakat'an

⁶ Q'ONčuğon pine:
«İsə Bez əyitmoğə ibakanan!
Ef çalxala xavareçalxoxun Zu şot'oğoynak'
ak'eşi,

İçoğoy nep'e boş başız Za çalxest'on.

⁷ Ama Moisey şot'oğoxun soğə tene!

Şot'o dirist' Bez azuk'az tapşurbe! *

⁸ Şot'oxun sa dost' k'inək', hər şeyə qayez əyite,
Şot'inal Bez xojina aneksa.

P'oy Bez c'ək'p'i k'ul bakala me Moiseyaxun
t'ot'opsuna hetənnan ük' bi?»

⁹ Q'ONčuğoy şot'oğoy loxol gele əcuğone biq'i,
Şə t'et'iin əxilebaki.

¹⁰ Asoy çadıri loxolxun əqəşit'uxun oşa
Maryami bədənə dirist' map'mas'i yaroğone
haq'i. Aaronenal fırpı bəneği ki, Maryami
bədənen qöle tast'a.

¹¹ T'e vədə Aaronen Moiseya pine:
«Xoyinşezbsa, bez ağa, beşi axmağluğaxun
əşp'est'i me günaxa görə yax caza zapesmada.

¹² Ma barta ki, Maryami bədən p'uri nanaxun
baki əylin bədən k'inək' bakane. Ma barta ki,
nanay tapanexun p'uri, izi qıyo başaybaki c'eri
əylə oşq'ardane».

* 12:7 12:7 Əbr. 3:2,5

¹³ Moiseyenal Q'ONÇUĞO k'alpi xoyinşebi: «Ay Buxaçux, şot'o q'olayba!»

¹⁴ Q'ONÇUĞON isə Moiseya pine: «İz bavan şot'ay çoyel çupiniy, şo vüğ ği amdarxoy piyexun biti qavuna c'eyes tene bakaliy, isəəl haketər banan! Kot'o ef çurk'ala ganuxun şəpekinan, barta vüğ ği vəxun əxilq'an baki, vuğ ğinaxun oşa isə qaybakes banekon». †

¹⁵ Hametər, israilluğon Maryami tura içoğoy çurk'ala ganuxun vüğ ğiluğ bot'unt'i, şo içoğoy arane qaybakes bakala ğinal şirik'əl azuk' yaq'a tene baft'i.

¹⁶ Maryam qaybakit'uxun oşa israilluğon Xaserot'axun c'eri P'aran ams'i oçalat'un hari içoğoynak' çurk'ala ga düzbi.

13

Kənan ölkinə bəğseynak' yaq'abi amdarxo q'a şot'oğoy hari exlətp'iyorox

(K'an. 1:19-33)

¹ Q'ONÇUĞON Moiseya pine:

² «Amdarxo yaq'aba ki, Zu israilluğoynak' həzirbi Kənan oçala piyexun c'ovakest'eq'at'un. Hər tayfinaxun şot'oğoy boş kalo hesab-bakalt'oğoxun soğox'an taşi».

³ Moiseyenal Q'ONÇUĞON əmirbi k'inək' içoğoy çurpi Paran ams'i oçalaxun şot'oğox yaq'anebi. Yaq'abiyorox bito içoğoy tayfoğoy boş kalo hesabbakalt'oğoxunt'unıy.

⁴ İçoğoy s'iyurxo metərey:

Ruveni tayfinaxun Zak'k'uri ğar Şammua;

† 12:14 12:14 Ams'i oç. 5:2-3

- 5 Simeoni tayfinaxun Xorin ğar Şafat';
6 İuday tayfinaxun Yefunneyi ğar K'alev;
7 İssak'ari tayfinaxun İosifi ğar İk'al;
8 Efraimi tayfinaxun Nune ğar Xoşea;
9 Binyamini tayfinaxun Rafuni ğar P'alt'i;
10 Zevuluni tayfinaxun Sodin ğar Gaddiel;
11 İosifaxun bakala Menaşşeni tayfinaxun
Susin ğar Gaddi;
12 Dane tayfinaxun Gemallin ğar Ammiel;
13 Aşeri tayfinaxun Mixaili ğar Set'ur;
14 Naft'alin tayfinaxun Vofsin ğar Naxbi;
15 Gade tayfinaxun Mak'in ğar Geuel.
16 Ölkine piyexun c'ovakest'eynak' Moiseyen
yaq'abi amdarxo moroxey. Nune ğar Xoşea isə
Moiseyen Yeşua s'ine tadi.
17 Moiseyen şot'oğö Kənan oçala piyexun
c'ovakest'eynak' yaq'abat'an pine: «Negevaxun
c'ovaki buruxmux gala lakinan!
18 T'e ölkine piyexun c'ovakest'anan. Bəğanan
bəyn t'e oçal saal t'iya bakala amdarxo hetərt'un:
zorbat'un yoxsa zəyif, gelet'un yoxsa mal?
19 İçoğoy yəşəyinşala ölkə hetəre: şaat'e yoxsa
pis, bəyn amdarxo mayat'un yəşəyinşbsa: ayiz-
moğö yoxsa q'alala şəhərmöğö?
20 İçoğoy k'ulal bəğanan: bəyn bar tadala
k'ule yoxsa təə. Xodurxoy gele-mal baksunal
fikir tadanən. Qaybakat'an t'e ölkən meyvoğoxun
eçaynan lap şaat'e bəkon». Hame vədə t'ulal
p'ap'ala vədəney.
21 Metərluğən, şot'oğon taşi Şin ams'i oçalaxun
Levo-Xamat'i t'öğöl bakala Rexoval şirik' t'e

ölkinə piyexun c'ovakest'undi.

²² Şorox Negeva c'ovaki hari Xevron şəhəret'un c'eri. Miya Anagaxun * Aximani, Şəşayi saal T'almayı nəsiləxun bakaloroxe yəşəyinşbsay. Xevron şəhərə Misirə bakala Şoanaxun vüğ usen bəşt'un lasakey.

²³ Hari Eşk'ol uk'ala dərənə p'ap'at'an, t'iya t'etər sa ğuma t'ult'un çuki ki, şot'o durut'i loxol p'ə tanene taşt'ay! T'et'iin ələm q'a inciləl çuket'uniy.

²⁴ Me gane s'iya t'iya çuki ğumina görət'un Eşk'ol † laxi.

²⁵ Şot'oğon t'e ölkinə dirist' piyexun c'ovakest'undi, içoğoy taşi eysunenal q'ırx ğine zapi.

²⁶ Moiseyi, Aaroni saal bütüm israiluğoy t'öğöl Paran ams'i oçala bakala Qadəş şəhərə qaybakiyal içoğoy ak'it'oğoy barada exlətt'unbi. Şot'oğoy t'e ölkinəxun eçeri meyvoğoval ak'est'undi.

²⁷ Şot'oğon Moiseya pit'un: «Yan vi pi ölkinə bayanki, şo həgigiyal muç'anaq' q'a uç' barala sa oçale! Moval t'iyenin meyvoox!

²⁸ Ama t'iya yəşəyinşala amdarxo gele zorbane, içoğoy şəhərmuxal ham kala, ham q'alalane. Hələ t'iya Anagi nəsiləxun bakalt'oğoval ayank'i!

²⁹ Şorox Negeva, xet'luyox, yevusluyox saal emorluyox buruxmux ganxo, kənanluyox isə

* **13:22 13:22** - Anag q'a şşot'oxun bakiyoroş adi amdarxoxun kala, gele alloy boyent'uniy. † **13:24 13:24** Eşk'ol - əbrani muzin "ğuma" upsune

dənizi q'a İordan oqe bōrinet'un yəşəyinşbsa».

³⁰ K'aleven isə Moiseyi hərrəmine gireşi amdarxo şip'bsun çureşi pine: «Ekinan taşi t'iyana ext'en! Mo beş kiyelhik'k'ale!»

³¹ Ama şot'oxun sagala t'e ölkinə taşi amdarxon pit'un: «Şot'oğoxun davina c'eyşuna beşi zor aytenəğon, şorox yaxun zorbat'un!»

³² Şot'oğon içoğoy bəği oçala israilluğoy piyexun sakseynak' next'unıy: «Beşi bəğseynak' taşi oçal bulukal oçale! T'iyani amdarxoval bütüm alloy boyent'un!»

³³ Yan t'ıya Anagi nəsiləxun bakala t'etər kakala amdarxoyan ak'i ki, içoğoy t'öğöl çərtk'ən k'inək'yan ak'esay. Şot'oğonal beşi loxol sa çərtk'əni loxol bəğala k'inək't'un bəğsay».

14

Q'ONČUĞOY azuk'a İzi əyit tadi oçala nu taşt'un

¹ T'e üşə bütüm israilluğon şivanbi önet'unpi.

² Camaaten Moiseyaxun q'a Aaronaxun t'ot'opi metərt'un nexey: «Mot'oxunsa Misirə nəəl me ams'i oçala p'uriyaniy!»

³ Het'aynak'e Q'ONČUĞON yax me oçala taşt'a? Yax q'ılincen k'as'p'eq'at'un pi? Hələ beşi çupux q'a əyloxal düşmənxoy kiyel baft'alt'un. Şaat'o şone ki, Misirə qaybaken!»

⁴ Hametər, amdarxoy arane "ekinan yaynak' kalo c'ək'k'en, yax Misirəq'an qaydi" k'inək' exlətxone taysay.

⁵ T'e vədə Moisey q'a Aaron bütüm israilluğoy bəş çooq'a pastt'unşi.

⁶ Ölkinə bəğseynak' tašit'oğoy boş baki Nune ğar Yeşuan q'a Yefunneyi ğar K'aleven isə amdarxoy Q'ONČuĞoxun çə tarast'una nu portp'i, içəğoy paltara zığzığbi*

⁷ israilluğə pit'un: «Beşi taşi bəği ölkinə əyit butene!

⁸ Əğər Q'ONČuĞoy piyes saat' ak'eğayan, Şot'in yax t'e ölkinə taşale, t'e muç'anaq' q'a uç' barala oçala yax tadale.

⁹ Saycə Q'ONČuĞoy əleyinə ma əqekinan! T'e ölkinə amdarxoxunal ma q'ıbanan, yan şot'oğoxun zorbayan, şot'oğə q'uc'yankon! Ene içəğoy umudbakala gaal tene mande, beşi isə Q'ONČuxə bu. Şot'oğoxun ma q'ıbanan!»

¹⁰ Ama camaaten "kot'oğə jəlayınşanan" pine. T'e vədə Q'ONČuĞon bütüm israilluğə İz kalaluğa q'a tamtarağane ak'est'i.

¹¹ Q'ONČuĞonal Moiseya pine: «Me azuk'en hevaxt'al şirik' Za hörmətsuzluğbale? Hevaxt'al şirik' içəğə mema nişanxo ak'est'iyal bakayiz, Za tet'un vəbakal?

¹² Kot'oğə tumexun əfçiboz! Vaxun isə kot'oğoxunal kala hamal zorba sa azuk' əmələ eçoz!»

¹³ Moiseyen isə Q'ONČuĞə pine: «T'e vədə Hun Vi zoren me azuk'a içəğoxun çark'est'i misirluğonal me barada ibakalt'un!

* **14:6 14:6** *paltara zığzığbi* - Me hərəkəten damna döörəstə İsrailə amdarxon içəğoy yaslu, gelə kala dərde boş baksunə'tun ak'est'ay. Hamal Buxaçuğoy tərsinə bakala əyitə ibakala amdare-nal mot'o iz paltara zığbsunene ak'est'ay.

14 Şot'oğon həysə me bakalt'oğoy barada me ölkın amdaxo exlətp'alt'un. T'e amdaxon isə Vi me azuk'i arane baksuna, şot'oğoxun qay exlətpsuna, Vi asoyi şot'oğoy loxol çurpi ğenaxun asoyi sütünən, üşə isə aruğoy sütünən şot'oğə taşt'una ibaket'un.

15 P'oy Hun həysə me azuk'a dirist' əfçibayın, şot'oğon k'ə fikirbalt'un?

16 "Q'ONÇUGON şot'oğə İzi elasp'i əyit tadi ölkınə təşes tene baki, şot'o görənə şot'oğə ams'i oçala k'as'p'i şipi!" uk'alt'un.

17 Barta isə Q'onçuğoy zora ak'eq'at'un! Vi bayanbi k'inək':

18 "Q'ONÇUX səbirlune, Q'ONÇUX ök' bok'osp'ale! Şot'in taxsıra q'a günaxa bağışlayınşəbsa, ama iz loxolxun tene c'ovaksa! Günaxa əşp'est'it'ay cazina izi əyloğoxun burqı nəvə nəticoğol şirik' zapesest'a". †

19 Ay Q'onçux, Misirəxun c'eri ğinaxun ğeyin ğinal şirik' baki k'inək', Vi nu badalbakala çuresuna ak'est'i me azuk'i günaxaxun c'eki!». ‡

20 Q'ONÇUGON metərə coğab tadi: «Vi upsuna görə şot'oğə bağışlayınşəzbsa.

21 Ama Bez s'i Q'ONÇUX tene bakon, Bez kalaluğenal me dünyənə tene haq'layınşon,

22 əgər Misirə saal ams'i oçala Bezi kalaluğa q'a ak'est'i nişanxo içoğoy piin ak'it'uxun oşaal Za nu vəbaki, Bezi içoğoy arane baksunaxun vis' kərəm şüpələyinşakit'oğoxun saycoq'a bakayın

† 14:18 14:18 C'eys. 20:5-6; 34:6-7; K'an. 5:9-10; 7:9-10; Neh. 9:17; İvel məğ. 86:15; 103:8; 145:8; Yol. 2:13; Əbr. 4:2 ‡ 14:19 14:13-19 C'eys. 32:11-14

²³ Bezi içoğoy bavoğo elasp'i əyit tadi t'e oçala ak'es bakayt'un! Za hörmətsuzluğbit'oğoy sayco t'e oçala tene bağal! §

²⁴ Ama bezi k'ul bakala K'alevi ük' q'erəze: şo sal sa vədine Bezi əyitəxun tene c'eri, şot'aynak'al şot'o iz taşi tarapi oçala eçoz. Me oçalal şot'oxun bakala nəsili bakale! *

²⁵ Vən isə əyc'ə ef yaq'a badalbanan! Amalegluyox q'a kənanluyox yəşəyinşala t'e oçali dəroğə təə, Č'oç'a dənizi yaq'en ams'i oçala takinan».

²⁶ Q'ONČUĞON Moiseya q'a Aarona pine:

²⁷ «İz ük' pislüğən buy me azuk'en hələ heq'ədər zaxun t'ot'ok'ale? Şot'oğoy t'ot'ok'alt'oğə bitova izbaksa!

²⁸ Şot'oğə Bezi me əyitmoğə p'ap'esp'a: "Bezi s'iyaz elase ki, efi t'ot'ok'at'an piyorox bito bakale!

²⁹ Ef meyidxo me ams'i oçala başaybakale! † Zaxun t'ot'opit'oğoy sayco, siyəyinə haq'əsi q'a saal q'a yəşəxun ala bakalt'oğoy sayco

³⁰ Bezi elasp'i vəx tast'una əyit tadi oçala tene bağal, Yefunneyi ğar K'alevaxun q'a Nune ğar Yeşuaxun başq'a!

³¹ Ama efi <düşmənxoy kiyel baft'alt'un> pi q'orişala əylux t'e oçala bağalt'un! Şot'oğon efi baysun nu çureşi ölkinə çalxalt'un!

³² Vən isə me ams'i oçala biyalnan.

³³ Efi əyloğonal me ams'i oçala eğel bəğalt'un, vəxun ən axırinciyo miya oçalaxeğamin, q'ırx

§ 14:23 14:21-23 Əbr. 3:18 * 14:24 14:24 Yeş. 14:9-12 † 14:29 14:29 1 K'or. 10:5; Əbr. 3:17

usen efi me əsp'est'i günaxi cazina zap'k'alt'un.

‡

34 Efi t'e oçala bəğsun q'ırx ğine zapey. İ sə t'e ğimxoy hər ğine gala sa usen caza zapsunen vən q'ırx usen əzyəti boş bakalnan! T'e vədə Bezi vəxun ço tarast'un k'ə upsuna avabakalnan".

35 Mot'o Zu, Q'ONčuĞone nex! Bezi pit'uval booz! Bezi əyitəxun c'erı iz ük' pislüğən buy me azuk'i axır me ams'i oçala eğale, korox bito hamiyal başaybakalt'un!»

36 Moiseyen t'e ölkinə bəğseynak' yaq'abi, oşaal t'et'iin hari içoğoy bəği oçali barada avuzb-sun əyitp'i, amdarxo Moiseyaxun irap't'it'oğoy

37 - t'e ölkin barada pis əyitp'it'oğoy - bito azar baft'i k'as't'unşi. Me cazina şot'oğoynak' Q'ONčuĞone yaq'abi.

38 T'e ölkinə bəğseynak' taşit'oğoxun saycə Nune ğar Yeşua q'a Yefunneyi ğar K'aleve dirist' mandı.

39 Moiseyen hari Q'ončuğoy pit'oğə israil-luğə p'ap'esp'at'an, dirist' azuk'en iz c'ilə t'api önenepi.

40 Əyc'indəri savaxt'an isə şorox t'e ölkin bu-rux ganxoç yaq'a baft'i pit'un: «Düze, günaxyan əsp'est'i, ama ene teyan bal! Q'ONčuĞon yax əyit tadi oçala taysuna həziryan, ekinan tağen!»

41 Ama Moiseyen pine: «Het'aynak'nan Q'ONčuğoy əyitəxun c'eysa? Taşevk'alnan!

42 Ma takinan, efi düşmənxoxun bacartenan-bal, axırı Q'ONçux ene vəxun tene!

⁴³ Efi bəş c'eğala amalegluğon q'a kənanluğon vəx k'as'k'alt'un! Vən Q'ONčuğoxun çonan taradi, Şoval ene vəxun baki ef kula alabal-atene».

⁴⁴ Ama şorox içoğoy jomon taşi p'urumal t'e burux ganxo tağalat'un baki. Nə Moisey, nə Q'ONčuğoy irəziluği sanduğ isə içoğoy ganuxun tene galpi.

⁴⁵ Amalegluyox q'a kənanluyoxal t'e burux ganxoxun şiri şot'oğö k'as't'unpi. İçoğoy bəş badi Xorma şəhərə p'ap'amin şəp't'unşi.

15

Q'urbanxoxun sagala eçala payurxo

¹ Q'ONčuğon Moiseya pine:

² «İsrailluğö metər upa: "Zu vəx yəşəyinqbseynak' tadala oçala başit'uxun oşa

³ Zaynak' belin, eğelin nəəl keçin q'urban eçeri, şot'ay bok'uni adenal Za irəzibsun çureğat'an - mo çuresa bok'ospsuni, çuresa niyətp'i, çuresa ef ük'exun c'ovaksuna görə bakala nəəl sa axsibaya görə şameğala q'urbanq'an baki -

⁴ Şot'oxun sagala taxılı payal eçalanan. Me pay isə sa hine * bip' payaxun sa pay zeytuni c'əyin lapi sa efin † vis' payaxun sa pay xarine.

⁵ Bok'ospsuni nəəl q'erəz s'iyen şameğala hər q'urbanluğ q'uzinaxun sagala sa hine bip' payaxun sa pay fiyal eça. Mo şipseynak' bakala q'urbane.

* 15:4 15:4 sa hin - təxminən 3,8 lit'ir † 15:4 15:4 sa efa - 22 lit'ir

⁶ Q'oç eğel q'urban eçat'an, şot'oxun sagala eçala taxılı pay sa hine xib payaxun sa pay zeytuni c'əyin lapi sa efin qo payaxun sa pay xari bakalane.

⁷ Şipseynak' bakala pay k'inək' eçala fi isə sa hine xib payaxun sa pay bakalane. Mot'oğoy bok'uni ad Q'ONçuğo irəzibala ad bakale.

⁸ Zaynak' bok'ospsuni nəəl q'erəz s'iyen şameğala, niyətp'i nəəl serluği q'urban k'inək' arak' eçat'an,

⁹ şot'oxun sagala eçala taxılı pay qı hin zeytuni c'əyin lapi sa efin vis' payaxun xib paye hama xari bakalane.

¹⁰ Şipseynak' bakala pay k'inək' eçala fi isə qı hin bakalane. Me bok'ospseynak' eçala q'urbani bok'uni adal Q'ONçuğo irəzibala ad bakalane.

¹¹ Mot'oğo Zaynak' hər arak', q'oç, q'uzi nəəl çəpiş q'urban eçat'an əməlbəlanan.

¹² Hema heyvan şamk'alnansa, şot'oxun sagala iz taxılı paya q'a şipseynak' bakala payal bok'osp'alnan.

¹³ Barta bok'ospseynak' bakala pay eçeri, şot'ay bok'uni adenal Q'ONçuğo irəzibsun çureğala hər israillunen me q'aydoğo əməlbəq'an.

¹⁴ Əgər ef arane yəşəyişala q'erəz azuk'axun bakalt'in nəəl ef t'öğöl bakala q'erəz sunt'inal me cür q'urban eçeri Q'ONçuğo irəzibsun çureğayin, barta şot'inal hər şeyə efi balt'ullarik'q'an bi.

¹⁵ Barta vəynak'al ef arane yəşəyişala q'erəz azuk'axun bakalt'oğoynak'al q'aydoox saq'an baki. Mot'o nəsiləxun nəsilə c'ovakeşt'i vəynak'

sa k'anun banan. Q'ONčuğoy piyes vənal, ef t'öğöl yəşəyinşala q'əribal sane.

¹⁶ Me q'aydoğə q'a k'anunxo israillu bakalt'inal əməlbəlane, ef arane yəşəyinşi, ama israillu nu bakalt'inal"». ‡

¹⁷ Q'ONčuğon Moiseya pine:

¹⁸ «İsrailluğə metər upa: "Zu vəx taşala oçala başı yəşəyinşala vədine

¹⁹ t'e oçali bara girbat'an şot'oxun Q'ONčuğonak' pay eçanan.

²⁰ Q'ONčuğonak' ef exp'i taxılı nübərəxun, süft'in xarinen şareşi boq'oyin şumaxun pay eçanan. Mot'o ef süft'in berxi arumaxun bakala pay k'inək' eçanan.

²¹ Barta süft'in berxeşi arumaxun pay eşt'un nəsiləxun nəsilə c'ovaki vəynak' həmişəluğ sa q'aydaq'an baki"».

Q'əst'en nu əsp'est'i günaxa görə eçala q'urban

²² «"Əgər vən nu avabaki Q'ONčuğon Moiseya pit'oğoxun mat'unesa tenan əməlbəsa

²³ - şot'in Moiseya avabakeşt'i vəx bürüşit'oğoxun - t'e vədə Q'ONčuğon me q'aydoğə tadi ğinaxun burqı həmişə, mot'o nəsiləxun nəsilə c'ovakeşt'unen metər banan:

²⁴ əgər me sərfə israilluğon nu avabakit'un biq'esa, t'e vədə azuk'en şot'ay bok'uni aden Q'ONčuğə irəzibseyinak' bok'ospsuni q'urban k'inək' sa arak' eçəlane. T'e q'urbanaxun sagala iz taxılı paya q'a şipseyinak' bakala payal

eçalat'un. Günaxxo os'kseyinak' bakala q'urban k'inək' isə sa keçi eçalat'un.

²⁵ Bëyinşenal me q'urbanxo Q'ONçuğoy bəş şampi azuk'i əsp'est'i günaxxo os'kseyinak' bakala toya ödəyinşi bakale. Metərluğen, azuk'i günaxxo bağışlayınşakale. Şot'aynak' ki, mo nu avabaki əsp'est'i günaxe, şot'o bağışlayınşbseyinak' bakala bok'ospsuni q'a günaxxo os'kseyinak' bakala q'urbanal eçeret'un.

²⁶ Şot'aynak'al bütüm israilluyox q'a şot'oğoy arane yəşəyinşala q'erəz azuk'axun bakalorox me nu avabaki əsp'est'i günaxa görə bağışlayınşakalt'un.

²⁷ Ama günaxa nu avabaki əsp'est'iyo sa amdar bakayin, barta şot'in günaxxo os'kseyinak' bakala q'urban k'inək' sa useni dişi keçiq'an bëyinşi t'öğöl eçeri.

²⁸ Bëyinşenal me q'urbana Q'ONçuğoy bəş eçeri q'əst'en nu əsp'est'i t'e günaxi toya ödəyinşi bakale. Günaxa q'əst'en nu əsp'est'i amdari günaxal bağışlayınşakale. §

²⁹ Barta me cürə günax əsp'est'i israillu bakalt'oğoyinak'al, israillu nu baki ef arane yəşəyinşalt'oğoyinak'al q'ayda saq'an baki.

³⁰ Ama əgər şinesa avabaksun günax əsp'est'ayin, mo Q'ONçuğoy nu çalxsun, Şot'o hik'k'albsun upsune, metərt'ay tural azuk'i aranexun bot'alanın. Mo israillu bakalt'uval, israillu nu baki ef arane yəşəyinşalt'uval aide.

³¹ Metər amdar Q'ONçuğoy laxi k'anuna t'öğxbi, Şot'ay əyitəxun c'erine baksa, şot'o görəl

iz cazina zap'k'ale. Şot'ay tura azuk'i aranexun bot'alnan!"»

Şamat' ğina pozmişala amdareynak' bakala caza.

³² İsrailuyox ams'i oçala bakat'an sa amdari Şamat' ğine uş girbsunat'un ak'i.

³³ Amdara uş girbat'an biq'it'oğon şot'o Moiseyi, Aaroni saal bütüm israilluğoy beşt'un eçeri.

³⁴ T'e amdara biq'i t'ussağt'unbi, şot'o görə ki, Şamat' ğina pozmişala amdara k'ə bsuni barada sa q'ayda hələ buteney.

³⁵ T'e vədə Q'ONČUĞON Moiseya pine: «Me amdara bəsp'anan. Barta azuk'en şot'o çurk'ala ganuxun əxil c'evk'i jəlayinşi bəsp'eq'an».

³⁶ İsrailuğonal t'e amdara içoğoy çurk'ala ganuxun t'öox c'evk'i Q'ONČUĞON Moiseya əmirbi k'inək' jəlayinşi best'unbi.

Q'ONČUĞOY əmirxo eyex efseynek' paltarin loxol bakala s'os'ik'xo

³⁷ Q'ONČUĞON Moiseya metəre pi:

³⁸ «İsrailuğə upa ki, mot'oxun oşa həmişə içoğoy paltari ətəyi t'öğürxo s'os'ik'xoq'at'un əbi. Hər s'os'ik'i boş isə göyin t'uriq'an baki. *

³⁹ Me s'os'ik'xo ak'at'an Q'ONČUĞOY laxi k'anunxo q'a q'aydoğə eyexun nu c'evk'i şot'oğə əməlbənan. Şot'oğon vəx efi piin ak'alt'oğoy q'a ük'exun c'ovakalt'oğoy baç'anexun taysunaxun efale.

⁴⁰ Vənal bütüm Bezi əmirxo eyex badi şot'oğə əməlbənan, metərлуğənal Zaynak' İvel sa azuk' bəkalnan.

* 15:38 15:38 K'an. 22:12

⁴¹ Ef Buxaçux bakseynak' vëx Misirəxun c'evk'i Q'ONÇUX, ef Buxaçux Zuzu. Zu Q'ONÇUXZU, ef Buxaçuxzu!»

16

Goraxi, Dat'ani saal Avirami Q'ONÇUĞoy əleyinə c'eysun

¹ Levin nəticə, K'ohat'i nəvə, Yişariyal ğar bakala Goraxen Ruveni nəsiləxun bakala Eliavi ğarmux Dat'an q'a Aviramaxun saal P'et'et'i ğar Onaxun əyitə sabi

² Moiseyi əleyinət'un əqəşi. Şot'oğoy tərəf azuk'axun p'əbaç əlli tane buy, içəl bito s'ila, kala amdarxoney.

³ Şorox gireşi Moiseyi q'a Aaroni t'əğöl hari pit'un: «Bəse efiyo! Me azuk'i boş saycə vən təə, yan bito İvelyan, Q'ONÇUXAL beş bitot'ay t'əğölə! Ama vən vëx bitot'uxun avuzinnan hesabbsa».

⁴ Moiseyen me əyitmoğə ibaki çooq'a past'eşi.

⁵ Oşa Goraxa q'a şot'ay tərəf bakalt'oğə pine: «Əyc'ə savaxt'an Q'ONÇUĞON İceynak' c'ək'p'it'u, İvel bakalt'u, İz bakala gala başı İçuxun əyitp'es bakalt'u ak'est'ale. Şu c'ək'k'alesa şoval İçu İşalayınşakes bakale.

⁶ Vən isə buxur bok'ospseynak' bakala q'avurxo ext'anan,

⁷ şot'oğoy boş əyc'ə bok'ala s'ile loxol şaat' adeğala oyurxo laxi Q'ONÇUĞoy bəş c'ekinan. Q'ONÇUĞON şu c'ək'k'alesa, şoval İvel hesab bakale. Bəse ene efiyo, ay leviyox!»

⁸ Moiseyen Goraxa pine: «Leviyox, ibakanan k'əz nex!

⁹ İsraillluğoy Buxaçuğon vəx azuk'i boşt'an c'ək'p'i İçu İšane bi, vəx İvel çadıri əşurxost'a köməybi azuk'i s'iyen İçu q'ulluğbseynek'e laxi.

¹⁰ Q'ONČUĞON vəx, leviğo, İçu İšane bi, ama vən isəəl bəyinşluğbsunanan tamaxbsa!

¹¹ Hunal, me vaxun hariyoroxal, vən bito Aaroni təə, Q'ONČUĞOY əleyinənən eşqesa. Aaron şuva ki?»

¹² Oşa Moiseyen Eliavi ğarmux Dat'ana q'a Aviramane k'alpest'i, ama şot'oğon pit'un: «Yan teyan eğal!

¹³ Yax t'e muč'anaq' q'a uç' barala ölkinəxun c'evk'i ams'i oçala k'as'eseynak' eçeriyo male, hələ sa beş kalo baksunal çurensa?

¹⁴ İsəəl yax muč'anaq' q'a uç' barala oçala ten taşt'a, q'oruğxo, t'ulluğxo ten tast'a, oşaal fikirenbsa ki, amdarxoy pulmux k'ač'ine? Teyan eğal!»

¹⁵ T'e vədə Moiseyen gele əcuğləyinşəki Q'ONČUĞO pine: «Kot'oğon tadala payurxo q'abulmaba! Kot'oğoxun sa elemal tez ext'i, kot'oğə sal sa pisluğ tezbe».

¹⁶ Moiseyen Goraxa pine: «Hun q'a me vi tərəf bakalorox isə əyc'ə Q'ONČUĞOY bəş c'ekinan - hun, korox saal Aaron.

¹⁷ Barta hərt'in iz buxur bok'ospseynek' bakala q'aval ext'eq'an. Bito sagala p'əbaç əlli dənə q'av. Şot'oğoy boş saat' adeğala oyurxo laxi Q'ONČUĞOYNak' eçanan».

¹⁸ Metərluğen, şot'oğon içəğoy buxur bok'ospseynak' bakala q'avurxo ext'i Moiseyaxun q'a Aaronaxun sagala İvel çadıri

bağala gane bēš çurt'unpi. T'e q'avurxoy boş bok'ala s'ile loxol şaat' adeğala oyurxot'un laxey.

¹⁹ Goraxen Moiseyi q'a Aaroni əleyinə c'eri iz tərəf bakalt'oğō bitova İvel çadiri bağala gane bēš topbit'uxun oşa, mone, dirist' azuk'en Q'ONÇuĞoy tamtarağane ak'i.

²⁰ Q'ONÇuĞon Moiseya q'a Aarona pine:

²¹ «Əxilbakanan me azuk'axun, kot'oğō həysə əfçiboz».

²² Ama Moiseyen q'a Aaronen çooq'a past'eşi xoyinšt'unbi: «Ay Buxaçux! Ay iz boş nəfəs bakalt'oğō bitova elmux tadala Buxaçux! Het'aynak'en sa amdaren əsp'est'i günaxa görə dirist' azuk'an əcuğō c'evksa?»

²³ T'e vədə Q'ONÇuĞon Moiseya pine:

²⁴ «İsrailluğō upa ki, Goraxi, Dat'ani saal Avirami çadıraxun əxilbakeq'at'un!»

²⁵ Moisey hayzeri israilluğoy ağsaq'q'alxoxun sagala Dat'ani q'a Avirami t'öğöle taşi.

²⁶ Şot'in azuk'a xavardarluğbi pine: «Me içoğoy ük' pislüğēn buy amdarxoy çadırxoxun əxilbakanan! Kot'oğoy sal sa şeyal kul ma duğanan, tene me amdarxoy günaxxo görə vənal əfçibakalnan!»

²⁷ Amdarxoval Goraxi, Dat'ani saal Avirami çadırxoxun əxilt'unbaki. Dat'an saal Aviram isə c'eri içoğoy çupuxxoxun q'a xuri-kala əyloğoxun sagala içoğoy çadırxoy bağala gane bēš çurt'unpi.

²⁸ Moiseyen pine: «Mone, zu bito me əşurxo bez beynə təə, ama Q'ONÇuĞoy tapşuruğēn bsuna metər avabakalnan:

29 əgər me amdarxo içoğoy acalen biyayt'un, içoğoy bel eğala əşurxost'al sa fərg nu bakayin, t'e vədə za Q'ONčuğon tene yaq'abe.

30 Ama əgər oçal qıbakayin, koroxal dirist'-dirist', içoğoy bakal-nu bakalaxun sagala t'iya bağayt'un, əgər Q'ONčuğon kot'oğoynak' nu ak'eşi metər sa bisun yaq'abayin, t'e vədə q'amışakalnan ki, me amdarxo Q'ONčuğoxun tərs taşiyoroxe».

31 Moiseyen iz jomoxun axırncı əyitə c'evksun q'a hametər baksun sane baki. T'e amdarxoy turin oq'a bakala oçal qınebaki,

32 şoroxal bito - Goraxi tərəf bakalt'oğoy külfətə şu bunesa - içoğoy bakal-nu bakalaxun sagala oçali oq'at'un taşi.

33 Şorox dirist'-dirist't'un oçalaxeşi. Oçalen şot'oğoy içoğoy bakal-nu bakalaxun sagala t'etərə q'uc'p'i ki, içoğoy gaal tene mandı.

34 T'iya bakala amdarxo bito şot'oğoy haraya ibaki t'it'unt'eri, şot'o görə ki, içoğoyal oçali oq'a taysunaxun q'ıt'unbsay.

35 Buxuri q'avurxoy boş saat' adeğala oyurxo bok'osp'i amdarxoy loxol isə Q'ONčuğon aruxə yaq'abi, p'əbaç əlli tanal bito bok'i bart'undi.

36 Q'ONčuğon Moiseya pine:

37 «Bəyinş Aaroni ğar Eleazara upa ki, bok'uni boştan q'avurxo girbi şot'oğoy boş bakala s'ilurxo ams'ibi əxilq'an boseri, şot'o görə ki, t'e q'avurxo İvele.

38 Mo içoğoy elmoğoy toyen bakala günax əşp'est'it'oğoy q'avurxone. Barta t'e q'avurxo t'api t'əp'ək'bi q'urban eçala

gane t'öğurxoq'at'un but'k'i. Şot'oğö
Q'ONçuğöynak't'un eçerey, şorox ene İvele.
İsrailluğöynak' isə mo eyex badala sa nişan
bakale».

³⁹ Eleazarenal bok'uni boş't'an mise buxuri
q'avurxo girebi, şot'oğö t'api t'əp'ək'p'it'uxun
oşal q'urban eçala gane t'öğurxot'un but'k'i.

⁴⁰ Hametər, Q'ONçuğon Moiseya, Moiseyenal
Eleazara pi k'inək' baneki. İsrailluğon isə
me mise loxol hər bəğat'an, içögoy eyext'un
bast'ay ki, Aaroni nəsiləxun bakalt'oğoxun
başq'a şinesa Q'ONçuğoy bəş buxur bok'ospsun
çureğayin, iz axır Goraxi q'a şot'ay tərəf
bakit'oğoylarik' bakale.

*Moiseyi q'a Aaroni azuk'i günaxa
bağışlayinşest'un*

⁴¹ Əyc'indəri israilluyox p'urum gireşi Moi-
seyaxun q'a Aaronaxun t'ot'opsat'un burqi.
Şot'oğon "Q'ONçuğoy amdarxo vənnan bəsp'i"
next'unıy.

⁴² Ama şorox topbaki Moiseyi q'a Aaroni
bəş c'eyseynak' İvel çadıraç tağat'an, çadıra
bürdən asoyene haq'i. Şot'oğon Q'ONçuğoy
tamtarəğat'un ak'i.

⁴³ Moisey q'a Aaron İvel çadıra
İşalayinşt'unbaki,

⁴⁴ Q'ONçuğonal Moiseya pine:

⁴⁵ «Me azuk'axun əxilbakanan, şot'o görə ki,
həysə kot'oğö bitova əfçiboz!» Şot'in metər
uk'ala k'inək' Moisey q'a Aaron çooq'a oçala
past'unşi.

⁴⁶ Moiseyen Aarona pine: «Vi buxuri q'ava ext'i iz boş q'urban eçala ganuxun s'il laxa, oşa iz loxol şaat' adeğala oyurxoval laxi azuk'i t'öğöl taki. Metər Q'onçuğon şot'oğoy bağışlayınşı bakale. Mone, Q'ONÇUĞON İZ əcuğoy azuk'i loxol şipi şot'oğoy nak' k'as'esuna ene yaq'abene».

⁴⁷ Aaronenal Moiseyen içü pi k'inək' buxuri q'ava ext'i camaati t'öğöle taşı. Şo eğat'an amdarxo k'as'esa burqeney, ama şot'in q'urban eçala ganuxun ext'i s'ile loxol şaat' adeğala oyurxo bok'osebi, şot'oğoy günaxxoval bağışlayınşest'ine baki.

⁴⁸ Şo p'urit'oğoy q'a dirist't'oğoy arane çurpi k'as'esuna enefi.

⁴⁹ Goraxa görə p'urit'oğoy nu hesabbayin isə bip'es'se hazar vüğbaç tane p'urey.

⁵⁰ Amdarxoy k'as'esun çurpit'uxun oşa Aaron azuk'i t'öğöl, İvel çadıri bağala gane bəşe qaybaki.

17

Aaroni çombağı göyünbak'sun

¹ Q'ONÇUĞON Moiseya metəre pi:

² «İsrailuğoy upa ki, vaynak' p'as'se dənə çombağq'at'un eçeri. Çombağa hər tayfin s'iye iz kalat'in eçalane. Hər çombağı loxolal şot'o eçeri kalat'ay s'iya şampa.

³ Levi tayfinaxun bakalt'oğoy çombağı loxol Aaroni s'iya şampa. Hər tayfin kalat'ay s'iye sa çombağ bakalane.

⁴ Çombağxo vən Zaxun exlətpseynak' eğala gala - İvel çadıra bakala şameşi irəziluği bəş laxa.

⁵ Zu t'etər booz ki, Bez c'ək'p'i amdari
çombağ göyünbakale, Zuval ene me azuk'i
vəxun t'ot'opsuna tez ibakal».

⁶ Moiseyen mot'oğo israilluğo exlətebi, şot'oğoy boşt'an c'ək'eşi kalat'oğonal hərt'in sa çombağt'un eçeri - bito sagala p'as's'e çombağ. Aaroni çombağal me çombağxoy boşey.

⁷ Moiseyen me çombağxo irəziluği çadırı boş,
Q'ONÇUGOV bəş lanexi.

⁸ Əyc'indəri Moisey irəziluği çadıra bağat'an
anek'i ki, Levi tayfin s'i'yen bakala, Aaroni
s'i şameşi çombağ göyünbakene. Şot'in lap
t'up'ullayınşaki s'is'ik' qaypi badamal c'epeney.

⁹ T'e vədə Moiseyən Q'ONČuğoy bəš laxi
çombagxo bitova ext'i israilluğoy bəše c'eri.
Şot'oğon çombagxo bət'unği, hərt'inal iz
çombağa c'ək'p'i exedi.

¹⁰ Q'ONčuGon Moiseya pine: «Aaroni çombağa qaydi irəziluği çadıra, şameşi irəziluğ bakala gane bəş laxa. Barta mo Q'ONčuGoy əyitəxun c'erit'ogoynak' ene Şot'in c'ək'p'it'ogoxun nu t'ot'opseynak' sa nişan baki şot'oğə bisunaxun çark'est'eq'an». *

¹¹ Moiseyenal bitova Q'ONČuĞon içu pi k'inək' bine.

¹² İsrailuğon Moiseya pit'un: «Beş axır butene! Əfçibakalyan! Yan bito əfçibakalyan!

* 17:10 17:8-10 Əbr. 9:4

13 Q'ONÇuĞoy İvel çadıra İşalayınşakalo, şot'o İša bitalo bisane! Yəni yanal bito biyalyan?»

18

Q'ONÇuĞoy bəyinşxo q'a mandi leviğə tapşurbi əş

¹ Q'ONÇuĞon Aarona pine: «Hun, vi ğarmoğon saal vi nəsiləxun bakalt'oğon İvel ganu günax əşesunaxun efi nu murdarlayınşaksuna bəğalanan. Bəyinşluği İvel mandi nu murdarlayınşaksun isə saycə vi q'a vi ğarmoğoy ozanene.

² Vi tayfinaxun bakala mandi leviğoval vi t'öğöl ext'a ki, hun q'a vi ğarmoğon İvel çadıra q'ulluğbat'an vəx köməybat'un.

³ Barta şot'oğon vi kiin oq'a əşp'i va köməybeq'at'un, ama nə q'urban eçala ganu, nə şot'ay sal sa ət't'əcə İša maq'at'un biti, tene vənəl biyalnan, şoroxal.

⁴ Barta İvel çadıri bütüm əşurxost'a vaxun baki köməybeq'at'un, ama ef tayfinaxun nu bakala sal sa amdara t'iya İša bist'a barmatanan.

⁵ Ama çadıri boş başı q'a q'urban eçala ganu İša biti biq'ala əşurxo vən banan, tene Bez əcuğ p'urum israilluğoy loxol bəc'ük'eğale.

⁶ İsrailuğoy boş'tan leviğə Zuz c'ək'p'i vəx pay k'inək' tadi ki, vəx köməybeq'at'un. Şorox İvel çadıra q'ulluğbseynak't'un c'ək'eşe.

⁷ Ama bəyinşluğbi q'urban eçala ganu q'a çadıri boş pərdin baç'ane bakala ən İvel ganu İşalayınşaksuna saycə va q'a vi ğarmoğoz icaza

tast'a, mot'oğö sa pay k'inək' vëxez tast'a. Vëxun başq'a şunesa t'iya İşalayınşakayin besp'anan».

Bëyinşxoynak' q'a leviğoynak' bakala pay

⁸ Q'ONÇUĞON Aarona pine: «Mone, Zaynak' eçala payurxo bitova bëğsuna va Zuz tapşurbi. Zaynak' eçala bito İvel payurxo vi q'a vi ğarmoğoy bakale. Şorox vëxe kofst'a, barta həmişəəl metərq'an baki.

⁹ Mo Zaynak' eçeri İvel paye - q'urbanxoy nu bok'osp'i hissooxe. Zaynak' eçala bito payurxoy - çuresa taxılı paye, çuresa günaxxo os'kseynak' bakala nəəl taxsıra os'kseynak' bakala q'urbanxoy me hissə efi bakale.

¹⁰ Şot'o ən İvel sa ukun k'inək' uka. Şot'o saycə işq'arxone ukes bakon, barta mo vëynak' İvelxoy İvelq'an baki.

¹¹ Zaynak' sa pay baksuna ak'est'eynak' alabiyoroxal bito vine. Şot'oğö va, vi ğarmoğö saal xuyərmoğoz tast'a, şorox vëxe kofst'a, barta həmişəəl metərq'an baki. Vi külfəti boş pak bakala hər sunt'in şot'oxun ukes banekon.

¹² Q'ONÇUĞOYNAK' samci nübər k'inək' eçala ən şaat' zeytuni c'əyinə, noç'a saal taxılı payal vaz tast'a.

¹³ Oçalen tadi bito barurxoxun Q'ONÇUĞOYNAK' eçala samci nübərxo vine. Vi külfəti boş pak bakala hər sunt'in şot'oxun ukes banekon.

¹⁴ İsrailuğoy boş Q'ONÇUĞOYNAK' pay k'inək' cöybaki hər şey vine. *

¹⁵ Amdarxoy süft'in ğar əyeləl, heyvanxoy süft'in ərkəy balal - Q'ONÇUĞOYNAK' bakala me

* 18:14 18:14 Lev. 27:28

payurxo - vine. Ama insani balin q'a haram hesabakala heyvani balin gala təngə ext'a.

¹⁶ Barta şorox sa xaşin bakat'an, va İvel gane şek'elen† qo şek'el gümüş tadi şot'oğö haq'eq'at'un (sa şek'el q'a gere).

¹⁷ Ama çure, eğeli saal keçin samci ərkəy balin gala hik'k'al exmada, şot'oğö şampa. Şorox İvele; şot'oğöy p'iya q'urban eçala gane bürüğö çəçədi içöğöy piyal bok'osp'a, şot'o görə ki, şot'oğöy bok'uni ad Q'ONÇuĞö irəzibala ade.

¹⁸ Şot'oğöy yeq' isə va mandale. Q'ONÇuĞöynak' sa pay baksuna ak'est'eynak' alabaki döşe yeq' q'a yön bude yeq' va mandalt'ullarik'.

¹⁹ İsrailuğon Q'ONÇuĞöynak' eçala bito İvel payurxo va, vi ğarmoğö saal xuyərmoğoz tast'a. Şorox vəxe kofst'a, barta həmişəəl metərq'an baki. Mo Bezi vaxun saal vi nəsiləxun ğaçeğala həmişəluğ, nu şareğala sa irəzilüğe». ‡

²⁰ Q'ONÇuĞon Aarona pine: «Zu israiluğö tadala oçala vəynak' miras butene, vəx t'e oçalaxun pay koft'alatene, şot'o görə ki, vəx koft'ala mirasi q'a paye gala hər şeyə Zu vəx p'ap'esp'oz.

²¹ İsrailuğon Zaynak' eçala içöğöy girbi bare vis' payaxun sa paya isə levigoz tast'a. Mo şot'oğöy İvel gala bala q'ulluği əvəze. §

† 18:16 18:16 şek'el - 1 şek'el təxminən 11 gram ‡ 18:19 18:19 Əbrani muzin miya "elen ğaçeşi irəzilüğe" şam. T'e vaxt' amdarxoy sagala arşi elen şum uksunen şot'oğöy arane bakala irəzilügin nu şaresuna, boxoy manst'unane ak'est'ay. Hətər ki elaxp'i ukun boxoy mandala k'inək'. § 18:21 18:21 Lev. 27:30-33; K'an. 14:22-29; Əbr. 7:5

22 Ama israilluyox İvel çadıra maq'at'un İşalayınşaki, tene iz caza bisun bakala günaxa baft'alt'un.

23 Barta saycə leviğonq'an İvel çadıra əşp'i q'ulluğbi, t'e gane pak mandi nu murdarlayınşaksunal şot'oğon bəğalat'un. Mo vəynak' nəsiləxun-nəsilə c'ovakala həmişəluğ sa q'aydane. Zu israilluğo tadala oçalaxun şot'oğoynak' pay butene.

24 Şot'ay gala leviğo israilluğon Zaynak' eçala paya - içoğoy girbi bare vis' payaxun sa payaz tast'a. Mot'o görəl leviğo vəx tadala oçalaxun pay tene kofst'a».

25 Q'ONÇUĞON Moiseya pine:

26 «Leviğo metər upa: "Zu vəx miras k'inək' tadi paya, israilluğon Zaynak' eçala içoğoy girbi bare vis' paye sunt'u ext'at'an, şot'ay vis' paye sa paya Q'ONÇUĞOYNak' eçanan.

27 Me paya israilluğon Zaynak' içoğoy exp'i arumaxun q'a bapi finaxun eçala pay k'inək' q'abulboz.

28 Metərлуğen, israilluğon içoğoy girbi bare vis' paye sunt'u vəynak' eçat'an, şot'oxun Zaynak' bakala hissinə cöybanan. Bez paya bəyinş Aaronə tadanan.

29 Vəynak' eçala payurxoxun Q'ONÇUĞOYNak' ən şaat' ganu cöybanan, şot'o görə ki, me pay İvel paye".

30 Leviğo upanan: "Vəynak' eçeri payaxun Zaynak' ən şaat' ganu cöybat'an, Zu şot'o vəxun ef exp'i arumaxun q'a ef bapi finaxun eçala pay k'inək' q'abulboz.

31 Mandiyo isə efiq'an baki, efi külfəti boş bakalt'oğoy bitot'in şot'oxun ukes banekon. Mo efi İvel gala bala q'ulluğın əvəze, şot'o efi ük'en çureğala gala ukes banankon.

32 Vən Q'ONčuGoynak' ən saat' ganu cöybsunen, t'e pay İvel mandi tene murdarlayınşaksa. Şot'o görəl t'e paya uksunen iz caza bisun bakala günaxa tenan bafst'a"».

19

Č'oč'a ocas q'a pakbseynak' bakala xe

1 Q'ONčuGon Moiseya q'a Aarona pine:

2 «Bezi israilluğoynak' laxi k'anuni q'aydoox moroxe: barta vəynak' sa dənə salamat hamal hələ çölə nu əşp'i č'oč'a ocasq'at'un eçeri.

3 Şot'o bəyinş Eleazara tadanən. Oşa bartanan t'e ocasa azuk'i çurk'ala ganuxun t'öğx c'evk'i Eleazari piin bəş şampeq'at'un.

4 Eleazaren t'e ocasi p'iyaxun iz k'əşinen ext'i vüğ kərəm İvel çadıri bağala ganuç çəçədeq'an.

5 Ocasi t'ola, yeq'a, p'iya saal gödənxo isə şot'ay piin bəş bok'osp'eq'at'un.

6 Barta bəyinşen şame xodaxun sa tay, issop uk'ala o saal tünd č'oč'a irəngen gombi xayaxun ext'i mot'oğoval bok'ala ocasi loxolq'an boseri.

7 Oşa bəyinşen iz paltara q'a iz bədənə os'k'eq'an. Mot'oxun oşa şo azuk'i çurk'ala gala qaybakes banekon, ama şo hələl t'e gine biyəsəl şirik' pak tene hesabbaksa.

8 Ocasa bok'osp'i amdarenal iz paltara q'a iz bədənə os'k'eq'an. Şoval biyəsəl şirik' pak tene hesabbakal.

⁹ Bok'i ocasaxun mandi jeq'a isə barta pak hesabbakala sa amdaren girbi azuk'i çurk'ala ganuxun əxil, pak hesabbakala sa gala laxeq'an. Me jeq'a israilluğon pakbala xe düzbseynek' eflat'un, şo günaxxo os'kseynek' əşəğale. *

¹⁰ Ocasaxun mandi jeq'a girbi amdarenal iz paltara os'k'eq'an, ama şoval biyəsəl şirik' pak tene hesabbakal. Barta mo israilluğoynak'al, içoğoy t'öğöl yəşəyişala q'erəz millətəxun bakalt'oğoynak'al həmişəluğ sa q'aydaq'an baki.

¹¹ İz kula meydə duği amdar vüğ gi murdarlayiņşakine hesabbaksa.

¹² Xibimci q'a vüğümci ğine şot'in içu t'e jeq'axun gərbi xenen pakbalane, mot'oxun oşa şo pak hesabbakale. P'urina laft'it'uxun oşa xibimci q'a vüğümci ğine içu nu pakbi amdar isə pak tene hesabbaksa.

¹³ İz kul meydə laft'i, oşal içu nu pakbi amdaren Q'ONÇuğoyivəl çadır bakala ganu murdarlayiņşine baksa, metər amdari tura azuk'i aranəxun bot'anan. Şot'ay loxol pakbala xe tene çəçəpe, şo hələ murdarlayiņşakine hesabbaksa, iz murdarlayiņşaksun təmizbaki tene baksa.

¹⁴ Mone, vəynak' metər sa k'anunez laxsa: əgər çadıra soğo p'urenəsa t'iya bakaloroxal, t'e çadıra bağaloroxal vüğ gi murdarlayiņşakit'un hesabbaksa.

¹⁵ İz q'apağ gip nu arsi hər q'aval murdarlayiņşakine hesabbaksa.

¹⁶ Şinəsa qavuna iz kula meydə duğayin - çuresa q'ilıncaxun p'uriyo, çuresa iz acalen

* 19:9 19:9 Əbr. 9:13

p'uriyoq'an baki - şoval vüğ ği murdarlayinşakine hesabbaksa. Mo iz kul p'uri amdari üq'enxo q'a gərəmzoğo laft'it'uval aide.

¹⁷ Murdarlayinşaki amdara pakbseynak' metər banan: t'e bok'i ocasi, yəni günaxxo os'kseynak' bakala q'urbani jeq'axun ext'i sa q'ave boş təzə eçeri xena bapi gərgürbanan.

¹⁸ Oşa barta pak hesabbakala sa amdaren issop uk'ala oyen t'e xenaxun ext'i çadiri q'a iz boş bakala bito şeymoğoy loxol saal t'iya bakala amdarxoy loxol çəçədeq'an. Qavuna q'ılncaxun nəəl iz acalen p'urit'ay meydə, p'uri amdari üq'enxo nəəl gərəmzoğo iz kul laft'it'uval metər banan.

¹⁹ Pak hesabbakala amdaren meydəxun murdarlayinşakit'ay loxol xibimci q'a vüğümci ğine xe çəçədalane. Metərluğenal, vüğümci ğine şot'o pakbi bakale. Barta pakbaki amdaren iz paltara os'k'i, iz loxolal xeq'an lapi. T'e üşenaxun şo ene pak hesabbakale.

²⁰ Ama əgər soğo murdarlayinşakit'uxun oşa qaybay pakbaksuni q'aydoğo nu əməlbayin, metər amdari tura azuk'i aranexun bot'anan. Şot'ay loxol pakbsuni xe tene çəçəpe, şo murdare hesabbaksa. Şot'in Q'ONçuğoy ivel çadır bakala ganu murdarlayinşebşa.

²¹ Barta mo israiluğoynak' həmişəluğ sa q'aydaq'an baki.

Pakbseynak' bakala xena çəçədalt'inal iz paltara os'k'alane. İz kul t'e xena laft'alo biyəsəl şirik' murdarlayinşakine hesabbaksa.

²² Murdarlayinşaki amdari laft'i hər şey murdare hesabbaksa. Şot'ay laft'it'oğo kul duği

amdaral biyəsəl širik' murdarlayınşakine hesab-baksa».

20

*Q'ONčuğoy Moiseya q'a Aarona şot'oğoy
Kənan oçala nu bayes baksuna upsun*

¹ İsrailuğoy Misirəxun c'eysun q'ırx useney. T'e useni samci xəşest'a israiluyox hari Šin ams'i oçalat'un c'eri. Şorox Qadeş şəhərə çurt'unpi. Miya Maryam p'ure, şot'oval hat'iya oçalaxt'unbi.

² Azuk'en xeneynak' koruğə aksay, amdarxonal Moiseya q'a Aaronane taxsırkərbəsay.

³ Şot'oğon Moiseyi t'öğöl taşi pit'un: «Mot'oxunsa t'e p'urit'oğollarik' Q'ONčuğon beş elmoğoval haq'iniy!

⁴ Het'aynak'nan Q'ONčuğoy azuk'a me ams'i oçala eçere? Yaxal, beş heyvanxoval memiya bespseynak'?

⁵ Het'aynak'nan yax Misirəxun c'evk'i me pis gala eçeri? Miya nə əkinə bit'es baksa, nə incile bu, nə t'ul nəəl ələm! Üğseynak' xe hik'ə teyan bəğəbsa!»

⁶ T'e vədə Moisey q'a Aaron amdarxo efi İvel çadiri bağala gane bəşt'un taşi. Şorox t'iya çooq'a oçala pastt'unşi. Q'ONčuğoy kalaluğ q'a tamtarağ şot'oğoynak' ak'eşi,

⁷ Q'ONčuğonal Moiseya pine:

⁸ «Çombağa ext'a, vi viçi Aaronaxun sagalal azuk'a girba. Oşa bütümt'ay piin bəş q'ayana əmirba şot'inal vəynak' xe c'evk'ale. Hun q'ayanaxun c'eri xena azuk'a tadalnu, şot'oğonal

boşşamin uğəlt'un, içoğoy heyvanxoval
üğest'alt'un».

⁹ Moiseyenal Q'ONÇuĞon içü əmirbi k'inək' İvel
çadıra bakala çombağa ext'i

¹⁰ iz viçi Aaronaxun sagala azuk'a q'ayani
bəş girebi. Oşa pine: «Ay gərgürçiluğ
sakalxo! Mone, yax ene me q'ayanaxunal xe
c'evk'est'alanən baki!»

¹¹ Metər pi, Moiseyen iz kula alabi q'ayana
p'ə kərəm çombağən duneği. Q'ayanaxun t'etər
gele xene şağapi ki, dirist' azuk'enal, içoğoy
heyvanxonal üği bot'unşi.

¹² Ama Q'ONÇuĞon Moiseya q'a Aarona pine:
«İsə ki vən israilluğoy bəş Bez pit'oğə üst'ün laxi
Bez İvel baksuna çoyel tenan c'evk'i, şot'oğə Bezi
tadala oçala bast'un vəx q'ismat tene bakal».

¹³ Me c'eri xene s'i isə Merivane, * şot'o görə
ki, miya israilluğon Q'ONÇuĞoxun t'ot'ot'unpe,
Q'ONÇuĞon isə şot'oğə İz İvelluğane ak'est'ey. †

*Edomi padçağı israilluğə iz oçalaxun
c'ovaksuna icaza nu tast'un*

¹⁴ Qadeş şəhərexun Moiseyen Edomi padçağı
t'öğöl amdarxone yaq'abi ki, şot'o me əyitmoğə
p'ap'esp'at'un: «Mone, vi viçi İsraili nəsiləxun
bakalt'oğə vaxun xaişbsa! Beşi mani
əzyətxoxun c'ovaksuna avanu:

¹⁵ hələ beş kalboğoy döörəxun Misirə hariy-
oyan, boxoy vaxt'al t'e oçalayan yəşəyinşe. Ama

* **20:13 20:13** Meriva - "Meriva" əbrani muzin "t'ot'opsun"
upsune † **20:13 20:2-13** C'ey. 17:1-7; 1 K'or. 10:4

misirluğon nə beşi kalboğ, nəəl yax ği tet'un tade.

¹⁶ Yan Q'ONçuğoyan k'alpi xoyinşbi, Şot'inal yax inebaki, yaynak' çark'est'ala angele yaq'abi. Şot'in yax Misiri oçalaxun c'evək'i. İsə mone, yan Qadeş şəhəreyan, vi oçali q'a beş arane sa dənə zahmane bu.

¹⁷ İcaza tada vi oçali boşt'an c'ovaken! Nə vi əkinə, nə t'ulluğxo teyan çaxçuxk'al, vi kərizxoy xenaxunal teyan üğəl. Vi oçalaxun c'ovakamin, Kala yaq'axun † nə tərs, nə yön tərəf teyan c'eğal».

¹⁸ Ama edomluğon şot'o pit'un: «Beşi oçala efi tur tene laft'al! Bağaynan ef bəş q'ılincen c'eğalyan!»

¹⁹ İsrailluğon şot'oğə metərt'un coğab tadi: «Yan yaq'axun teyan c'eğal. Ef xenaxunal nə yan, nə beşi heyvanxon üğəyin, şot'ay tənginə tadalyan. Beşi çureğalo ef ölkinəxun c'ovaki taysune, q'erəz hik'k'al!»

²⁰ Amma edomluğon p'urumal "vəx beş oçala barteyanne" pi, israilluğoy bəş kala sa q'oşun girbit'un c'eri.

²¹ Hametər, edomluğon israilluğə içəğoy oçalaxun c'ovaksa bartet'unti, şoroxal fıripi q'erəz yaq'ent'un taşi.

Aaroni bisun

²² İsrailluyox Qadeş şəhərəxun yaq'a baft'i hari Hor buruğot'un c'eri.

† 20:17 20:17 Kala yaq' - mo q'uzey-güneya bakala ən kala, saat' laxeşi yaq'ey. Şot'ay s'iya "Padçağı yaq'al" next'uniy.

²³ Edomi zahmana İša, me Hor buruğoy tume Q'ONÇUĞON Moiseya q'a Aarona pine:

²⁴ «Aaroni t'e dünyəne, ef bavoğoy t'öğöl tağala vaxt' hari p'ap'ene. Vən Meriva xene t'öğöl Bezi əyitəxun c'ernan, kot'o görəl Aaron Zu israilluğə tadala oçala bağalatene.

²⁵ Aarona q'a iz ğar Eleazaral ext'i Hor buruğə laki.

²⁶ Oşa Aaroni loxol bakala bəyinşluğı paltara c'evk'i iz ğar Eleazara lapest'a. Aaron isə t'iya biyale, şo iz bavoğoy t'öğöl, t'e dünyəne tağale».

²⁷ Moiseyenal Q'ONÇUĞON içü əmirbi k'inək' bine. Şorox dirist' azuk'i piin bəş buruğot'un laşi,

²⁸ t'iyal Moiseyen Aaroni loxolxun bəyinşluğı paltara c'evk'i şot'ay ğar Eleazarane lapest'i. Aaron isə t'e buruğoy bel p'ure. Ş Moiseyen q'a Eleazaren buruğoxun şiri

²⁹ azuk'a Aaroni bisuni xavara tadat'an, israil-luğə otuz ği yast'un efi.

21

Aradi q'a iz t'öğöl bakala şəhərmoğoy əfçibaksun

¹ Negeva bakala Arad şəhəri padçağən inebaki ki, israilluyox At'arima tağala yaq'ent'un c'ovaksa. Me padçağ iç kənanluney. * Şo azuk'i loxol davinane c'eri, israilluğoxunal şot'ay kiyel əsir baft'aloroxe baki.

Ş 20:28 20:28 C'eys. 29:29; Ams'i oç. 33:38; K'an. 10:6 * 21:1 21:1 Ams'i oç. 33:40

² T'e vədə israilluğon elasp'i Q'ONČuĞo əyitt'un tadi: «Əgər Q'ONČuĞon me azuk'a beş kiyel tadayin, yan şot'oğə k'as'p'i içəğoy şəhərmoğoval dirist' şarpi şik'alyan». †

³ Q'ONČuĞon israilluğoy me xoyinşa inebaki. T'e aradlu kənanluğonal şot'oğə taşəvt'unk'i. Azuk'en şot'oğoy şəhərmoğoval, t'iya yəşəyinşala kənanluğoval dirist' əfçinebi. Mot'oxun oşa t'e gane s'iya Xormat'un ‡ laxi.

Moiseyi misəxun dizik' düzbsun

⁴ Azuk' Edom oçala nu bayseynak' Hor buruğoxun c'erit'uxun oşa fırlı Ç'oç'a dənizi yaq'ene taşı. Yaq' boxoyey, amdarxonal ene porttet'unbsay. §

⁵ Şot'oğon Buxaçuğoxun q'a Moiseyaxun t'ot'ot'unney: «Het'aynak'nan yax Misirəxun c'evk'i? Ams'i oçala biseynak'? Nə xeya bu, nə şuma bu! Me hik'k'ala nu dərmən ukuni loxolal ene bəğes teyan baksa!»

⁶ T'e vədə Q'ONČuĞon amdarxo duğseynak' azuk'i çurk'ala gala zəhərli dizik'xone yaq'abi, şot'oğon amdarxo dut'unğsay, azuk'i boş'tanal gele amdare p'uri.

⁷ İsrailuğon Moiseyi t'öğöl hari pit'un: «Yan günaxyan əşp'est'i, Q'ONČuĞoxun q'a vaxun t'ot'oyanpi, isə xoyinşyanbsa, Q'ONČuĞo k'alpa afırpa, bərkə yax me dizik'xoxun çark'est'ane!»

† 21:2 21:2 dirist' şarpi şik'alyan - Yəni içəğoy kiyel badi şəhərmoğoxun hikk'al tet'un ext'al, şot'oğə şarpi şipsunen bitova Q'onçuğə həsrəbalt'un. ‡ 21:3 21:3 Xorma - əbrani muzin

"əfçibsun" § 21:4 21:4 K'an. 2:1

Moiseyen Q'ONčuġo azuk'a görə xoyinşebi,
⁸ Q'ONčuġonal Moiseya pine: «Sa dizik' düzbi şot'o durut'i loxol ost'aarba. Barta dizik'en duġalt'in şot'ay loxolq'an bəġi, t'e vədə biyalatene».

⁹ Moiseyen misəxun sa dizik' düzbi şot'oboxoy durut'i loxol ost'aarebi, şual dizik'en duġayin me misnə dizik'i loxol bəġat'an bisateney. *

Moava taġala yaq'

¹⁰ İsrailuyox p'urum yaq'at'un baft'i, hariyal Ovot'a çurt'unpi.

¹¹ Ovot'axun c'eri Moavi bəġ c'eġalaç tərəf bakala ams'i oçala, İye-Avarima çurt'unpi.

¹² Memiin p'urum yaq'a baft'i hari Zered uk'ala dərənət'un çurk'ala ga düzbi.

¹³ Oşa t'et'iinal c'eri hari Arnon oqe t'iyəmi tərəf bakala ams'i oçalat'un çurpi. Memiin emorluġoy oçale burgesay. Arnon oq emorluġoy q'a Moav oçalxoy arane sa zahman k'inək'ey.

¹⁴ Me barada "Q'ONčuġoy davoox" uk'ala girke † boş metəre śam:

"...Sufina bakala Vahev q'a dəröox, Arnon,

¹⁵ Ar ayizexun c'ovaki Moavi zahmana bakala dərəni döşəxun taġala yaq'..."

¹⁶ T'et'iin israiluyox Beera ‡Q'ONčuġon Moiseya "azuk'a girba, şot'oġo xe tadoz" pi kərizin t'öġölt'un hari.

¹⁷ Miyat'un israiluġon me məġə məġpey:

* **21:9 21:9** 2 Padç. 18:4; Yeş. 3:14 † **21:14 21:14** - Mo ġeyin ġine beş kiyel nu bakala damna sa girke ‡ **21:16 21:16** Beer - əbrani muzin "kur"

«Jalpa buybaka, ay kəriz,
Me kərizin barada məğpanan!

¹⁸ Azuk'i kalat'oğon q'a s'ilat'oğon

İçoğoy kiin ak'est'i gala kaşesi kərizin barada
məğpanan!»

Oşa israilluyox ams'i oçalaxun Mat't'anat'un taşi.

¹⁹ Mat't'anaxun Naxaliela, Naxalielaxun Bamot'a,

²⁰ Bamot'axun isə Moav oçala bakala dərənət'un
taşi. T'iya bakala P'isk'a buruğoy belxun dirist'
me xam ga ak'esay.

*Sixon q'a Og padçağı israilluğə taşevksun
(K'an. 2:26-3:11)*

²¹ İsrailluğon emoruğoy padçağ bakala
Sixoneynak' xavar yaq'abi pit'un:

²² «Xaişyanbsa, vi oçalaxun c'ovaksuna yax
icaza tada! Nə ef əkini, nə t'ulluğxoy boş't'an
teyan c'ovakal, ef kərizxoy xenaxunal teyan
üğəl. Vi oçalaxun c'ovakamin Kala yaq'axun
teyan c'eğal».

²³ Ama Sixonen israilluğə iz oçalaxun
c'ovaksuna icaza tene tadi. Şot'in dirist' iz
q'oşuna girbi davabseynak' ams'i oçala şot'oğoy
bəşe c'eri. Şorox Yahaşa ço-çoya hari davat'unbi.

²⁴ Davina isə israilluğone taşeri. Şot'oğə
q'ilincen k'as'p'i içəğoy oçalxo Arnon oqaxun
burqi Yabboga oqe t'öğöl bakala ammonluğoy
zahmanal şirik' ext'undi. Ammonluğon isə
içəğoy oçalxo saat't'un q'orişbsay.

²⁵ Hametər, israilluğon emoruğoy Xeşbon
şəhərə q'a şot'ay hərrəmine bakala ayizmoğə
saal mandi bito şəhərmoğə kiyel badi başi t'iya
art'unşi.

26 Xeşbon emorluğoy padçağ Sixoni arśala şəhərey. Şot'in Moavi mot'oxun bəş baki padçağaxun davabi şot'oğoy Arnon oqal śirik' bakala bito oçalxo ext'ened.

27 Me barada məğəl śameśened:
"Xeşbona ekinan!

Barta Sixoni şəhər təzədənq'an biq'eśi,
Barta iz bariyox təzədənq'an laxeśi!

28 Xeşbonaxun arux,
Sixoni şəhərexun yalove c'eri!
Şot'in Moav oçala bakala Ar şəhərə,
Arnon oqe t'öğöl bakala jəyurxo bul k'os'balxo
Bok'osp'i śinepi! Ş

29 Vay vi hala, ay Moav!
Ay Kemoşa içeynak' buxaçux bi azuk', əfçinbaki!
Kemoşen vi ġarmoğə dədərgünebİ,
Vi xuyərmoğə emorluğoy padçağ Sixoni kiyele
efi!

30 Mone, vəx tayanşeri,
Xeşbonaxun Divon şəhərəl śirik' əfçıyanbi.
Medvanaxun burqi Nofahal śirik' hər tərəfə
vərənyanbi".

31 Hametər, israilluyox baśi emorluğoy oçala art'unśi.

32 Oşa Moiseyen Yazer şəhərəl piyexun
c'vakest'eynak' amdarxone yaq'abi. İsrailuğon
şot'ay hərrəmine bakala ayizmoğoxunal
emorluğə şep'eśi baśi t'ıya art'unśi.

33 T'et'iin c'eri israilluyox yaq'en Başanaçt'un
laśi. Başani padçağ bakala Ogenal dirist' iz

q'oşuna girbi şot'oğoy bēşe c'eri. Şorox hari Edreyi şəhəre davinat'un c'eri.

³⁴ Q'ONČuğon Moiseya pine: «Şot'oxun ma q'ıba! Zu şot'o içuval, iz q'oşunal, iz ölkınəl va ene tadez! Xeşbona arşı emorluğoy padçağ Sixoni bel eçerit'u şot'ay belal eçalnu».

³⁵ İsrailuğonal şot'oğö bitova - Oga içü, iz ğarmöğö, dirist' iz q'oşuna - k'as'p'i şit'unpi. Şot'oğoxun sayco dirist' tene mandi, içöğoy oçalxoval bito israiluğone mandi.

22

*Moavi padçağ Balagen israiluğö
q'arğışbseynak' Bileama k'alpsun*

¹ İsrailuğox p'urum yaq'at'un baft'i, hariyal Moavi düzənluğa, İordan oqe t'öğöl bakala Yerixon şəhəri bēş çurt'unpi.

² T'e vədə Moavi padçağ Şip'p'ori ğar Balagey. Şot'in israiluğon emorluğoy bel eçerit'oğoy barada ibakeney.

³ İsrailuğox t'ema gelet'unıy ki, moavluğon şot'oğoy s'ıya ibakat'an q'ıyat'un bafst'ay, içöğö t'ut'ultinene haq'say.

⁴ Moavluğon Midyani ağsaq'q'alxo metört'un pi: «Belin sürünen çöle o nu efalt'ullarik', me azuk'enal beş loxol eğayın, yaxun hik'k'al tene efal».

Moavi padçağ bakala Şip'p'ori ğar Balagenal

⁵ iz amdarxo Yevfrat oqe t'öğöl bakala P'et'or şəhəre yaq'anebi ki, t'ıya yəşəyınşala Beori ğar Bileama metört'at'un pi: «Misirəxun c'eri

azuk'en hər ganu haq'layinşene, isəəl hari beş oçalxoy t'öğöle çurpe. *

⁶ Xaişezbsa, zaynak' sa əş biq'a: eki me azuk'i loxol q'arğış şipa. Şorox həysə zaxun zorbat'un, ama şot'oğö zəyifləyinşa ki, zu şot'oğö bez ölkinəxun şəp'eşes bakaz. Axırı vi tadala xeyir-bərəkəten biq'ala k'inək', vi şik'ala q'arğışenal bineq'sa».

⁷ Moavi ağsaq'q'alxo q'a Midyani ağsaq'q'alxoval Bileami me biq'ala əşlin haq'q'a ext'i şot'ay t'öğölt'un taşi. Şot'oğon Balagi pit'oğ bitova p'ap'est'unbi.

⁸ Bileamen şot'oğö pine: «Vən me üşe memiya mandanan, zu Q'ONÇuğoy coğaba avabaki vəx uk'oz». Moavi ağsaq'q'alxoval şot'ay k'oya mant'undi.

⁹ Buxačux Bileameynak' ak'eşi pine: «Vi k'oya bakala me amdarxo şuva?»

¹⁰ Bileamen Buxačuğö coğabe tadi: «Moavi padçağ Şip'p'ori ğar Balagene me amdarxo yaq'abe ki, za izi muzin me əyitmoğö uk'at'un:

¹¹ "Mone, Misirəxun c'eri azuk'en oçali çoya haq'layinşene. Xaişezbsa, eki me azuk'i loxol q'arğış şipa ki, zəyifləyinşəkeq'at'un, zuval şot'oğö bez ölkinəxun şəp'eşes bakaz"».

¹² Buxačuğon Bileama pine: «Ma taki me amdarxoxun. T'e azuk'i loxol q'arğış şimapa, şot'o görə ki, şot'oğö Zuz xeyir-bərəkət tade».

¹³ Əyc'indəri savaxt'an Bileamen hayzeri Balagi yaq'abi ağsaq'q'alxo pine: «Ef ölkinə qay-bakanan, Q'ONÇuğon za vəxun taysa bartenne».

* 22:5 22:5 2 P'y. 2:15-16; İud. 1:11

14 Moavi ağsaq'q'alxoval Balagi t'öğöl qaybaki pit'un: «Bileam yaxun tene hari».

15 T'e vədə Balagen süft'int'uxun gele hamal şot'oğoxun hörmətlu saal s'ila ağsaq'q'alxone yaq'abi.

16 Şorox Bileami t'öğöl hari pit'un: «Şip'p'ori ğar Balagen metəre nex: "bez vaxun xaişp'i əşlə nu bsuna kapmapa.

17 Va k'ə çurensa tadoz, k'ə uk'alnu booz, saycə eki me azuk'a q'arğışp'a"».

18 Bileamen Balagi amdarxo coğab tadi pine: «Balagen za iz q'ızılən q'a gümüşən buy k'ojal tadayin, zu bez Buxačux bakala Q'ONčuğoy nu çureğala sal sa əş biq'es tez bakon.

19 Ama Q'ONčuğon za ene k'ə upsuna avabak-sun çurnansasa, vənal me üşe memiya mandes banankon».

20 Buxačuxal t'e üşe Bileama ak'eşi şot'o pine: «İsə ki me amdarxo va taşt'at'un hare - taki! Ama Zu va k'ə uk'ozsa, şot'o balnu».

Bileami elem

21 Savaxt'an Bileam hayzeri, iz elemi loxol palanal laxi Moavi ağsaq'q'alxoxun sagala yaq'ane baft'i.

22 Ama şo tağat'an Buxačuğoy əcuğ bəc'ük'eşi, Q'ONčuğoy angelal bəş c'eri iz yaq'a bot'esedi. Bileam elemi loxol tanesay, içuxunal p'ə nökar.

23 Elemen ak'at'an ki, yaq'e boş iz kiyel q'ilıncıla Q'ONčuğoy angele çurpe, yaq'axun c'eri q'oruğane başı. Bileamen isə elema duği şot'o yaq'a qayst'une çureşi.

24 T'e vədə Q'ONČuĞoy angel p'ə t'ulluği aranexun c'ovakala cıgırı boşe çurpi, t'e cıgırı p'ə tərəfəl bariney.

25 Elemen Q'ONČuĞoy angela ak'i barinane ləçəq'eşi. Bileami tural elemi q'a barin arane mandi p'ət'eşi. Bileamen elema p'urum duğsane burqi.

26 Q'ONČuĞoy angel isə samalal bəş hari t'etər sa q'ac' galane çurpi ki, t'iya nə tərse fıripes baksay, nə yön.

27 Bileami arsi elemen mot'o ak'i çökedi, Bileamiyal əcuğon biq'i elema k'ovalen duğsane burqi.

28 T'e vədə Q'ONČuĞon elema muzalebi, şot'inal Bileama pine: «Zu va k'əz be ki, mo xibimci kərəme za t'ap'enne?»

29 Bileamen elema pine: «Za lağan haq'sa? Həysə bez kiyel sa q'ılnc bakayin va besezbol!»

30 Elemen Bileama coğabe tadi: «Zu vi həmişənin c'idala elem tezu ki, memaçığ metər bezu?» Bileamen "təə" pine.

31 T'e vədə Q'ONČuĞon Bileami pulmoğoy qayepi, şot'inal cıgırı boş çurpi iz kiyel q'ılnc bakala Q'ONČuĞoy angela anek'i. Bileamen çökt'i iz çoya oçalane duği.

32 Q'ONČuĞoy angelen isə pine: «Me elema het'u görən xib kərəm t'api? Vi bəş c'eri va taysa nu bark'alo zuzu. Şot'o görə ki, vi biq'ala əş Q'ONČuĞoy piyes düzgün tene ak'esa.

33 Elemen za ak'i xib kərəm bez bəşt'an fıripini. Ke elem nu fıripiniy, isə vi elmoğoy haq'ezuy! Ama elema galdala tezuy!»

34 Bileamen Q'ONçuğoy angela pine: «Günaxez əşp'est'i! Vi bez bəšt'an bot'est'una tez away. Ama bez biq'ala əş vi piyes pise ak'esasa, zu qaybakaz».

35 Q'ONçuğoy angelen Bileama metəre pi: «Taki me amdarxoxun, ama saycə zu va uk'alt'oğə əyitp'a». Bileamal Balagi yaq'abi ağsaq'q'alxoxun sagala taneşi.

Balagi Bileama aksun

36 Balagen Bileami eysuna ibaki, iz bəş c'eyseynak' Arnon oqe t'öğöl bakala İr-Moav şəhərene taşi. Me şəhər iz oçali lap t'e beley.

37 Balagen Bileama pine: «Vi bač'anexun hema kərəm amdarez yaq'abi, het'u görə ten eysay? Yəni va vi çureğala k'inək' tez yaq'a badaliy?»

38 Bileamen Balaga metəre coğab tadi: «Mone, həysə vi t'öğölzu. Ama k'ə pesez baksa? Buxaçuğon za bürüşalt'oğoxun avuzin hik'k'al pes tez bakon».

39 Oşa Balagen Bileama Qiryat'-Xuśot' şəhərene taşeri.

40 Miya Balagen, beliğoy q'a eğelxoy q'urban şampest'i t'e yeq'axun Bileama q'a şot'oxun bakala ağsaq'q'alxone tadi.

41 Əyc'indəri savaxt'an isə Balagen Bileama ext'i Bamot' Baal † uk'ala bul k'os'bala galane laşi. Memiin Bileamen israilluğoy çurk'ala gane sa t'öğə aneksay.

† 22:41 22:41 - Bamot' Baal, yəni Baali təpox. Baal moavluğoy bul k'os'bala binik' buxaçuxey

23

*Bileami samci kərəm israiluğoy barada
Buxaçuğoy əyitmoğon əyitpsun*

¹ Bileamen Balaga pine: «Zaynak' memiya vüğ dənə q'urban eçala ga düzbest'i, şamseynak'al vüğ dənə arak' saal vüğ dənə q'oç eğel eçest'a».

² Balagenal Bileami pi k'inək' bine. Şot'oğon hər q'urban eçala gala sa arak' q'a sa dənə q'oç eğelt'un q'urban eçeri.

³ Oşa Bileamen Balaga pine: «Hun miya, me eçeri q'urbanxoy t'öğöl çurpa, zu isə samal t'öğx tağoz. Bərkə Q'ONÇUX za ak'eşi İzi əyitə pine. Za k'ə uk'ayin, hari va avabakest'oz». Metər piyal şo ams'i sa təpinene laşi.

⁴ Miya Buxačux Bileama ak'eşi, Bileamenal Şot'o pine: «Vüğ dənə q'urban eçala gaz düzbest'i, hərt'ay loxolal sa arak' q'a sa dənə q'oç eğelez q'urban eçeri».

⁵ Q'ONÇUĞON isə Bileama k'ə upsun lazım baksuna zombi tapşurebi: «İsə taki, mot'oğon Balaga p'ap'esp'a».

⁶ Bileam Balagi t'öğöl qayebaki, hariyal Balaga q'a şot'oxun hari ağsaq'q'alxo eçeri q'urbanxoy t'öğöl çurpine ak'i.

⁷ Şo t'et'iya p'ap'ala k'inək' iz jomoxun Buxaçuğon zombi əyitmuxə c'eri:

«Balagen, Moavi padçağen za Aramaxun,
Bəğ c'eğala tərəf bakala buruxmoğoxune eçeri;

"Eki zaynak' İak'ova q'arğışp'a,
Me israiluğoy loxol q'arğış şipa" pine.

⁸ P'oy Buxaçuğon nu ləənətbit'u zu hetər ləənətbaz?

Buxaçuğon nu q'arğışbit'u zu hetər q'arğışbaz?
⁹ Mone, q'ayoğoy belxun şot'oğoy loxolez bəğsa,
Təpoğoy loxolxun şot'oğoz aksa!

Me azuk' iç sa ölkəne,
Sal sa azuk' şot'ay tay tene!

¹⁰ İak'ovi nəsiləxun bakalt'oğə böq'əlpəsun q'ume
dənoğə böq'əlpəsun k'inək'e:

Şot'oğoy bip' payaxun sunt'u tenan böq'əlk'on!
Barta bez bisunal me düzgünt'oğoy bisunal-
larik'q'an baki,

Barta bez axıral mot'oğoy axırallarik'q'an baki!»

¹¹ Balagen Bileama pine: «Hun mo za k'ən bi?
Zu va bez düşmənxoy loxol q'arğış şipseynak'ez
k'alpi, hun isə xeyir-bərəkəti şot'oğoxun kam nu
baksunaxunen əyite!»

¹² Bileamen coğabe tadi: «Zu Q'ONÇUĞON za
pit'oğoz nex».

*Bileami p'əmcı kərəm israiluğoy barada
Buxaçuğoy əyitmoğon əyitpsun*

¹³ T'e vədə Balagen şot'o pine: «Eki zaxun
q'erəz gala tağən. T'et'iin azuk'a ak'es bakalnu,
ama bitova təə, içoğoy çurk'ala gane sa t'öğə.
Bezi əyitə oq'a ma saka, eki t'e ganuxun şot'oğə
q'arğışp'a».

¹⁴ Hametər, Balagen şot'o P'isk'a buruğoy bel
bakala Şofim, yəni "bəğala ga" uk'ala q'oruğane
taşeri. Miya vüğ dənə q'urban eçala ga düzbi,
hərt'ay loxolal sa arak' q'a sa dənə q'oç eğelt'un
q'urban eçeri.

¹⁵ Bileamen Balaga pine: «Hun miya, me
bok'osp'i q'urbanxoy t'öğöl çurpa, zu isə samal
bəş taşi Buxaçuğoxun əyitk'oz».

16 Q'ONČuxal Bileama ak'eşi şot'o k'ə upsun lazım baksuna zombi tapşurebi: «İsə taki, mot'oğö Balaga p'ap'esp'a».

17 Bileam Balagi t'öğöl qayebaki, hariyal şot'o eçeri q'urbanxoy t'öğöl Moavi ağsaq'q'alxoxun sagala çurpine ak'i. Balagen şot'oxun xavare haq'i: «Q'ONČuğon k'ə pi?»

18 Bileameni jomoxunal Buxaçuğon zombi əyitmuxe c'eri:

«Ay Balag, vi ümüxxo qaypa ibaka!

Ay Şip'p'ori ğar, za ümüxlaxa!

19 Əfçiduğsun amdarxoy əşe,
Fikirə badalbsun - me dünyəni ədəte!

Buxačux isə İz pi əyiti loxol çurene,
Şot'ay əyit tadi bex nu p'ap'espsuna itenbakon!

20 Şot'in xeyir-bərəkətə ene tadene,
Zu isə me əyitmux bez jomoxun barst'eynak'ez
c'ək'eşe!

21 İak'ovi nəsiləynak' q'ı tene bu,

İsrailluğoy belxun sa popal tene bital!

Şot'o görə ki, içoğoy Buxačux bakala Q'ONČux
içoğoxune,

Şot'ot'un padçağ pi k'ale!

22 Çölnə öküzü zore tade şot'oğö Buxaçuğon,
Misirəxune c'evk'e şot'oğö!

23 İak'ovi nəsilə əfçibsun falçin əş tene,

İsrailluğö sal sa cadunen biteneq'sa!

Me azuk'a bəği "mo Buxaçuğoy əşe!" next'un.

24 Bəğa hetəre aslan k'inək' əqesa,

Hetəre şir k'inək' amdarxoy loxol taysa!

İz kiyel baft'alt'u şark'amin,

Şot'ay p'iya xupi çark'est'amin kul tene haq'on!»

25 T'e vədə Balagen Bileama pine: «Efa! Nə vi q'arğışsunaz çuresa, nə xeyir-bərəkət k'alpsuna!».

26 Bileamen isə "va tez pi ki, Q'ONČuĞon za k'ə uk'alesa, şot'o booz?" pine.

Bileami xibimci kərəm israilluğoy barada Buxaçuğoy əyitmoğon əyitpsun

27 T'e vədə Balagen Bileama metərə pi: «Va q'erəz sa gala taşoz! Banekon Buxaçuğon şot'oğə vi t'et'iine çurpi q'arğışsuna çuresa».

28 Hametər, Balagen Bileama P'eor buruğoy bele taşeri. T'e ganuxun dirist' t'e xam ga ak'esay.

29 Miya Bileamen Balaga pine: «Zaynak' memiya vüğ dənə q'urban eçala ga düzbest'i, şamseyinak'al vüğ dənə arak' saal vüğ dənə q'oç eğel eçest'a».

30 Balagen Bileamen pi k'inək' bine, hər q'urban eçala gane loxolal sa arak' q'a sa dənə q'oç eğel q'urban şampi bok'osebi.

24

1 Bileamen isə Q'ONČuĞoy israilluğoxun İz xeyir-bərəkətə nu kambsuna q'amışakeney. Şot'in ene me azuk'i loxol q'arğış şipseyinak' Buxaçuğoy içə sa nişan ak'est'una tene yaqbəgi, ama fırlıpi t'e xam oçalxone bəgi.

2 T'iyal içəğoy tayfoğə görə dəst'ə-dəst'ə çurpi israilluğə ak'at'an, Buxaçuğoy uruf şot'ay loxole şiri,

3 şot'o me əyitmoğone pest'i:
«Mone, Beori ğar Bileamene əyite!
Mone, efi nu ak'alt'oğə ak'alt'in,

⁴ Efi nu ibakalt'oğo ibakalt'in,
Ala Arşit'ay xoji iz piin bəş eğalt'in,
Şot'ay əyitmux iz ümüğo laft'at'an oçala
past'eğalt'ine əyite!

⁵ Ay İak'ovi nəsiləxun bakalorox, efi çadırxo,
Ay israilluyox, efi mandala ganxoy gözəlluğa əyit
butene!

⁶ Xene t'öğöl bakala o k'inək'nən,
Oqe börine bakala bağça,
Q'ONçuğon yaratmışi gözəl xodurxo,
Arxe bel bakala şame xod k'inək'nən!

⁷ Efi xazalxoxun xene k'at'e,
Vəxun bitala hər şil göyünebaksa!
Ef padçağ Agak' padçağaxunal üst'ün bakale,
T'e padçağluğən bitova çökt'est'ale!

⁸ Buxaçuğon şot'oğo Misirəxune c'evk'i,
Şot'oğo çölnə öküzi zore tadi!
Düşmənşox pula haq'alt'un,
Üq'ənxo xoxp'i oxurxo şot'oğoy tapane
basakalt'un!

⁹ Mone, cupsuna həzir sa şir k'inək't'un arst'a,
Bask'i aslani gözəlluğə bu şot'oğost'a!
Şuva t'e aslana İša bitalo? *

Vəx xeyir-bərəkət tadalt'aynak' xeyir-bərəkət,
Vəx q'arğışbalt'aynak' isə bələne eysa!» †

¹⁰ T'e vədə Balagi əcuğon Bileami loxol t'etərə
biq'i ki, iz kulmoğo yumburuğ biq'i pine: «Va
bez düşmənşox q'arğışbseynak'ez k'alpe, yoxsa
şot'oğo xeyir-bərəkət tast'eynak'? Mo xibimcine
ki, şot'oğoynak' xeyir-bərəkəten k'ale.

* 24:9 24:9 Burq. 49:9; Qay. əyit 5:5 † 24:9 24:9 Burq. 12:3

¹¹ Aça bez piin bəšt'an! C'eki taki vi k'oya! Va şaat' hörmətbi vi çureğala k'inək' yaq'abadala fikirzax buy! Ama Q'ONčuğon mot'o vaynak' gelene ak'i».

¹² Bileamen isə Balaga pine: «Bez bač'anexun yaq'abit'oğö tez pey ki,

¹³ Balagen za iz q'ızılən q'a gümüşən buy k'ojal tadayin, zu Q'ONčuğoy əyitəxun c'eri hik'k'al bes tez bakon? Zu saycə Q'ONčuğon za uk'alt'oğö uk'oz.

¹⁴ Baneki, zu bez ölkinə qayezbaks! Ama barta hələ ki miyazu, va sa şeyal p'ap'esp'az. Gələcəyə me azuk'en vi azuk'i bel eçalt'oğö ibaka!»

Bileami gələcəyə aksun

¹⁵ Metər piyal Bileamen gələcəyə ak'ala əyitmöğone iz jomoxun c'evk'i:

«Mone, Beori ğar Bileamene əyite!

Mone, efi nu ak'alt'oğö ak'alt'in,

¹⁶ Efi nu ibakalt'oğö ibakalt'in,

Bitova Bacarbalt'uxun içeynak' sa alaxun
ak'esun bakalt'in,

Şot'ay əyitmux iz ümöğö laft'at'an

Oçala past'eğalt'ine əyite!

¹⁷ Şot'o azaksa, ama İša tene!

İz loxolez bəğsa, ama hələ əxile!

Mone, muč'uli c'eğalt'ullarik' İak'ovi
nəsiləxunal sa padçağə c'eysa,

İsrailluğoy boşt'an zorba sa kule eşqesa!

Moavluğoy bula č'ak'k'ale,

Şet'luğoy məyə duği şark'ale!

18 Edoma iz kiyel badale, Seyra ext'i iz düşməne
turin oq'a sakale!

İsrailluyox isə əqəğalt'un!

19 İak'ovi nəsiləxun c'erit'in şot'oğö iz zora
ak'est'ale,

Şəhəre mandit'oğö bitova k'as'p'i şik'ale!»

*Bileami israilluyox nu bakalt'oğöy gələcəyə
ak'i əyitpsun*

20 Oşa Bileamen amalegluğöy gələcəyəne ak'i
pi:

«Millətxoy boş bitot'uxun üst'üne amalegluyox,
Ama içöğöy axır butene - bito əfçibakalt'un!»

21 Bileamen K'ayini nəsiləxun bakalt'oğöy
gələcəyəne anek'i:

«Mone, həysə efi k'ojurxoynak' q'ı butene,
Efi mes q'ayani loxol k'inək'e.

22 Ama, ay K'ayınaxun bakiyorox, aşurluyox
əğat'an xarabına mandalnan!

Bito şot'oğöy kiyel baft'alnan».

23 Bileamen gələcəyəne ak'i saal pine:

«Vay, Buxaçuğon mot'oğö bit'uxun oşa şuva
dirist' mandon?

24 K'it't'impluyox gəmiğon əğalt'un,
Şot'oğön Aşura q'a Evera ext'alt'un,
Ama axırda içanal əfçibakalt'un».

25 Mot'oxun oşa Bileam c'eri iz k'oya, Balagal iz
k'oyane qaybaki.

25

*İsrailluğöy P'eor buruğö binik' buxaçuğö bul
k'os'bsun*

¹ İsrailloyox Şit't'im uk'ala dərənə bakat'an, şot'oğon miya içoğoynak' moavluğoxun çuux haq'sat'un burqi.

² Me çupuxxon içoğoy buxaçuxxoynak' şameğala q'urbani q'onaxluğxo işq'arxo k'alt'unney, israilluğonal taşi t'e q'urbani yeq'axun kəyi şot'oğoy buxaçuxxo bult'un k'os'bsay.

³ Metər, israilluyox Q'ONçuğoxun əxilbaki P'eor buruğoy bel bakala binik' buxaçux Baalat'un bul k'os'bsa burqi, Q'ONçuğoy əcuğal israilluğoy loxol bəc'ük'eşi.

⁴ Q'ONçuğon Moiseya pine: «Azuk'i boşt'an me günaxeynak' yaq' qaypi kalat'oğoy bitova bəsp'i şot'oğoy meydxo camaati piin bəş suruk'p'a. Metər, Bezi israilluğoy loxol bakala əcuğə bask'est'alnu, Zuval şot'oğoy me əsp'est'i günaxi loxolxun c'ovakoz».

⁵ Moiseyenal israilluğoy boş bakala divanbalxo pine: «Barta ef boşt'an hərt'in P'eor buruğə bakala Baala bul k'os'balt'oğoxun iz çalxalt'oğə bəsp'eq'an».

⁶ Me vədine sa israillunen İvel çadırı bağala gane bəş önek'ala Moiseyi q'a dirist' azuk'i piin bəş sa midyanlu çuuxe k'oya eçeri.

⁷ Mot'o ak'ala Eleazari ğar, bəyinş Aaroni isə nəvə bakala P'inexasen amdarxoy boşt'an hayzeri, iz kiyel xişt'ik' ext'i

⁸ t'e israillun bač'anexun çadırane başi. Şot'in me xişt'ik'ə işq'araxun deşibi c'ovakest'i çuğoy tapanene basaki. Hametər, şot'oğoy p'rannal

- israillunal, t'e çuğoval t'e çadiri boş be-sebi. İsrailluğoy boş bakala k'as'esun hat'e saad çurepi.

⁹ Buxaçuğon yaq'abi azaraxun k'as'esit'oğoy say isə saq'obip' hazar taney.

¹⁰ Q'ONÇUĞON Moiseya pine:

¹¹ «Bëyinş Aaroni nəvə, Eleazari isə ğar bakala P'inexasen Bezi israilluğoy loxol bəc'ük'eşi əcuğə çaxevek'i. Şot'in me azuk'i Za ak'est'i hörmətsuzluğa tene portp'i, şot'o görəl Zu şot'oğə Bez əcuğon biq'i tez əfçibi.

¹² İsə şot'o upa ki, Zu içuxun serluğ q'a xeyir-bərəkət eçala sa irəzilügez ğaçesa.

¹³ Me irəzilüğa görəl həmişəluğ bëyinşluğbsun şot'aynak' q'a şot'oxun oşa eğala nəsili bakale. Şot'in izi Buxaçuğə hörmətsuzluğ ak'est'una tene portp'i. Metərluğenal, israilluğoy günaxa os'k'i taneşeri».

¹⁴ Midyanlu çuğoxun sagala besp'i israillu işq'ari s'i Saluni ğar Zimriney. Şo Şimeoni tayfinaxun bakala sa nəsili kaloney.

¹⁵ Besp'i midyanlu çuğoy s'i isə Şure xuyər K'ozbiney. Şural Midyana bakala sa nəsili kaloney.

¹⁶ Q'ONÇUĞON Moiseya pine:

¹⁷ «Midyanluğoy loxol düşmən piin bëğanən, şot'oğə k'as'p'anan.

¹⁸ Şot'o görə ki, şot'oğont'un vəx P'eora bakala binik' buxaçuğə bul k'os'best'i. Mot'o görə vəynak' k'as'esun eğat'an, içəğoy kalat'ay

xuyərə, P'inexasen besp'i K'ozbina vəynak' yaq'abiyoroxal şoroxe». *

26

İsrailluğoy p'əmcı kərəm siyəyinə haq'esun

¹ İsrailluğoynak' yaq'abi k'as'esun çurpit'uxun oşa Q'ONÇUĞON Moiseya q'a Aaroni ğar bəyinş Eleazara pine:

² «Bito israillu işq'arxo içoğoy əsilə q'a ailinə görə siyəyinə haq'anan. Siyəyinə q'a saal q'a yəşəxun ala bakala, davina tayes bakala işq'arxo haq'eğale».

³ Moavi düzənluğa, İordan oqe t'öğöl bakala Yerixon şəhəri bəş Moiseyen q'a bəyinş Eleazaren amdarxoxun əyitp'i pit'un:

⁴ «Q'ONÇUĞON Moiseya əmirbi k'inək', q'a saal q'a yəşəxun ala bakala bito işq'arxo siyəyinə haq'anan!»

Misirəxun c'eri israilluyox isə moroxey:

⁵ İsraili süft'in ğar Ruvenaxun bakiyorox:

Xanok' q'a şot'oxun baki nəsil;

P'allun q'a şot'oxun baki nəsil;

⁶ Xesron q'a şot'oxun baki nəsil

saal K'armi q'a şot'oxun baki nəsil.

⁷ Metərluğen, Ruvenaxun baki tayfın boş 43 730 tane buy.

⁸⁻⁹ İz ğarmogoy s'i Nemuel, Dat'an saal Aviram bakala Eliav hame P'alluni ğarey. Dat'an q'a Aviram israilluğoy boş s'ila amdarxoney. Şoroxey

* 25:18 25:1-18 1 K'or. 10:8

Goraxi tərəf c'ovaki Moiseyaxun q'a Aaronaxun t'ot'opsunen Q'ONÇuĞoy əleyinə əqəşiyorox.

¹⁰ Şot'oğoy turin oq'ane oçal qıbakey, şot'oğone oçalen Goraxaxun sagala q'uc'p'ey. İçoğ gərbaki 250 tan isə bok'i bart'undi. Moval israilluğoynak' sa dərse baki.

¹¹ Ama Goraxi ğarmoğ Q'ONÇuĞon tene galdi.

¹² Simeonaxun bakiyorox:

Nemuel q'a şot'oxun baki nəsil;

Yamin q'a şot'oxun baki nəsil, Yak'in q'a şot'oxun baki nəsil.

¹³ Şerax q'a şot'oxun baki nəsil

saal Şaul q'a şot'oxun baki nəsil.

¹⁴ Metərluğen, Simeonaxun baki tayfin boş 22 200 tane buy.

¹⁵ Gadaxun bakiyorox:

Şefon q'a şot'oxun baki nəsil;

Xagi q'a şot'oxun baki nəsil;

Şunin q'a şot'oxun baki nəsil;

¹⁶ Ozni q'a şot'oxun baki nəsil;

Eri q'a şot'oxun baki nəsil;

¹⁷ Arod q'a şot'oxun baki nəsil

saal Areli q'a şot'oxun baki nəsil.

¹⁸ Metərluğen, Gadaxun baki tayfin boş 40 500 tane buy.

¹⁹ İuday ğarmoğoy p'öğö Er q'a Onan Misirə tağalt'uxun bəş, hələ Kənan oçala bakat'an p'uret'uniy. *

²⁰ Metərluğen, İudaxun bakala tayfa mot'oğoxune eysa:

* 26:19 26:19 Burq. 46:12

- Şela q'a şot'oxun baki nəsil;
P'ereś q'a şot'oxun baki nəsil
saal Şerax q'a şot'oxun baki nəsil.
²¹ P'ereśaxun isə moroxe bakey:
Xeśron q'a şot'oxun baki nəsil
saal Xamul q'a şot'oxun baki nəsil.
²² İuday tayfin boş 76 500 tane buy.
²³ İssak'araxun bakiyorox:
T'olay q'a şot'oxun baki nəsil;
P'uvay q'a şot'oxun baki nəsil;
²⁴ Yaşuv q'a şot'oxun baki nəsil
saal Şimron q'a şot'oxun baki nəsil.
²⁵ Metərluğen, İssak'araxun baki tayfin boş 64
300 tane buy.
²⁶ Zevulunaxun bakiyorox:
Sered q'a şot'oxun baki nəsil;
Elon q'a şot'oxun baki nəsil
saal Yaxleel q'a şot'oxun baki nəsil.
²⁷ Metərluğen, Zevulunaxun baki tayfin boş 60
500 tane buy.
²⁸ İosifaxun iz ğarmux Menaşşe q'a
Efraimaxun baki tayfooxe eya.
²⁹ Menaşşenaxun bakiyorox:
Maxir q'a şot'oxun baki nəsil. Maxiraxun
Gileade bakey.
³⁰ Gileadaxun isə moroxe bakey:
İezer q'a şot'oxun baki nəsil;
XeLeq' q'a şot'oxun baki nəsil;
³¹ Asriel q'a şot'oxun baki nəsil;
Şexem q'a şot'oxun baki nəsil;
³² Şemida q'a şot'oxun baki nəsil
saal Xefer q'a şot'oxun baki nəsil.

- ³³ Xeferi ğar Šelofexadaxun ğar tene bakey,
şot'ay Maxla, Noa, Xok'la, Milk'a saal T'irša
s'iyeñ xuyərmuxe buy.
- ³⁴ Metərluğen, Menaşşenaxun baki tayfin boş 52
700 tane buy.
- ³⁵ Efraimaxun bakiyorox:
Şut'elax q'a şot'oxun baki nəsil;
Bexer q'a şot'oxun baki nəsil
saal T'axan q'a şot'oxun baki nəsil;
- ³⁶ Şut'elaxi nəsil isə şot'oxun baki ğar Eranax-
une eysa.
- ³⁷ Metərluğen, Efraimaxun baki tayfin boş 32 500
tane buy. Morox bito İosifaxun bakiyoroxe.
- ³⁸ Binyaminaxun bakiyorox:
Bela q'a şot'oxun baki nəsil;
Aşbel q'a şot'oxun baki nəsil;
Axiram q'a şot'oxun baki nəsil;
- ³⁹ Şefuf q'a şot'oxun baki nəsil
saal Xufam q'a şot'oxun baki nəsil.
- ⁴⁰ Belay nəsil isə şot'oxun baki ğarmux Ard q'a
Naamanaxune eysa:
Ard q'a şot'oxun baki nəsil;
Naaman q'a şot'oxun baki nəsil.
- ⁴¹ Metərluğen, Binyaminaxun baki tayfin boş 45
600 tane buy.
- ⁴² Danaxun baki tayfa iz ğar Şuxamaxune
eysa.
- ⁴³ Metərluğen, Şuxamaxun baki'toğoy say 64 400
taney.
- ⁴⁴ Aşeraxun bakiyorox:
İmna q'a şot'oxun baki nəsil;
İşvin q'a şot'oxun baki nəsil

saal Beria q'a şot'oxun baki nəsil.

⁴⁵ Beriay nəsil şot'oxun baki ğarmux Xever q'a
Malk'ielaxune eyşa:

Xever q'a şot'oxun baki nəsil;

Malk'iel q'a şot'oxun baki nəsil.

⁴⁶ Aşeri Serax s'iyen sa xuyərəl buney.

⁴⁷ Metərluğen, Aşeraxun baki tayfin boş 53 400
tane buy.

⁴⁸ Naft'alinaxun bakiyorox:

Yaxseel q'a şot'oxun baki nəsil;

Guni q'a şot'oxun baki nəsil;

⁴⁹ Yeşer q'a şot'oxun baki nəsil
saal Şillem q'a şot'oxun baki nəsil.

⁵⁰ Metərluğen, Naft'alinaxun baki tayfin boş 45
400 tane buy.

⁵¹ İsrailuğoxun siyəyinə haq'əsi bito işq'arxoy
say 601 730 taney.

⁵² Q'ONÇuğon Moiseya metəre pi:

⁵³ «Oçala me tayfoğoy arane içoğoy saya görə
cöybalanan.

⁵⁴ İz say gele bakala tayfina gele, iz say mal
bakala tayfina mal tadanən. Hər tayfina siyəyinə
haq'əsi izi saya görə oçal tadeğale.

⁵⁵ Mat'u mani oçal kofst'una isə çöp bost'unen
avabakalnan. Hər tayfinen iz saya görə oçal
haq'ale.

⁵⁶ Çuresa kala, çuresa mis'ik' - hər tayfina
koft'ala paya çöp bost'unen avabakalanan». †

⁵⁷ Levinaxun bakiyorox moroxe:

Gerşon q'a şot'oxun baki nəsil;

K'ohat' q'a şot'oxun baki nəsil;

† 26:56 26:52-56 Ams'i oç. 34:13; Yeş. 14:1-2

Merari q'a şot'oxun baki nəsıl.

58 Levinaxun baki tayfin boş me nəsılxoval buney:

Livnin nəsıl,
Xevroni nəsıl,
Maxlin nəsıl,
Muşın nəsıl,
Goraxi nəsıl.

K'ohat' Amrami bavaney.

59 Amrami çuğoy s'i Yok'evedey. Şo leviğoxuney, şorox Misirə bakat'an t'iyane nanaxun bakey. Şot'in Amrameynak' Aarona, Moiseya saal şot'oğoy xunçi Maryamane eçerey.

60 Aaronaxun Nadav, Avihu, Eleazar saal İt'amare bakey. ‡

61 Nadav q'a Avihu isə Q'ONçuğoynak' q'urban eçat'an aruğo Şot'ay laxi q'aydinen tet'un bey, şot'aynak'al p'uret'unıy. §

62 Levin tayfına sa xaşın saal kot'oxun ala bakala bito ğar əyloğoy q'a işq'arxoy say 23 000 taney. Şorox cöyt'un siyəyinə haq'esey, şot'o görə ki, şot'oğo oçali pay tene kofst'ay.

63 Metərluğen, Moiseyen q'a bəyinş Aaronen Moavi düzənlüğa, Yerixon şəhərəxun çobaço, İordan oqe t'öğöl siyəyinə haq'i israilluyox moroxey.

64 Me siyəyin boş Moiseyen q'a bəyinş Aaronen Sinay ams'i oçala bəq'əlpı israilluğoxun sayco tene mandey.

65 Axırı Q'ONçuğon peney ki, süft'in siyəyinə haq'eşiyorox bito ams'i oçala biyalt'un.

‡ 26:60 26:60 Ams'i oç. 3:2 § 26:61 26:61 Lev. 10:1-2; Ams'i oç. 3:4

Şot'oğoxun Yefunneyi ğar K'alevaxun q'a Nune
 ğar Yeşuaxun başq'a şuk'k'al dirist' tene mandi.
 *

27

Ğar nu bakat'an mülke şu c'ovaksuni barada

¹ İosifi ğar Menaşşenaxun Maxir, Maxiraxun Gilead, Gileadaxun Xefer, Xeferaxun isə Şelofexade bakey. Me Şelofexadi qo xuyəre buy. Xuyərmoğoy s'iyurxo Maxla, Noa, Xok'la, Milk'a saal T'irsaney.

² Sa ği şorox hari Moiseyi, bəyinş Eleazari, ağsaq'q'alxoy q'a dirist' azuk'i bəş c'eri, şot'oğo İvel çadıri bağala gane bəş pit'un:

³ «Goraxaxun sagala Q'ONÇuĞoy əleyinə eşeşit'oğoy boş beşi bava baki tene, şo iz eşp'est'i günaxa görəne ams'i oçala p'ure. İzi ğaral butet'ux.

⁴ İsə beşi bavay ğar tene bake pi, izi s'i açalane? İzi viçimoğoxu hetəresa, beşi baval hat'etər k'ule kofst'a! Şot'o yax tada!»

⁵ Moiseyen me əşlə hetər həlbsuna Q'ONÇuĞoxun xavare haq'i,

⁶ Şot'inal pine:

⁷ «Şelofexadi xuyərmoğon düzt'un nex. İçoğoy bava iz viçimoğoxun barabar k'ule kofst'a. Şot'ay k'ula iz xuyərmoğoxu tada. *

* 26:65 26:65 Ams'i oç. 14:26-35 * 27:7 27:7 Ams'i oç. 36:2

⁸ İsrailuğo metər upa: əgər sa amdar biyayin, t'e amdariyal ğar butet'uxsa, t'e vədə şot'ay mülk iz xuyərəne c'ovaksa.

⁹ Əgər t'e amdari xuyərəl butet'uxsa, t'e vədə şot'ay viçimoğone c'ovaksa.

¹⁰ Əgər t'e amdari viçiyal butet'uxsa, t'e vədə mülkə izi bavay viçimoğon tadanən.

¹¹ İzi bavay viçimuxal nu bakayin isə, t'e vədə ən İsa bakala q'erəz sa q'ooma tadanən. Barta mo vəynak' həmişəluğ Q'ONçuğon Moiseya pi k'anunxoxun soğəq'an baki».

Moiseyen Yeşua iz gala laxsun

(K'an. 31:1-8)

¹² Q'ONçuğon Moiseya pine: «Me Avarim uk'ala buruğxo laki. Zu israiluğo tadala ölkinə sa bəğa.

¹³ Hun me ölkin loxol bəğalnu, oşa isə vi viçi Aaronallarık' t'e dünyəne, vi bavoğoy t'öğöl tağalnu.

¹⁴ Şot'aynak' ki, vən Şin ams'i oçala Bezi əyitə əməltənənbi, Qadeşa bakala Meriva xene t'öğöl Bez əleyinə əqəşi azuk'i bəş Bezi İvelluğa çoyel tenən c'evk'i». †

¹⁵ Moiseyen Q'ONçuğon pine:

¹⁶⁻¹⁷ «Barta iz boş nəfəs bakala bito el-muxlat'oğoy Buxaçux Q'ONçuğon me azuk'eynak' bəş c'eri şot'oğon iz baç'anexun təşes bakala sa amdarq'an c'ək'p'i. Barta Q'ONçuğoy azuk' çobansuz sürü k'inək' maq'an mandi». ‡

† 27:14 27:12-14 K'an. 3:23-27; 32:48-52 ‡ 27:16-17 27:16-17 1 Padç. 22:17; Yez. 34:5; Zək. 10:2; Mat'. 9:36; Mrk'. 6:34

18 Q'ONÇUĞON Moiseya pine: «Nune ğar Yeşua vi t'öğöl k'alpi vi kula iz bel laxa, şot'ost'a me əşlə bes bakala urufe bu. Ş

19 Şot'o bəyinş Eleazari q'a bütüm azuk'i bəş eçeri memaçağ vi bi me əşlə şot'o tapşurba.

20 Barta israilluğon va bakala hörmətə şot'oval ak'est'i hər əşləst'a şot'o ümüxlaxeq'at'un.

21 Q'ONÇUĞOY əyitə isə şot'o bəyinş Eleazaren uk'ale. Şot'in iz samci bəyinşi döşlin boş bakala Urim uk'ala jəna * bosi Q'ONÇUĞOY q'ərara av-abakale, metərлуğenal Yeşua q'a bütüm israil-luyox t'e q'əraren arşi-hayzalt'un».

22 Moiseyenal Q'ONÇUĞON içü əmirbi k'inək' bine: Yeşua bəyinş Eleazari q'a dirist' azuk'i bəş eçeri

23 iz kula şot'ay bele laxi, metərлуğenal Q'ONÇUĞON içü pi k'inək' memaçağ izi ozane bakala əşlə şot'one tapşurbi. †

28

Hər ği eçala payurxo (C'eys. 29:38-46)

1 Q'ONÇUĞON Moiseya pine:

2 «İsrailluğon upa ki, Zaynak' hər iz vədə eğat'an bok'ospsuni q'urbanluğ pay eşt'una eye-xun maq'at'un c'evk'i. Şot'oğoy bok'uni ad Za irəzibala ade.

Ş 27:18 27:18 C'eys. 24:13 * 27:21 27:21 Urim - Mo divanbsey-nak' bakala jəney. Mot'ay köməyen çöp bosi Buxaçuğoy əyitət'un avabaksay. C'eys. 28:30 † 27:23 27:23 K'an. 31:23

³ Şot'oğo upa ki, Zaynak' hər ği bok'ospsuni q'urban k'inək' p'ə dənə sa usenin salamat q'uzi eçalat'un.

⁴ Q'uzin sunt'u savaxt'an, t'e sunt'u isə bəğ batk'at'anq'at'un q'urban eçeri.

⁵ Hər q'urbanluğ q'uzinaxun sagala iz taxılı payal eçalanan, mo hine * bip' payaxun sa pay zeytuni c'əyin lapi efin † vis' payaxun sa pay xarine.

⁶ Mo Q'ONÇuÇon Sinay buruğo hər ği şamseynak' bürüşü, iz bok'uni aden İçu irəzibala q'urbane.

⁷ Hər şameğala q'uzinaxun sagala iz şipseynak' bakala payal eçanan, mo sa hine bip' payaxun sa pay finağoybala uğun bakalane. Şot'o İvel çadırı bəş Q'ONÇuÇoynak' şipi bok'osp'anan.

⁸ P'əmcı q'uzina bəğ batk'at'an şampanan. Şot'oval savaxt'an şameşi q'urbanallarık' taxılı q'a şipseynak' bakala payaxun sagala eçanan. Me eçala payurxoy bok'uni ad Q'ONÇuÇo irəzibala ade.

Şamat' ğine eçala payurxo

⁹ Şamat' ğineyal p'ə dənə sa usenin salamat q'uzi q'urban şamk'alat'un. Q'urbanaxun sagala taxılı pay k'inək' bakala c'əyin lapi efin qo payaxun sa pay xuri berxeşi xarina q'a şipseynak' bakala payal eçanan.

* 28:5 28:5 sa hın - təxminən 3,8 lit'ir † 28:5 28:5 sa efa - 22 lit'ir

10 Mo hər ği şipseynak' bakala payaxun sagala eçala q'urbanxoxun cöy, hər şamat' ğine şameğala q'urbanxone.

Təzə xaş c'eğat'an eçala payurxo

11 Q'ONÇUĞOYNak' hər təzə xaş c'eğat'anal bok'ospsuni q'urbanxo şampanan. Şameğala heyvanxo p'ə dənə salamat arak', sa q'oç eğel saal vüğ dənə sa usenin q'uzi bakalane.

12 Hər şameğala arak'axun sagala eçala taxılı pay zeytuni c'əyin lapi sa efin vis' payaxun xib pay xuri berxeşi xari, q'oç eğelaxun eçala pay sa efin qo payaxun sa pay zeytuni c'əyin lapi xuri berxeşi xari,

13 hər q'uzinaxun sagala eçala taxılı pay isə sa efin vis' payaxun sa pay zeytuni c'əyin lapi xuri berxeşi xariq'an baki. Me bok'ospsuni q'urbanxoy bok'unı ad Q'ONÇUĞO irəzibala ade.

14 Şot'oğoxun sagala şipseynak' bakala payal eçalat'un: hər q'urbanluğ arak'axun sagala qı hin fi, q'oç eğelaxun sagala sa hine xib payaxun sa pay fi, hər q'urbanluğ q'uzinaxun sagala isə sa hine bip' payaxun sa pay fi. Mo use-nast'a hər təzə xaş c'eğat'an eçala bok'ospsuni q'urbanxone.

15 Şipseynak' bakala payaxun sagala hər ği şameğala q'urbanxoxun cöy, Q'ONÇUĞOYNak' günaxxo os'kseynek' bakala q'urban k'inək' sa ərkəy keçiyal şamk'alanan.

C'ovaksuni axsibay q'a Əyinsuz şume axsi-bayast'a eçala payurxo
(Lev. 23:5-14)

16 Samci xaşe bip'es's'emci ğine Q'ONçuĞoyC'ovaksuni axsibaye. ‡

17 Me xaşe qos's'emci ğine isə Əyinsuz şume axsibaye burqesa: vüğ ği Əyinsuz şum ukalanan.

18 T'e ğimxoy samci ğine Za bul k'os'bseyinak' bakala giresun c'ovakest'anan, q'erəz sa əşəl ma biq'anan.

19 Q'ONçuĞoynak' bok'ospsuni pay k'inək' bok'ospsuni q'urbanxo eçanan: p'ə dənə arak', sa q'oç eğel saal vüğ dənə sa usenin q'uzi. Me heyvanxo bito salamat heyvanxo bakalane.

20 Hər şameğala arak'axun sagala eçala taxılı pay zeytuni c'əyin lapi sa efin vis' payaxun xib pay xuri berxeşi xari, q'oç eğelaxun eçala pay sa efin qo payaxun sa pay zeytuni c'əyin lapi xuri berxeşi xari,

21 hər q'uzinaxun sagala eçala taxılı pay isə sa efin vis' payaxun sa pay zeytuni c'əyin lapi xuri berxeşi xariq'an baki.

22 Mot'oxun cöy, ef günaxxo os'kseyinak' bakala q'urban k'inək' sa ərkəy keçiyal şampanan ki, şot'ay p'iyen ef günaxi toya ödəyinşi bakane.

23 Me q'urbanxo hər savaxt'an eçala q'urbanxoxun cöy eçala q'urbanxone.

24 Metərluğen, me vüğ ğine hərt'ust'a şipseynak' bakala payaxun sagala eçala q'urbanxoxun cöy, me Bez pi q'urbanxoval şamk'alanana. Mo iz bok'uni aden Q'ONçuĞo irəzibseyinak' bakala q'urbanxone.

25 Barta vüğümci ğineyal Za bul k'os'bseyinak'

‡ 28:16 28:16 - Əbraniğoy tumargirə görə usen joğul bağat'ane burqesa. C'ovaksuni axsibay: bəğa C'ey. 12:1-13; K'an. 16:1-2.

bakala giresunxq'an baki, me ği q'erəz sal sa əş ma biq'anan.

Exe axsibayast'a eçala payurxo

(Lev. 23:15-22; K'an. 16:9-12)

²⁶ Exe axsibayast'a Q'ONčuğoynak' təzə aru-maxun nübərлуğ pay eçala ğine Q'ONčuğo bul k'os'bseyinak' bakala giresun c'ovakest'anan. Me ği q'erəz sal sa əş ma biq'anan.

²⁷ Q'ONčuğoynak' bok'ospsuni q'urbanxo - p'ə dənə arak', sa q'oç eğel saal vüğ dənə sa usenin ərkəy q'uzi eçanan. Mo iz bok'uni aden Q'ONčuğo irəzibseyinak' bakala q'urbanxone.

²⁸ Hər şameğala arak'axun sagala eçala taxılı pay zeytuni c'əyin lapi sa efin vis' payaxun xib pay xuri berxeşi xari, q'oç eğelaxun sagala eçala pay sa efin qo payaxun sa pay zeytuni c'əyin lapi xuri berxeşi xari,

²⁹ hər şameğala q'uzinaxun sagala eçala taxılı pay isə sa efin vis' payaxun sa pay zeytuni c'əyin lapi xuri berxeşi xariq'an baki.

³⁰ Mot'oxun cöy, ef günaxxo os'kseyinak' bakala q'urban k'inək' sa ərkəy keçiyal şampanan ki, şot'ay p'iyen ef günaxi toya ödəyinşi bakane.

³¹ Me q'urbanxo q'a şot'oğoxun sagala şipseynak' bakala payurxo eçat'an efi hər ği taxılı payaxun sagala eçala q'urbanxoval eyexun ma c'evk'anan. Bito şameğala q'urbanluğ heyvanxo salamat heyvanxo bakalane».

29

Şeyp'ur fareğala ğine eçala payurxo

(Lev. 23:23-25)

¹ «Vüğümci xaşə samci ğine Za bul k'os'bseyrak' bakala giresun c'ovakest'anan, q'erəz sal sa əşəl ma biq'anan. Me ği vəynak' mûq'inaxun düzbi şeyp'ur fark'ala ği bakale.

² Q'ONÇuĞoynak' bok'ospsuni q'urbanxo - salamat sa dənə arak', sa q'oç eğel saal vüğ dənə sa usenin ərkəy q'uzi eçanan. Mo iz bok'uni aden Q'ONÇuĞo irəzibseyrak' bakala q'urbanxone.

³ Hər şameğala arak'axun sagala eçala taxılı pay zeytuni c'əyin lapi sa efin vis' payaxun xib pay xuri berxeşi xari, q'oç eğelaxun eçala pay sa efin qo payaxun sa pay zeytuni c'əyin lapi xuri berxeşi xari,

⁴ hər şameğala q'uzinaxun sagala eçala taxılı pay isə sa efin vis' payaxun sa pay zeytuni c'əyin lapi xuri berxeşi xariq'an baki.

⁵ Mot'oğoxun cöy, ef günaxxo os'kseyrak' bakala q'urban k'inək' sa ərkəy keçiyal şampanan ki, şot'ay p'iyen ef günaxi toya ödəyinşi bakane.

⁶ Me q'urbanxo eçat'an efi hər ği şamk'ala q'urbanxo q'a təzə xaş c'eğat'an şamk'ala q'urbanxo saal şot'oğoxun sagala eçala şipseynak' bakala q'a taxılı payurxo eyexun ma c'evk'anan. Mo iz bok'uni aden Q'ONÇuĞo irəzibseyrak' bakala q'urbanxone.

*Günaxxoy toya ödəyinşala ğine eçala payurxo
(Lev. 23:26-32)*

⁷ Vüğümci xaşə vis'imci ğineyal Za bul k'os'bseyrak' giresun c'ovakest'anan. Me ği sal əş ma biq'anan, vəx ukunaxunal, q'erəz şeymoğoxunal bot'anan.

⁸ Q'ONčuğoynak' bok'ospsuni q'urbanxo - sa arak', sa q'oç eğel saal vüğ dənə sa usenin ərkəy q'uzi şampanan. Mo iz bok'uni aden Q'ONčuğoy irəzibseynak' bakala q'urbanxone. Şameğala bito q'urbanluğ heyvanxo salamat heyvanxo bakalane.

⁹ Hər şameğala arak'axun sagala eçala taxılı pay zeytuni c'əyin lapi sa efin vis' payaxun xib pay xuri berxeşi xari, q'oç eğelaxun eçala pay sa efin qo payaxun sa pay zeytuni c'əyin lapi xuri berxeşi xari,

¹⁰ hər şameğala q'uzinaxun sagala eçala taxılı pay isə sa efin vis' payaxun sa pay zeytuni c'əyin lapi xuri berxeşi xariq'an baki.

¹¹ Mot'oğoxun cöy, iz p'iyen ef günaxxoy toya ödəyişbseynak' bakala q'urban k'inək' sa ərkəy keçiyal şampanan. Me q'urbanxo şamk'at'an efi hər gi izi şipseynak' bakala payaxun q'a taxılı payaxun sagala eçala q'urbanxo saal ef günaxxo os'kseynak' şameğala q'urbanal eyexun ma c'evk'an.

Bare axsibayast'a eçala payurxo

(Lev. 23:33-44)

¹² Vüğümci xaşə qos's'emci gine Za bul k'os'bseynak' giresun c'ovakest'an, q'erəz sa əşəl ma biq'an. Q'ONčuğoy s'iyal vüğ gi axsibay c'ovakest'an.

¹³ Q'ONčuğoynak' bok'ospsuni q'urbanxo - xibes's'e dənə arak', p'ə dənə q'oç eğel saal bip'es's'e dənə sa usenin ərkəy q'uzi şampanan. Mo iz bok'uni aden Q'ONčuğoy irəzibseynak'

bakala q'urbanxone. Şameğala bito q'urbanluğ heyvanxo salamat heyvanxo bakalane.

¹⁴ Hər şameğala arak'axun sagala eçala taxılı pay zeytuni c'əyin lapi sa efin vis' payaxun xib pay xuri berxeşi xari, hər q'oç eğelaxun eçala pay sa efin qo payaxun sa pay zeytuni c'əyin lapi xuri berxeşi xari,

¹⁵ hər q'uzinaxun sagala eçala taxılı pay isə sa efin vis' payaxun sa pay zeytuni c'əyin lapi xuri berxeşi xariq'an baki.

¹⁶ Mot'oxun cöy, ef günaxxo os'kseynek' bakala q'urban k'inək' sa ərkəy keçiyal şampanan ki, şot'ay p'iyen ef günaxi toya ödəyişi bakane. Me q'urbana eçat'an hər savaxt'an içoğoy taxılı q'a şipseynak' bakala payurxoxun sagala eçala q'urbanal eyexun ma c'evk'anan.

¹⁷ Axsibayi p'əmcı ğine p'as's'e dənə arak', p'ə dənə q'oç eğel saal bip'es's'e dənə sa usenin ərkəy q'uzi şampanan. Şameğala bito q'urbanluğ heyvanxo salamat heyvanxo bakalane.

¹⁸ Hər arak', q'oç eğel saal q'uzinaxun sagala iz taxılı q'a şipseynak' bakala payal eçalanan.

¹⁹ Mot'oğoxun cöy, ef günaxxo os'kseynek' bakala q'urban k'inək' sa ərkəy keçiyal şampanan. Me q'urbanxo eçat'an hər savaxt'an içoğoy taxılı q'a şipseynak' bakala payurxoxun sagala eçala q'urbanal eyexun ma c'evk'anan.

²⁰ Axsibayi xibimci ğine sas's'e dənə arak', p'ə dənə q'oç eğel saal bip'es's'e dənə sa usenin ərkəy q'uzi şampanan. Şameğala bito q'urbanluğ heyvanxo salamat heyvanxo

bakalane.

²¹ Hər arak', q'oç eğel saal q'uzinaxun sagala iz taxılı q'a şipseynak' bakala payal eçalanan.

²² Mot'oğoxun cöy, ef günaxxo os'kseynak' bakala q'urban k'inək' sa ərkəy keçiyal şampanan. Me q'urbanxo eçat'an hər savaxt'an içoğoy taxılı q'a şipseynak' bakala payurxoxun sagala eçala q'urbanal eyexun ma c'evk'anan.

²³ Axsibayi bip'imci ğine vis' dənə arak', p'ə dənə q'oç eğel saal bip'es's'e dənə sa usenin ərkəy q'uzi şampanan. Şameğala bito q'urbanluğ heyvanxo salamat heyvanxo bakalane.

²⁴ Hər arak', q'oç eğel saal q'uzinaxun sagala iz taxılı q'a şipseynak' bakala payal eçalanan.

²⁵ Mot'oxun cöy, ef günaxxo os'kseynak' bakala q'urban k'inək' sa ərkəy keçiyal şampanan. Me q'urbanxo eçat'an hər savaxt'an içoğoy taxılı q'a şipseynak' bakala payurxoxun sagala eçala q'urbanal eyexun ma c'evk'anan.

²⁶ Axsibayi qomci ğine vuy dənə arak', p'ə dənə q'oç eğel saal bip'es's'e dənə sa usenin ərkəy q'uzi şampanan. Şameğala bito q'urbanluğ heyvanxo salamat heyvanxo bakalane.

²⁷ Hər arak', q'oç eğel saal q'uzinaxun sagala iz taxılı q'a şipseynak' bakala payal eçalanan.

²⁸ Mot'oğoxun cöy, ef günaxxo os'kseynak' bakala q'urban k'inək' sa ərkəy keçiyal şampanan. Me q'urbanxo eçat'an hər savaxt'an içoğoy taxılı q'a şipseynak' bakala payurxoxun sagala eçala q'urbanal eyexun ma c'evk'anan.

29 Axsibayi üqümci ğine muğ dənə arak', p'ə dənə q'oç eğel saal bip'es's'e dənə sa usenin ərkəy q'uziyal şampanan. Şameğala bito q'urbanluğ heyvanxo salamat heyvanxo bakalane.

30 Hər arak', q'oç eğel saal q'uzinaxun sagala iz taxılı q'a şipseynak' bakala payal eçalanan.

31 Mot'oğoxun cöy, ef günaxxo os'kseynak' bakala q'urban k'inək' sa ərkəy keçiyal şampanan. Me q'urbanxo eçat'an hər savaxt'an içoğoy taxılı q'a şipseynak' bakala payurxoxun sagala eçala q'urbanal eyexun ma c'evk'anan.

32 Axsibayi vüğümci ğine vüğ dənə arak', p'ə dənə q'oç eğel saal bip'es's'e dənə sa usenin ərkəy q'uzi şampanan. Şameğala bito q'urbanluğ heyvanxo salamat heyvanxo bakalane.

33 Hər arak', q'oç eğel saal q'uzinaxun sagala iz taxılı q'a şipseynak' bakala payal eçalanan.

34 Mot'oğoxun cöy, ef günaxxo os'kseynak' bakala q'urban k'inək' sa ərkəy keçiyal şampanan. Me q'urbanxo eçat'an hər savaxt'an içoğoy taxılı q'a şipseynak' bakala payurxoxun sagala eçala q'urbanal eyexun ma c'evk'anan.

35 Muğumci ği axsibayi çark'ala ğine. Me ğine Za bul k'os'bseynak' giresun c'ovakest'anan, q'erəz sa əşəl ma biq'anan.

36 Q'ONčuğoynak'bok'ospsuni q'urbanxo - sa arak', sa q'oç eğel saal vüğ dənə sa useni ərkəy q'uzi eçanan. Şameğala q'urbanluğ heyvanxo bito salamat heyvanxo bakalane. Mo iz bok'uni aden Q'ONčuğoy irəzibseynak' bakala

q'urbanxone.

³⁷ Hər arak', q'oç eğel saal q'uzinaxun sagala iz taxılı q'a şipseynak' bakala payal eçanan.

³⁸ Mot'oğoxun cöy ef günaxxo os'kseynak' bakala q'urban k'inək' sa ərkəy keçiyal şampanan. Me q'urbanxo eçat'an hər savaxt'an içoğoy taxılı q'a şipseynak' bakala payurxoxun sagala eçala q'urbanal eyexun ma c'evk'anan.

³⁹ Me şameğala heyvanxoval, içoğoxun sagala eçala taxılı q'a şipseynak' bakala payurxoval, serluği q'urbanxoval - morox bito axsibayx-ost'a eçala q'urbanxone. Efi niyətp'i nəəl ef ük'exun c'ovaksuna görə şameğala q'erəz q'urban buvəxsə, şot'oğə cöy şamk'alanən».

⁴⁰ Moiseyenal Q'ONčuğon içü əmirbi hər şeyə israilluğə p'ap'esebi.

30

Tadi elasi loxol çurpsuni barada bakala q'aydoox

¹ Moiseyen israilluğəy boş bakala tayfoğəy kalat'oğə pine: «Q'ONčuğon metərə əmirbsa:

² "Əgər sa işq'aren Q'ONčuğə elasp'i het'unesa əyite tadesa nəəl k'ənesa niyətebesa, iz əyitin loxol çurk'alane. Barta şot'in iz jomoxun c'eri hər əyitə bex p'ap'esp'eq'an. *

³ Əgər işq'ara nu taşi sa xuyəren iz bavay k'oya bakala vədinə Q'ONčuğə elasp'i het'unesa əyit tadayin nəəl k'ənesa niyətp'ayin,

⁴ iz bavanal me barada ibaki içü hik'k'al nu uk'ayin, me xuyərəl iz pi əyitin loxol çurk'alane.

* 30:2 30:2 K'an. 23:21-23; Mat'. 5:3

⁵ Ama əgər iz bavan me barada ibaki şot'ay əyit tadt'oğə bex p'ap'espuna icaza nu tadayin, t'e vədə me xuyər iz pi əyitəxun c'eyes banekon. Buxaçuğon şot'ay iz tadt əyitəxun c'eyesuna pis tene bəğal, şot'o görə ki, t'e xuyərə iz bavan tene barti.

⁶ Əgər sa xuyər işq'ara tağat'an şot'ay ozane Q'ONčuĞo elasp'i tadt əyit nəəl sa niyəte busa,

⁷ iz taşi işq'arenal me barada ibaki şot'o hik'k'al nextenesa, t'e vədə me xuyər iz pi əyitin loxol çurk'alane.

⁸ Ama əgər işq'aren me barada ibaki şot'ay əyit tadt'oğə bex p'ap'espuna icaza nu tadayin, t'e vədə me xuyər iz pi əyitəxun c'eyes banekon. Buxaçuğon şot'ay iz tadt əyitəxun c'eyesuna pis tene bəğal, şot'o görə ki, t'e xuyərə iz işq'aren tene barti.

⁹ Süpür nəəl işq'araxun c'eri sa çuğon Q'ONčuĞo elasp'i het'unesa əyit tadayin, şo iz tadt əyiti loxol çurk'alane.

¹⁰ Əgər işq'ara bakala sa çuğon iz işq'ari k'oya bakala vədine Q'ONčuĞo elasp'i het'unesa əyit tadayin nəəl k'ənesa niyətp'ayin,

¹¹ iz işq'arenal me barada ibaki içü hik'k'al nu uk'ayin, me çuux iz pi əyiti loxol çurk'alane.

¹² Ama əgər iz işq'aren me barada ibaki şot'ay əyit tadt'oğə bex p'ap'espuna icaza nu tadayin, t'e vədə me çuux iz pi əyitəxun c'eyes banekon. Buxaçuğon şot'ay iz tadt əyitəxun c'eyesuna pis tene bəğal, şot'o görə ki, t'e çuğə iz işq'aren tene barti.

¹³ İşq'ara bakala çuğoy Q'ONčuĞo elasp'i tadt hər əyitə nəəl içü het'uxunesa efsuna iz işq'aren

icaza tadesal banekon, nu tadesal.

¹⁴ Ama əgər işq'aren iz çuğoy Q'ONČUĞO tadi əyitin barada ibaki ğine şot'o hik'k'al tene nex-esa, metər bsunen şot'ay əyit tadt'oğox bex p'ap'epsuna icaza tadine baksa. Mot'o t'e işq'aren me barada ibaki, ama iz çuğox hik'k'al nu upsunene ak'est'a.

¹⁵ Əgər işq'aren iz çuğoy Q'ONČUĞO tadi əyitin barada ibakit'uxun sa hema vədə oşa izi nu irəzi baksuna avabakest'ayin, t'e vədə Q'ONČUĞO tadi əyitin loxol nu çurpsuna görə coğaba için tadale"».

¹⁶ Mo işq'areynak' q'a iz çuğoy nak', bavaynak' q'a iz k'oya bakala işq'ara nu taşi xuyəreynak' bakala, Q'ONČUĞON Moiseya tadi q'aydooxe.

31

Midyanluğoxun həyif haq'sun

¹ Q'ONČUĞON Moiseya metərə pi:

² «Midyanluğoy israilluğox bi pislügi * həyifə şot'oğoxun haq'a. Oşa p'uri t'e dünyəne, vi bavoğoy t'öğöl tağalnu».

³ Moiseyenal azuk'a pine: «Azuk'i boş bakala işq'arxoxun davina c'eyseynak' sa q'oşun həzirbanan. Barta midyanluğoy loxol taşi Q'ONČUĞOY əleyinə c'eysunı həyifə şot'oğoxun haq'eq'at'un.

⁴ Hər tayfinaxun sa hazar tan yaq'abanan».

* **31:2 31:2** - Q'ONČUĞON miya midyanluğoy israilluğoy loxol q'arğış şipest'uni, şot'oğox binik' buxaçux Baal-Peora bul k'osbest'uni saal içoğoy xuyərməğox şot'oğox işq'ara tast'uni baradane nex. Bəğa: Ams'i oç. 22:4-6; 25:1-18

⁵ Metərluğen, israilluğon hər tayfinaxun sa hazar işq'ara - bito sagala p'as's'e hazarluğ sa q'oşuna davina c'eyseynak't'un həzirbi.

⁶ Moiseyen şot'oğoy loxol bəyinş Eleazari ğar P'inexasa kalo laxi davinane yaq'abi, Eleazarenal İvel ganu bakala şeymoğoxun q'a şeyp'urxo ext'i yaq'ane baft'i. Me şeyp'urxo farpi davina c'eğala q'oşuni k'ə bsuna avabakest'eynak'ey.

⁷ Hametər, Q'ONÇUĞON Moiseya əmirbi k'inək' şorox midyanluğoy loxol taşi şot'oğoy bito işq'arxo k'as'p'i şit'unpi.

⁸ P'urit'oğoy boş Midyani qo padçağ - Evi, Rek'em, Şur, Xur saal Reval buney. Beori ğar Bileamal israilluğoy q'ılncaxun p'urit'oğoy boşey.

⁹ İsrailuğon bito midyanlu çupuxxo, əyloğ, şot'oğoy heyvanxoy sürüğ q'a içoğoy bakal nu bakala hər şeyə içoğoy kiyelt'un badi.

¹⁰ Midyanluğ yəşəyinşala bito şəhərmoğ q'a içoğoy çurk'ala ganxo bəc'ük't'undi.

¹¹ İsrailuğon içoğoy kiyel badi hər şeyə - amdarxo, heyvanxo, şot'oğoy bito mal-dövlətə ext'undi.

¹² Şot'oğon davabi midyanluğ tat'unşeri, içoğoy kiyel badi bito me amdarxo q'a şeymoğoval Moiseyi, bəyinş Eleazari saal dirist' azuk'i bəşt'un eçeri. Azuk' Moavi düzənluğa, İordan oqe t'öğöl, Yerixon şəhəri bəş düzbi çurk'ala galaney.

Azuk'i davinaxun oşa pakbaksun

13 Moisey, bëyinş Eleazar saal azuk'i bito ağsaq'q'alxo içoğoy çurk'ala ganuxun q'oşuni beşt'un c'eri.

14 Moisey davinaxun qaybaki q'oşuni kalat'oğoy - hazartani q'a sabaçtani kalat'oğoy loxol gele əcuğluney.

15 Şot'in pine: «Het'aynak'nan çupuxxo bitova dirist' efi?

16 Korox teney ki, Bileami əyiten beşi işq'arxo Q'ONçuğoxun əxilbi P'eora bakala binik'-buxaçuğ bul k'os'best'alo? Kot'oğō görəne azuk'al k'as'eşi! †

17 İsə bütüm ğar əyloğō q'a işq'araxun işaluğbi çupuxxo bəsp'anən.

18 Ama işq'araxun hələ işaluğ nu bi xuyərmoğō galmadanən.

19 Ef boş isə amdar bəsp'i nəəl iz kul meydə laft'i şu bunesa - çuresa azuk'axun bakala davina taşi işq'arq'an baki, çuresa Midyanaxun ext'i eçeri xuyər - vüğ ği azuk'i çurk'ala ganuxun t'öğ c'eğalane. Şot'oğōn içoğō xib ğinaxun saal vüğ ğinaxun oşa pakbalat'un.

20 Bitō paltarxo, keçin t'olaxun q'a xayaxun düzbaki nəəl durut'axun bakala bitō şeymoğoval pakbanən».

21 Bëyinş Eleazaren davinaxun qaybaki əsk'ərxo pine: «Mone, Q'ONçuğōn Moiseyeynak' me q'aydoğōne laxi:

22 bitō q'ızıla, gümüşə, tunca, dəmirə, q'alaya q'a q'urq'uşuna

23 - aruğō nu bok'ala k'ə bunesa - bitova aruğoxun q'a pakbala xenaxun c'ovakešt'anən.

† 31:16 31:16 Ams'i oç. 25:1-9

Mot'oxun oşa şorox pak bakale. Aruğo bok'ala şeyurxo isə saycə xenen pakbanan.

²⁴ Vüğümci ğine ef paltarxo os'k'it'uxun oşa ef çurk'ala gala qaybakes banankon».

Midyanaxun eçeri mala cöybsun

²⁵ Q'ONČuĞon Moiseya pine:

²⁶ «Bëyinş Eleazaraxun q'a israilluğoy tayfoğoxun c'ək'eşi kalat'oğoxun sagala Midyanaxun eçeri bito amdarxo q'a heyvanxo böq'əlpə.

²⁷ Oşa mot'oğō bitova p'ə gala - davina taşit'oğoy q'a nu taşit'oğoy arane - barabar cöyba.

²⁸ Davina taşit'oğō koft'i payaxun hər qobaç amdaraxun soğō saal hər qobaç bul belinaxun, elemaxun q'a eğelaxun sa bul Q'ONČuĞoy paye.

²⁹ Şot'oğoxun Q'ONČuĞoynak' ext'i me paya bëyinş Eleazara tadanən.

³⁰ Davina nu taşi israilluğō koft'i payaxun isə hər əlli amdaraxun sunt'u saal hər əlli bul belinaxun, elemaxun q'a eğelaxun sa bula ext'a. Mot'o Q'ONČuĞoyıvel çadıra bëğala leviğō tada».

³¹ Moiseyen q'a bëyinş Eleazarenal Q'ONČuĞon Moiseya pi k'inək' bit'un.

³² Metərлуğen, əsk'ərxon Midyanaxun 675 000 eğel q'a keçi,

³³ 72 000 beli,

³⁴ 61 000 elem,

³⁵ saal 32 000 hələ işq'araxun nu işaluğbi xuyərt'un eçeri.

³⁶ Mot'oğoxun davina taşit'oğō 337 500 bul eğel q'a keçi

³⁷ (mot'oğoxun 675 bul Q'ONČuğoy payey),
³⁸ 36 000 bul beli (me beliğoxun 72 bul Q'ONČuğoy payey),

³⁹ 30 500 bul elem (me elemxoxun 61 bul Q'ONČuğoy payey),

⁴⁰ saal 16 000 amdare koft'i. Me amdarxoxun 32 tan Q'ONČuğoy payey.

⁴¹ Moiseyenal şot'oğoxun Q'ONČuğoynak' ext'i me paya, içü pi k'inək' bëyinş Eleazarane tadi.

⁴² Moiseyen davina nu taşit'oğoynak' cöybi pay,

⁴³ mandi israilluğō koft'i pay isə money: 337 500 bul eğel q'a keçi,

⁴⁴ 36 000 bul beli,

⁴⁵ 30 500 bul elem,

⁴⁶ saal 16 000 amdar.

⁴⁷ Moiseyen Q'ONČuğon içü pi k'inək' me mandi israilluğō koft'i payaxun hər əlli bul heyvanaxun sa bula saal hər əlli amdaraxun sa amdara cöybi Q'ONČuğoyivel çadıra bëğala leviğone tadi.

⁴⁸ Q'oşuni kalat'oğon - hazartani q'a baçtani kalat'oğon Moiseyi t'öğöl hari pit'un:

⁴⁹ «Yan, me vi k'ulurxon, beşi kiin oq'a bakala əsk'ərxo bōq'əlyanpi. Şot'oğoxun açiyo butene.

⁵⁰ İsəəl mone, beşi elmoğoy toya ödəyinşseynak' Q'ONČuğoynak' Midyanaxun eçeri q'ızılxoyan eşt'a - əməl q'a kiyel lavk'ala q'oxlangxo, boğoxalxo, sırığanxo saal şep'urxo».

⁵¹ Moiseyen q'a bëyinş Eleazarenal bito me q'ızılı şeymoğō şot'oğoxun ext'undi.

⁵² Hazartani q'a baçtani kalat'oğon Q'ONČuğoynak' eçeri bito me q'ızılı bihiluğ

16 750 şek'eley. ‡

⁵³ Adi əsk'ərxoy eçeri q'ızıl isə içoğone mandi.

⁵⁴ Hametər, Moiseyen q'a bəyinş Eleazaren hazartani q'a baçtani kalat'oğoxun q'ızıla ext'i İvel çadırat'un laxi. İsrailuğon me q'ızılı loxol bəği Q'ONÇuğoy içoğoy tərəf baki içoğoy elmoğoy hetər çark'est'una eyex efalat'uniy.

32

İordan oq'e bəğ c'eğalaç tərəf bakala oçalxo cöybsun

(K'an. 3:12-22)

¹ Azuk'i boş Ruveni q'a Gade nəsiləxun bakalt'oğoy heyvanxo geleney. Şot'oğonal Yaşer q'a Gilead uk'ala oçalxo ak'at'an, me ganxoy heyvan otarişbseynak' saat' sa ga baksun içoğoy piyexun tene t'it'eri.

² Şorox Moiseyi, bəyinş Eleazari saal azuk'i boş kalo c'ək'eşit'oğoy t'öğöl hari pit'un:

³⁻⁴ «Q'ONÇuğon beş kiyel tadi me oçala bakala At'arot', Dion, Yaşer, Nimra, Xeşbon, Eleale, Sevam, Nevo saal Beon saat' heyvan otarişes bakala ganxone. Me vi k'ulurxoyal, avanu ki, heyvan gelene».

⁵ Oşa saal pit'un: «Əgər yaynak' mot'o gele ten aksasa, me oçala yax tada. Barta me gaq'an beşi baki, İordan oqe t'e tərəf yax ma taşa».

⁶ Moiseyen pine: «Yəni dirist' azuk'en taşi davabale, vən isə memiya arsalnan?»

‡ 31:52 31:52 16 750 şek'el - təxminən 190 k'ilo

7 Het'aynak'nan israilluğo Q'ONČuĞon içoğo tadi ölkine taysunaxun çaxevksa?

8 Ef bavoğonal, Zu şot'oğo Kadeş-Barnea şəhərexun t'e oçala bəğsa yaq'abat'an haketərt'un bey.

9 Şorox Eşk'ol dərənəl şirik' taşi t'e oçala bət'unği, ama oşa hari t'iya taysunaxun, Q'ONČuĞon içoğo tadi t'e ölkine baysunaxun azuk'a qoşt'unbi. *

10 T'e vədəne Q'ONČuĞoy əcuğ bəc'ük'eşi, Şot'inal elasp'i pine ki,

11 "Zaxun čo taradi Misirəxun c'erit'oğoxun sayco, q'a saal q'a yəşəxun ala bakalt'oğoxun sayco, Zu Avrama, İsaak'a saal İak'ova əyit tadi t'e oçala bağalatene!

12 Saycə Bezi əyitəxun nu c'eri k'enizlu Yefunneyi ğar K'alevaxun q'a Nune ğar Yeşuaxun başq'a".

13 Hametərəl Q'ONČuĞoy əcuğon israilluğoy loxol bineq'i. Şot'in azuk'a q'ırx usen, Q'ONČuĞoy piyes günax ak'eşi me əşlə biq'i nəsil əfçibakamin ams'i oçala fıripesedi. †

14 İsəəl mone, ef bavoğoxun q'oş tenan manst'a! Vəxlarik' günaxkərxoxun baki günaxkərxone Q'ONČuĞoy əcuğ p'urum me azuk'i loxol şiye!

15 Vən həysə Q'ONČuĞoxun čo taradaynan, Şot'in p'urum azuk'a me ams'i oçala efi başaybale! Vən me azuk'a əfçibalnan!»

* 32:9 32:8-9 Ams'i oç. 13:17-33 † 32:13 32:10-13 Ams'i oç. 14:26-35

16 T'e vədə Ruveni q'a Gade nəsiləxun bakalorox Moiseyi bəş c'eri pit'un: «Beşi fikir t'etərey ki, miya beşi heyvanxoynak' ağılxo, ailoğoynak'al şəhərmux biq'i şot'oğə memiya efen.

17 Yan isə taşi israilluğoxun sagala şot'oğə əyit tadeşi oçala badamin davabalyan. Yan davina bakala vədine beşi əylox q'a çupuxxo q'alala şəhərmoğə, me oçali amdarxoy kul nu p'ap'ala sa gala bakayt'un, yanal arxayinyan bakon.

18 İsrailuğoxun hərt'in içü koft'ala oçali paya haq'amin beşi k'ojurxo teyan qaybakal.

19 Yan İordan oqe t'e tərəf oçal teyan ext'al, şot'o görə ki, ene miya - İordan oqe bəğ c'eğalaç tərəf bakala oçalxoxunyan ext'i».

20 Moiseyen şot'oğə metərə coğab tadi: «Əgər vən ef pit'ullarik' bi Q'ONÇuğoy s'iyen davina tağaynan,

21 İordani t'e tərəfəl Q'ONÇuğon İz düşmənxoxun oçalxo ext'i İz azuk'a tadamin davabaynan,

22 t'e vədə t'e ölkin amdarxon Q'ONÇuğə taşevk'it'uxun oşa vən ef k'ojurxo qaybakes banankon. Metər vən Q'ONÇuğoy q'a azuk'i bəş ef borca ödəyişi bakalnan, Q'ONÇuğonal vəx me oçala İz xeyir-bərəkətəxun sagala tadale.

23 Ama əgər ef pi əyitin loxol nu çurk'aynan, t'e vədə Q'ONÇuğoy piyes günax əşp'est'i bakalnan, əşp'est'i günaxi cazinal zap'k'alnan.

24 İsə takinan ef çupux-əyloğoynak' bakala şəhərmoğə q'a heyvanxoynak' bakala ağılxo

biq'anan, ama efi tadi əyiti loxol çurpanan».

²⁵ Gade q'a Ruveni nəsiləxun bakalt'oğon Moiseya pit'un: «Barta beş ağən pit'ullarik'q'an baki, yan vi k'ulurxoyan!

²⁶ Beşi çupux-əylox q'a bütüm heyvanxo miya - Gileada biq'i şəhərmoğə mandalt'un.

²⁷ Yan isə hun, beşi ağən, yax əmirbi k'inək' İordan oqe t'e tərəf, Q'ONçuğoy s'iyen davina tağalyan».

²⁸ Moiseyenal bəyinş Eleazara, Nune ğar Yeşua saal israiluğoy tayfoğoxun c'ək'əsi kalat'oğə əmir tadi pine:

²⁹ «Əgər Gade q'a Ruveni nəsiləxun bakalt'oğon İordan oqe t'e tərəf c'ovaki Q'ONçuğoy s'iyen davabayt'un, t'e vədə Q'ONçuğon t'e oçalxo ef kiyel tadit'uxun oşa, şot'oğoy oçali paya memiin - Gileadaxun tadanən.

³⁰ Ama əgər vəxun sagala davina nu tağayt'un, şot'oğoyal oçali paya Kənanaxun tadanən».

³¹ Gade q'a Ruveni nəsiləxun bakalt'oğon pit'un: «Barta Q'ONçuğon me vi k'ulurxo əmirbi k'inək'q'an baki.

³² Yan oqe t'e tərəf bakala Kənan oçala taşi Q'ONçuğoy s'iyen davabalyan, yax koft'ala oçali paya isə memiin, İordan oqe me tərəfəxun tadalnu». ‡

³³ Metərluğən, Moiseyen emorluğoy padçağ Sixoni q'a Başani padçağ Oge kiin oq'a bakala bito oçalxo, içəğoy şəhərmoğoxun sagala Gade

‡ 32:32 32:28-32 Yeş. 1:12-15

q'a Ruveni nəsiləxun bakalt'oğə saal İosifi ğar
Menaşşeni nəsiləxun bakalt'oğəne tadi.

³⁴ Gade nəsiləxun bakalt'oğəon Divon, At'arot',
Aroer,

³⁵ At'rot'-Şofa, Yazer, Yok'bohan,

³⁶ Bet'nimra saal Bet'haran uk'ala şəhərmoğə,
iz hərrəmine bakala barina təzədən biq'i içəğoy
heyvanxoynak'al ağılxot'un düzbi.

³⁷ Ruveni nəsiləxun bakalt'oğəon isə Xeşbon,
Eleale, Giryat'ayim,

³⁸ Nevo saal Baal-Meon uk'ala şəhərmoğəy
hərrəminət'un təzədən biq'i. Nevo saal Baal-
Meon şəhərmoğəy s'iyurxoval badalt'unbi.
Şot'oğəon Sivma şəhərəl təzədən bit'unq'i.
Metərлуғen, bito me təzədən biq'esi
şəhərmoğəy s'iyurxo badalt'unbsay.

³⁹ Menaşşeni ğar Maxiri nəsiləxun bakalorox
isə Gileadat'un başi. Şot'oğəon t'e oçala kiyel badi
t'iya bakala emorluğə şəp't'unşi.

⁴⁰ Hametər, Moiseyen Gileada Menaşşeni ğar
Maxiri nəsiləxun bakalt'oğə tanedi, şoroxal başi
t'iya art'unşi.

⁴¹ Menaşşeni nəsiləxun bakala Yairen miya sa
hema ayizal ext'i şot'oğə "Yairi ayizmux" s'ine
tadi.

⁴² Novaxen isə Qenat şəhərəne izi hərrəmine
bakala ayizmoğəoxun sagala ext'i şot'o iz s'iya,
yəni "Novax" s'i tadi.

33

İsrailluğəy ams'i oçala çurpi ganxo

¹ Moiseyen q'a Aaronen israilluğo dəst'inen Misirəxun c'evk'it'uxun oşa azuk'i ams'i oçala taşi yaq'e loxol baki ganxo moroxe.

² Moiseyen Q'ONČuĞon içu pi k'inək' içoğoy çurk'ala ga düzbi bito ganxoy siyəyinəne biq'ey. Moval şot'oğoy taşi yaq':

³ İsrailluyox Misirə bakala Ramses şəhərexun C'ovaksuni axsibayi əyc'indəri savaxt'an, samci xəşə qos's'emci ğinet'un c'eri. Şorox Misirəxun içoğoy bul ala, şuk'k'alaxunal nu zap'esunt'un c'eri. *

⁴ Misirluğon isə Q'ONČuĞon şot'oğoynak' bisun yaq'abi içoğoy süft'in ğar əyloğot'un oçalaxbsay, şot'aynak' ki, Q'ONČuĞon misirluğoy buxaçuxxoy cazina ene tadene.

⁵ İsrailluyox Ramsesaxun yaq'a baft'i hari Suk'k'ot'at'un çurk'ala ga düzbi.

⁶ Suk'k'ot'axun c'eri hari ams'i oçali bel bakala Et'amat'un çurpi.

⁷ Et'amaxun c'eri qaybaki qoş, Baal-Şefon şəhəri bəğ c'eğala tərəf bakala P'i-Gaxirot' şəhərəç, Migdol uk'ala şəhəri t'öğölt'un çurk'ala ga düzbi.

⁸ P'i-Gaxirot'axun c'eri dənizəl c'ovakit'uxun oşa Et'am uk'ala ams'i oçalat'un hari. Miya xib ği yaq taşit'uxun oşa içoğoy Mara s'i tadi galat'un hari çurpi.

⁹ Marinaxun c'eri Elimat'un hari çurpi. Miya p'as's'e orayin saal yetmiş dənə xurmin xode buy.

†

* 33:3 33:3 C'eys. 12:1-27 † 33:9 33:9 C'eys. 15:27

10 Elimaxun c'eri hari Č'oç'a dənizi t'öğölt'un içoğoynak' çurk'ala ga düzbi.

11 T'et'iin yaq'a baft'i hari Sin ams'i oçalat'un çurpi.

12 Sin ams'i oçalaxun c'eri hari Dofqinat'un çurpi.

13 Dofqinaxun c'eri Aluşat'un hari.

14 Aluşaxun oşa hari Refidimat'un içoğoynak' çurk'ala ga düzbi. Miya azuk'en üğələ xe tene bəğəbsay.

15 Refidimaxun oşa Sinay ams'i oçalat'un içoğoynak' çurk'ala ga düzbi.

16 Sinay ams'i oçalaxun c'eri Qivrot'-Hattavinat'un hari çurpi.

17 Qivrot'-Hattavinaxun oşa Xaşerot'at'un çurpi.

18 Xaşerot'axun oşa Ritminat'un hari.

19 Ritminaxun oşa Rimmon-P'ereşat'un hari.

20 Rimmon-P'ereşaxun Livninat'un hari.

21 Livninaxun c'eri Rissinat'un hari çurk'ala ga düzbi.

22 Rissinaxun c'eri Qehelatinat'un çurk'ala ga düzbi.

23 Qehelat'inaxun c'eri Şafer buruğoy tumet'un hari çurk'ala ga düzbi.

24 Şafer buruğoxun c'eri hari Xaradat'un çurpi.

25 Xaradaxun c'eri hari Maqelot'at'un çurk'ala ga düzbi.

26 Maqelot'axun c'eri T'axat'at'un çurk'ala ga düzbi.

27 T'axat'axun c'eri T'araxat'un hari.

28 T'araxaxun c'eri Mit'qinat'un hari.

29 Mit'qinaxun c'eri Xaşmoninat'un hari.

30 Xaşmoninaxun c'eri Moserot'at'un hari.

31 Moserot'axun c'eri Bene-Yaak'anat'un hari.

32 Bene-Yaak'anaxun c'eri Xor-Hak'k'idk'adat'un hari.

33 Xor-Hak'k'idk'adaxun c'eri Yotvat'inat'un hari.

34 Yotvat'inaxun c'eri Avroninat'un hari.

35 Avroninaxun c'eri Eşyon-Qeverat'un hari.

36 Eşyon-Qeveraxun c'eri hari Şin ams'i oçala bakala Qadeş şəhəret'un çurpi.

37 Qadeşaxun c'eri hari Edom oçali zahmani t'öğöl bakala Hor buruğoy tumet'un içoğoynak' çurk'ala ga düzbi.

38 Bəyinş Aaron Q'ONÇuĞon içü bürüşü k'inək' t'e buruğə laneşi, israilluğoy Misirəxun c'eyşuni q'ırxıncı useni qomci xəşə samci ğineyal t'iya p'ure. ‡

39 Aaroni Hor buruğə biyat'an sabaç saq'o xib yəşə buy.

40 Hame vədinene Kənan oçali Negev bölginə bakala Arad şəhəri padçağən ibaki ki, israilluy-oxe eysa. §

41 İsrailuğon Hor buruğoxun c'eri hari Şalmonat'un çurk'ala ga düzbi.

42 Şalmonaxun c'eri hari P'unonat'un çurpi.

43 Punonaxun c'eri hari Ovot'at'un çurpi.

44 Ovot'axun c'eri hari Moav oçali zahmana bakala İye-Avarim şəhəret'un çurk'ala ga düzbi.

45 İye-Avarimaxun c'eri hari Divon-Qadat'un çurk'ala ga düzbi.

‡ 33:38 33:38 Ams'i oç. 20:22-29; K'an. 10:6 § 33:40 33:40 Ams'i oç. 21:1

46 Divon-Qadaxun c'eri hari Almon-Divlat'ayimat'un çurpi.

47 Almon-Divlat'ayimaxun c'eri hari Avarim uk'ala buruxmoğoy Nevoya İša çurt'unpi.

48 Avarim uk'ala buruxmoğoxun c'eri hari Moavi düzənluğa, Yerixo şəhəri bəş İordan oqe t'öğölt'un çurpi.

49 Miya, Moavi düzənluğa bakala İordan oq'e t'öğöl şot'oğoy çurk'ala ganen Bet'yeşimot' şəhərexun burqi Avel-Şit't'im şəhərəl şirik' bineq'say.

Q'onçuğoy israiluğə içoğə tadi oçalxo hetər başı arst'una tapşurbsun

50 Me Moavi düzənluğa, Yerixo şəhəri bəş İordan oqe t'öğöl, Q'ONçuğon Moiseya pine:

51 «İsrailluğə metər upa: "İordan oqa c'ovaki Kənan ölkinə bağat'an

52 t'e ölkinə yəşəyinşala amdarxo bitova şəp'ekinan. İçoğoy bul k'os'bseynak' bakala jəne saal q'əliben düzbaki binik' buxaçuxxo q'a bul k'os'bseynak' bakala mandi ganxoval bitova şarpi şipanan.

53 T'e oçala ef kiyel badi başı t'iya arşanan, şot'aynak' ki, şot'o vəxez tade.

54 Oçala ef boş bakala tayfoğoy arane cöybanan. İz say gele bakala tayfin oçal gele, iz say mal bakala tayfin oçal isə mal bakale. Oçala çöp bosı cöybanan: şu mani oçal koft'ayin, şot'o ext'ale. Koft'i oçal tayfin boş bakala nəsilxoy arane cöybakalane. *

* 33:54 33:54 Ams'i oç. 26:54-56

⁵⁵ Ama əgər t'e ölkinə yəşəyişlə amdarxo nu şəp'eğaynan, şorox t'iya mandı vəynak' sa q'aratikən, ef piyel bağala sa maq bakalt'un. Şot'oğon vəx t'e oçala pul tadi işiğ tet'un tadal.

⁵⁶ T'e vədə Zuval şot'oğoy bel eşt'un çureğalt'u ef bel çəoz"».

34

Kənan oçali zahmanxo

¹ Q'ONÇUGON Moiseya pine:

² «İsrailluğə metər upa: "Mone, Kənan oçala ene İsalayinşakenan, usumluğən başı t'iya arsalnan. Moval Zu vəx miras k'inək' tadi oçali zahmanxo, şot'oğə çalxanan:

³ ef oçalxoy güney tərəf bakala zahman Edomi zahmani t'öğöl bakala Şin ams'i oçali t'ögene taysa. Şo bəğ c'eğalaç tərəf bakala Elaxoy dənizəxun bureqsa,

⁴ hari Sk'orp'ion uk'ala buruxmoğoy güney tərəfəxun, oşa Şin ams'i oçalaxun q'a Kadeş-Barnea şəhəriyal güney tərəfəxun c'ovaki Xasar-Addara, oşal Aşmonane c'eysa.

⁵ Miya Misiri zahmani t'öğöl bakala çəyləğən taşı hari Araluğ dənizi t'öğöl çareksa. *

⁶ Ef oçalxoy bəğ batk'ala tərəfəxun bakala zahman Araluğ dənizi t'ögene taysa. Me dəniz iç vəynak' bəğ batk'ala tərəfin zahman bakale.

⁷ Ef oçalxoy q'uzey tərəf bakala zahmana Araluğ dənizəxun Hor buruğə,

* 34:5 34:3-5 Yeş. 15:2-4

8 Hor buruğoxun Levo-Xamat'a, Levo-Xamat'axun Şedada,

9 Şifrona p'ap'it'uxun oşal Xaşar-Enanal şirik' zapanan. Mo efi q'uzey tərəf bakala zahmane.

10 Bəğ c'eğala tərəfəxun isə zahmana Xaşar-Enanaxun Şefamal şirik',

11 Şefamaxun Ayini bəğ c'eğala tərəf bakala Rivlina, t'et'iinal Galileya göle bəğ c'eğala tərəf bakala buruğoy döse t'öğen zapanan.

12 Oşa zahman İordan oqe t'öğen şiri taşi Elaxoy dənizi t'öğöl çark'ale. Ef oçal q'a izi zahmanxo mone"».

13 Moiseyenal israilluğə pine: «Mo efi oçale, şot'o çöp bosi cöybalnan. Q'ONçuğon şot'o vuyunqı tayfin arane cöybsunane əmirbe.

14 Şot'o görə ki, Ruveni q'a Gade tayfinen saal İosifi ğar Menaşşeni nəsiləxun bakalt'oğon ene içəğoy oçali paya ext'et'un.

15 Şot'oğon içəğoy oçali paya Yerixo şəhəri bəş, İordan oqe bəğ c'eğalaç tərəfəxunt'un haq'e». †

Kənan oçala cöybseyinak' c'ək'eşi amdarxo

16 Q'ONçuğon Moiseya pine:

17 «Me oçalxo vəx mülk k'inək' tast'eynak' me amdarxon cöybalt'un: bəyinş Eleazaren q'a Nune ğar Yeşuan.

18 Me əşləst'a köməybseyinak' hər tayfin boşt'an sa kalo bakale.

19 Me amdarxo moroxe:

İuday tayfinaxun Yefunneyi ğar K'alev;

20 Simeoni tayfinaxun Ammihudi ğar Şemuel;

† 34:15 34:13-15 Ams'i oç. 26:52-56; Yeş. 14:1-5

- 21 Binyamini tayfinaxun K'islone ğar Elidad;
22 Dane tayfinaxun Yoqlin ğar bakala, kalo
c'ək'eşi Buqqi;
23 İosifi ğarmux bakala Menaşşeni nəsilexun
Efodi ğar, kalo c'ək'eşi Xanniel,
24 Efraimi nəsilexun isə Şift'ani ğar bakala,
kalo c'ək'eşi Qemuel;
25 Zevuluni tayfinaxun P'arnak'i ğar bakala,
kalo c'ək'eşi Elişafan;
26 İssak'ari tayfinaxun Aśśani ğar bakala, kalo
c'ək'eşi P'alt'iel;
27 Aşeri tayfinaxun Şelomin ğar bakala, kalo
c'ək'eşi Axihud saal
28 Naft'alın tayfinaxun Ammihudi ğar bakala,
kalo c'ək'eşi P'edahel».
29 Mo Q'ONÇuĞon Kənan oçala israiluğoy
arane cöybseynak' c'ək'p'i amdarxone.

35

Leviğoynak' cöybaki şəhərmux (Yeş. 21:1-42)

¹ Moavi düzənluğa, İordan oqe t'öğöl bakala
Yerixo şəhəri bəş Q'ONÇuĞon Moiseya pine:

² «İsrailluğoy əmirba ki, içöğö mülk k'inək'
koft'i oçalxoy boş leviğoynak' şəhərmuxq'at'un
cöybi. Şəhərmuğoy hərrəmine heyvanxo
otarişbseynak' bakala örüşxoval şot'oğq'at'un
tadi.

³ Barta şot'oğoy yəşəyinsbseynak' şəhərmux,
içöğoy heyvanxo otarişbseynak'al örüşxoq'an
baki.

4 Vën leviğo tadala şəhərmoğoy hərrəmine bakala örüşxo şəhəri bariğoxun burqı sa hazar əm əxil çark'alone.

5 Şəhəri bəğ c'eğala tərəfəxun p'ə hazar əm oçal, güney tərəfəxun p'ə hazar, bəğ batk'ala tərəfəxun p'ə hazar, q'uzey tərəfəxun p'ə hazar əm usk'anan ki, şəhər biyexq'an mandı. Leviğoynak' cöybaki şəhərmoğoy hərrəmine bakala örüşxo metər bakalane.

6 Vën leviğo tadala şəhərmux amdar bəsp'it'oğoy t'it'eri c'ap'bakseynak' bakala uq şəhər saal q'erəz q'ırx p'ə şəhər bakale.

7 Bito sagala iz hərrəmine heyvanxo otarişbseynak' örüşxo bakala q'ırx muğ şəhər tadalan.

8 İsrailuğoxun leviğoynak' şəhərmux ext'at'an tayfina koft'i oçali kala-mis'ik'luğa bəğanan. İz say gele bakala tayfinaxun gele, iz say mal bakala tayfinaxun mal şəhər ext'anan».

Amdara q'əst'en nu bəsp'it'oğoy t'it'eri c'ap'bakseynak' bakala şəhərmux

(K'an. 19:1-12; Yeş. 20:1-4)

9 Oşa Q'ONÇuğon Moiseya pine:

10 «İsrailuğo upa: "Vën İordan oqa c'ovaki Kənan oçala bağat'an

11 amdara q'əst'en nu bəsp'it'oğoy t'it'eri c'ap'bakseynak' bakala şəhərmux c'ək'p'anan.

12 Amdara q'əst'en nu bəsp'iyə me şəhərmoğoy c'ap'bakalane ki, p'uri amdari həyifə haq'alt'in şot'ay şurin bəş c'eri q'ərar tadeğamin şot'o nu bəsp'ane.

¹³ Ef c'ək'p'i me üq şəhər t'it'eri c'ap'bakseynak' bakala şəhərmux bakale.

¹⁴ Şot'oğoy xibara İordan oqe me tərəfəxun, t'e soğə xibara isə Kənan oçalaxun c'ək'p'anan.

¹⁵ Me üq şəhər sunt'u q'əst'en nu bəsp'i ham israilu, hamal ef boş yəşəyişala q'erəz azuk'axun bakalt'aynak' t'it'eri c'ap'bakala ga bakale.

¹⁶ Əgər sunt'in t'iyəmint'u dəmiri sa şeyen duğayin, t'e amdaral mot'oxun biyayin, şot'in t'e amdara q'əst'en bəsp'ine baksa. Metər amdara bəsp'anan.

¹⁷ Nəəl ki, sunt'in t'iyəmint'u sa jənen duğayin, t'e amdaral mot'oxun biyayin, şot'inal t'e amdara q'əst'en bəsp'ine baksa. Metər amdara bəsp'anan.

¹⁸ Sunt'in iz kiyel bakala durut'i sa şeyen t'iyəmint'u duğayin, şoval mot'oxun biyayin, şo q'əst'en amdar bəsp'ine baksa. Metər amdara içüval bəsp'alanan.

¹⁹ Şot'o bəsp'alo bari p'iya oq'a nu efalo bakale, barta şot'o maya biq'ayin bəsp'eq'an.

²⁰ Əgər sunt'in t'iyəmint'u q'əst'en lik't'i nəəl izi loxol k'ənesa boserit'uxun oşa t'e amdar biyayin,

²¹ nəəl iz əcuğon biq'i şot'o duği bəsp'ayin, me amdara içüval bəsp'alanan, şot'o görə ki, şot'in amdara q'əst'ene bəsp'e. Barta p'urit'ay p'iya oq'a nu efalt'in şot'o maya biq'ayin hat'iya bəsp'eq'an.

²² Ama əgər iz ük'e pis niyət nu bakala sunt'in t'iyəmint'u nu avabaki lik't'ayin, iz loxol k'ənesa

bosayin,

²³ nœl şot'ay loxol nu avabaki şot'o besp'es bakala jě bosayin, me içuxun sal sa düşmənçiluğ nu bakala amdara mot'oxun biyayin,

²⁴ t'e vədə barta azuk'i ağsaq'q'alxon amdara q'əst'en nu besp'it'ay q'a p'urit'ay p'iya oq'a nu efalt'ay arane bakala əşlə me q'aydinəq'at'un divanbi.

²⁵ Azuk'i boşt'an c'ək'əsi kalat'oğon amdara besp'it'u p'urit'ay p'iya oq'a nu efalt'ay kiyexun çark'est'eynak' şot'o qaydi t'it'eri c'ap'bakseyinak' bakala şəhərə yaq'abalat'un. Barta ivel c'əyin ləəməst'unen c'ək'əsi samci bəyinş biyamin şo t'iyəq'an yəşəyinşi.

²⁶ Ama əgər amdara q'əst'en nu besp'iyə t'it'eri c'ap'bakseyinak' bakala şəhərexun c'əğayin,

²⁷ p'urit'ay p'iya oq'a nu efalt'inal şot'o ak'i besp'ayin, taxsirkər tene hesabbaksa.

²⁸ Şot'o görə ki, amdara q'əst'en nu besp'iyə samci bəyinş biyamin t'e şəhərə mandalaney, şo saycə samci bəyinş p'urit'uxun oşane iz k'oya qaybakes bəkon.

²⁹ Me k'anuna maya yəşəyinşalnan yəşəyinşanan, nəsiləxun-nəsilə c'ovakest'unen həmişə əməlbəlanan.

³⁰ Əgər sa amdaren şunəsa besp'enəsa, şot'ay bisuni q'ərərə saycə me əşlə iz piin ak'it'oğoy şahidluğəne tades bəkon. Ama mot'aynak' sa amdari şahidluğ bəstənebaksa. *

³¹ Amdara q'əst'en besp'it'ay elmoğoy gala hik'k'al exmadanan, şo biyalane.

* 35:30 35:30 K'an. 17:6; 19:15

³² Amdara q'əst'en nu besp'it'ay t'it'eri c'ap'bakala şəhərexun hari iz k'oya yəşəyişes bakseyinak'al təngə exmadanan, şo samci bəyinş biyamin t'e şəhərə mandalane.

³³ Efi yəşəyişəla ölkinə murdarlay-inşmabanan, şot'o görə ki, p'i şipsunen şot'o murdarlayinşesba. Bari p'iyal saycə şot'o şipit'ay p'iyene os'k'i təşeri p'urum t'e oçala pakbes bakan.

³⁴ Ef mandala, Zuval efi t'öğöl bakala ölkinə ləkələyinşmabanan, şot'o görə ki, ef t'öğöl Zu, Q'ONÇuxə bu"».

36

Oçal koft'i xuyər iz tayfinaxun bakalt'u işq'ara tağalane

¹ Gilead İosifaxun baki Menaşşeni nəvə, Mak'iriyal garey. Şot'ay nəsiləxun ailoğə görə kalo c'ək'əsit'oğon Moiseyi q'a israilluğoy tayfoğoxun kalo c'ək'əsit'oğoy t'öğöl hari

² pit'un: «Q'ONÇuğon beş ağa me ölkinə israilluğoy arane çöp bosi cöybsuna əmirbat'an, beş viçi Şəlofexada koft'ala oçala iz xuyərmoğə tast'unanə va əmirbi. *

³ Ama Şəlofexadi xuyərmux q'erəz tayfinaxun bakala sa israilluna işq'ara tağayt'un, içoğə koft'i oçalal t'e tayfina c'ovakale. Metərлуğen, beş bavoğə koft'i oçal t'iyəmi tayfina c'ovaksunen malbaki bakale.

* 36:2 36:2 Ams'i oç. 27:7

4 İsrailuğoy Qaydi Exst'uni usen† eğat'anal t'e oçala ext'es teyan bakal - oçal içoğoy işq'ara taşi tayfina mandale, beşi oçalxoval metərлуğen malbakale».

5 T'e vədə Q'ONčuğon Moiseya əmirebi, şot'inal israiluğə pine: «İosifaxun baki me tayfinen düze nex.

6 Mone, Q'ONčuğon Şelofexadi xuyərmoğoy barada metəre nex: şorox içoğoy çureğalt'u tayer bat'unkon. Saycə içoğoy işq'ara tağala amdar içoğoy tayfinaxun bakala əsiləxun bakalane ki,

7 israiluğə koft'i oçal tayfinaxun tayfina nu c'ovakane. Hər israilunen iz əsilə koft'i oçala iz kiyexun nu tərbalane.

8 İsraili maninesa tayfinaxun içü iz bavaxun oçal mandi xuyər bunesa, şo saycə iç mani tayfin əsiləxunesa, t'e əsiləxun bakala amdarane işq'ara tayer bakon. Barta hər israilun iz bavaxun mandi oçal iz əsili boşq'an mandi.

9 Oçal sa tayfinaxun q'erəz tayfina nu c'ovakalane. İsrailuğoy boş bakala hər tayfinen içü koft'i oçala iz kiyexun nu tərbalane».

10 Q'ONčuğon Moiseya əmirbi k'inək'əl Şelofexadi xuyərmux

11 Maxla, T'irsa, Xok'la, Milk'a saal Noa içoğoy əmin ğarmoğot'un işq'ara taşi.

† 36:4 36:4 - Hər əlli usenen sa israiluğoy İvel hesabbakala usene eysay. Me usen eğat'an israiluğon içoğoy hevaxt'esa toydi oçala qaydi ext'est'un baksay. Metərлуğenal, tayfina miras k'inək' koft'i oçal maltenebaksay.

¹² Şot'oğoy taşi işq'arxo İosifi ğar Menaşşeni tayfinaxuney, şot'o görəl içoğo koft'i oçal içoğoy bavay tərəfəxun bakala əsili kiyelxun tene c'eri.

¹³ Metərluğen, Moavi düzənluga, İordan oqe t'öğöl bakala Yerixo şəhəri bəş Q'ONÇuĞon Moiseya israilluğə p'ap'espseynak' tadi q'aydoox q'a k'anunxo moroxe.

Udi Bible
Udi Scripture translation

copyright © 2020 Translation Services International Ltd. and Wycliffe Bible Translators, Inc.

Language: (Udi)

Contributor: Wycliffe Bible Translators, Inc.

All rights reserved.

2025-07-09

PDF generated using Haiola and XeLaTeX on 26 Jul 2025 from source files dated 9 Jul 2025

174556f0-71b4-5f1c-b512-2117b07ebbf0